


靈州誌蹟

地 593.15  
135

地 10.37  
135  
21-4

地 57.15  
135





長白坡東氏豐

捐廉修輯

靈

州

志

嘉慶戊午春



靈州誌蹟

捐修

署知州事豐延泰 滿洲正白旗人廩膳生員

監修

前任知州楊芳燦 江蘇金匱人拔貢生

纂修

奎文書院長郭楷 涼州武威人己卯科進士

校閱

學正梁楚翹 陝西耀州人唐寅舉人

靈州誌蹟 序

校對

吏目查蓋 江蘇人監生

校錄

寧夏府學廩膳生員閔光敏 本州人

文生 張祿 本州人





靈州誌蹟

序

陝之境北極廊延由廊延而西為慶環而銀夏實樹之障  
甘之境北極銀夏迤銀夏而東且南為平慶而靈武實當  
其衝蓋朔郡統屬有五靈邑獨限大河具喉唇襟帶之勢  
故選吏常重於他處嘉慶戊午秋長白豐公岐東以邊俸  
報滿來此署篆余時適主講是邦課士之暇間與余語曰  
靈邑為近塞要區地勢極為廓遠今欲稽覈舊章釐剔庶  
務而典文散軼誌蹟不存某竊惜之且夫監成憲整綱維  
靈州誌蹟 序 二

已今

天子聖德覃敷拓疆萬里之外凡新造小邑尚莫不抉幽  
闡隱以紀一方之政教矧靈邑自漢初建置至今幾二千  
載昔人之經畫詳矣顧乃聽其荒廢湮沒而弗顧則豈特  
官斯土者之責亦是方薦紳先生之恥也蒐羅補綴勒成  
一書某有志焉願為我成之余曰斯事體大而關係尤重  
緣非著令之所督故人率置焉不講今公之蒞斯土也百  
務叢冗蚓結蝟集而先以整綱維監成憲為事豈不真知



輕重識大體哉先是梁溪楊公蓉裳官是邑有心是事勤  
加搜輯囑余補訂之未及成書而楊公去任是事旋廢今  
復承公之命幸舊本猶在遂取而整齊之刪其煩複益其  
疎漏按文獻通考體例分為十八門類類以小序冠之俾  
覽者提綱挈領豁然心目凡再易稿而書始成既又復於  
公曰夫事創之難成之尤難昔之典文散軼荒廢湮沒者  
非楊公創之於前則考稽誠無由也創之矣使逾數載而  
無人焉以成之亦仍歸於湮沒荒廢而已其與夫未創之  
先相去幾何今公能毅然任其所難使一州之文物經制  
靈州誌蹟

序

三

歷漢初至今幾二千載者一旦於公之手而煥然大備不惟  
州人士度引領以仰庶政之維新而後之官茲土者務覈  
舊章釐剔庶務俱於是乎賴則公之舉墜修廢為功甚鉅  
余故曰公誠知輕重識大體者也若夫挾訂之未精裁取  
之未當此則余之謏陋而無所辭其責也夫

昔嘉慶三年歲次戊午嘉平月穀旦

賜進士出身候銓知縣武威郭楷雪莊氏敬叙





靈州志序

蓋聞作史莫難於志而志地里為尤難州縣之志其例當準諸史則地里不可不考也班氏云先王之迹既遠地名又數改易顏師古云中古以來說地里者競為新異安有穿鑿頗失其真後之學者莫能尋其根本此其所以難也如地里之沿革既瞭如指掌凡人物職官戶口賦役胥準諸此矣靈州為禹貢雍州之域太平寰宇記云春秋及戰國時屬秦及始皇時置北地郡漢書注云惠帝四年置靈州屬北地郡有河奇苑又曰河奇苑地志云薄骨律鎮城

靈州誌蹟

序

四

在河漢之中隨水上下未嘗陷沒故號曰靈洲歷代以來廢置不一或置鎮將或置總管或改都督府或屬關內道元置州牧屬寧夏路明設千戶屬寧夏衛我朝定鼎之初猶沿明制雍正二年改為靈州隸寧夏馬州故無志丁未歲余奉

簡命來牧茲邑竿牘餘暇網羅史籍搜採方志每苦紀載繁多見聞互異五閱寒暑未能卒業乙卯延武威郭君雪莊主講席時與商榷又得一統志溯歷代之沿革考証極為精當曰此



冊府之鉅製也洵足據依矣因參之朔方志及郡志所載  
粗立條理鈔撮成編適余奉檄假守高平攝州篆者為長  
白岐東豐公甫下車即慨然以斯事為己任爰偕郭君取  
舊所蒐輯者審其蕭殺剝其瑕礫凡兩閱月而勒成一書  
條分件繫釐然井然不但疆域形勝如畫沙聚米而止方  
之文獻歷朝之掌故備載無遺其通博為何如也豐公能  
以儒術飾吏治郭君又淹貫羣雅以予積年未竟者一旦  
成之人之才力相去寧可數計耶二公復謙抑自居不沒  
余創始之意如習禮之綿葛造車之椎輪益滋余弁陋之  
愧矣

靈州誌蹟

序

五

昔嘉慶三年歲次戊午嘉平月穀旦

奉直大夫知靈州事金匱場步煉德蒙氏敬叙





靈州誌蹟目錄

卷一

歷代沿革表第一

星野第二

地里山川第三

城池堡寨第四

公署學校第五

壇廟坊市橋梁津渡名勝第六

風俗物產第七

古蹟第八

卷二

丁稅賦額第九

水利源流第十

職官姓氏第十一

兵額營汛驛遞第十二

靈州誌蹟

目錄

三

歷朝官蹟第十三

卷三

人物鄉獻第十四

忠孝義烈第十五

藝文第十六上

卷四


藝文第十六下

歷代邊防事蹟第十七





歷代祥異第十八

目錄終







靈州誌蹟 星野

尾宿		井宿	星野圖
			
柳宿		鬼宿	
			





靈州志蹟






靈州誌蹟



鎮河塔

官橋



三

寺



靈州誌蹟

歷代沿革表誌第一

史之有表猶星辰之有躔紀衣服之有冠冕也振  
 綱挈領條緒斯分靈州自漢初建置中更變易不  
 恒今取歷代沿革始末標為表識庶幾觀者如列  
 眉焉

寧夏郡

寧夏縣

寧朔縣

平羅縣

靈州

中衛縣

秦

北地郡始  
 皇攘却匈  
 奴得河南  
 北地千里  
 徙民充之  
 名曰新秦

靈州誌蹟

卷一

中

漢

北地郡朔  
 方郡元朔  
 二年衛青  
 逐匈奴白  
 羊樓煩王  
 取河南地  
 又置朔方  
 郡使平陵  
 侯築朔方  
 城屬并州  
 刺史

富平縣  
 武三縣地  
 屬北地郡

富平縣

北地郡北

朔方縣  
 朔方縣屬北  
 安定縣

後漢

北地郡涼  
 州刺史朔  
 方郡并州  
 刺史



晉

北地郡惠  
帝後赫連  
勃勃據統  
萬城曰夏  
州又曰忻  
都

魏

化政郡太  
和十一年  
置屬夏州  
西魏置宏  
化郡後周  
置懷遠郡

齊

夏州後衛  
始光四年  
為統萬鎮

靈州誌蹟

卷一

二

隋

朔方郡靈  
武郡開皇  
初廢宏化  
懷遠分置  
二郡

熾綠縣屬  
朔方郡又  
為懷遠靈  
武宏靜三  
縣地屬靈  
武郡

懷遠縣寧  
朔縣屬朔  
方郡

唐

靈州郡屬  
靈州朔方  
郡屬夏州  
僖宗時拓  
拔思恭鎮  
夏州世有  
其地

朔方縣貞  
觀三年改  
名屬夏州  
朔方郡懷  
遠靈武保  
靜屬靈武  
郡

懷遠縣寧  
朔縣屬夏  
州朔方郡

靈州大興  
郡西魏改  
五原郡置  
安西州  
廢  
靈州地周  
置會州尋

靈州迴樂  
縣及帶普  
樂郡治

靈武郡大  
業元年改  
置迴樂縣  
益川縣五  
原縣  
鳴沙縣開  
皇十九年  
置屬靈武  
郡豐樂縣  
開皇十年  
置屬靈武  
郡

靈州靈武  
郡屬開內  
道益州五  
原郡貞元  
初陷吐蕃  
六年收復  
迴樂縣五  
原縣白池  
縣  
鳴沙縣神  
龍後移置  
於廢豐安  
城廢州



秦

懷遠縣保靖縣

靈州蓋州鳴沙縣  
迴樂縣五原縣

宋

咸平中西  
懷遠鎮  
夏置興州  
尋建國升  
興慶府又  
曰中興府

靈州咸平鳴沙縣入  
五年陷於西夏  
西夏改西  
平府又改  
翔慶軍

元

寧夏路至  
元八年立  
西夏中興  
等路行省  
二十五年  
改置路尋  
罷行省屬  
甘肅行省  
屬寧夏路  
屬寧夏路

靈州復名應理州初  
屬寧夏路置所寧夏  
蓋州廢為路鳴沙州  
環地屬寧夏路

靈州誌蹟

卷一

三

明

寧夏衛初  
置府洪武  
五年府廢  
九年改置  
衛隸陝西  
都司  
寧夏右衛  
平羅所洪  
武初置屬  
寧夏衛  
靈州所初  
寧夏中衛  
改置所為  
洪武初廢  
寧夏衛宣  
州三十二  
德三年移  
年移建衛  
治屬陝西  
都司

靈州漢惠帝四年置初曰靈洲以洲在水中隨水上

下未嘗淪沒故號曰靈洲後魏置薄骨律鎮孝昌

中改置靈州西魏又為鹽州地後周置帶普樂郡

及迴樂縣隋大業三年改靈武郡唐為靈州亦曰

靈武都開元中置朔方節度使天寶初復改州為

靈武五代為朔方軍治咸平時入西夏改西平府



又名翔慶軍元復曰靈州屬寧夏路明宏治十五年置守禦所千戶正德元年改寧夏後衛仍以千戶攝之屬寧夏道

國朝因之雍正三年改州並省守禦所附入屬寧夏府

一統志靈州沿革表

國朝 漢 三國晉 魏 周 隋 唐 五代 宋 元 明

靈州北地郡 移治永和六年 又徙富平縣 屬北地	靈州太靈州 延二年兼置郡 置薄骨普樂廢郡 律鎮孝郡 昌中改 置州	靈州靈武 郡初武郡復 置州置縣 大業都督府 三年屬關內 改道	靈州靈州 咸平屬寧所初 五年夏路置所 隸於 改西	靈州靈州 宣德
---------------------------------	---	---	--------------------------------------	------------

靈州誌蹟卷一

郡後漢 郡治後徙廢 靈州縣 屬北地 郡後漢 胸衍縣 屬北地 郡後漢 省	益州大益州 興郡魏大興縣 置西魏郡治 改五原五原 郡尋復縣 名兼置 西安州 後改名 五原縣 州郡治	迴樂縣 溫池縣 神龍五 年置屬 靈州大 中五年 屬咸州 靈武縣 移治屬 靈州後 廢 益州五 原郡 白池縣 初置興 寧縣屬 益州景 龍初改名	平府 又改 翔慶 軍 迴樂 縣後 入西 夏 益州 入西 夏 五原 縣省	三年 移治 宣德 後衛 弘治 中置 花馬 池所 正德 中改 衛 陝西 都司
---	--	--	---	---



古者有分地無分天天亦何嘗無分也地之分以野天之分以星張衡云衆星列布體生於地精成於天列居錯峙各有所屬然則天統乎地故野繫乎星自太史公天官書及扶風地理誌言之詳矣靈州秦雍之分星野畧與秦雍同今采載紀可見者列於左

舊志據大統歷井八度三十四分九十四秒入鶉首之次在未

赤道井三十三度三十分鬼二度二十分尾十九度一十分柳十三度三十分

黃道井三十一度一分鬼二度十一分尾十七度九十五分柳十三度

春秋元命苞曰東井鬼宿為秦

史記天官書東井與鬼雍州之分

前漢地理誌曰自井十度至柳三度為鶉首之次秦之分

後漢律歷志曰井十二度至鬼五度為秦分



唐志云東井與鬼鶉首也自漢三輔及北地上郡  
安定西自隴抵至河右西南盡巴蜀漢中之地及  
西南夷犍為越裳益州郡極南河之表東至牂牁  
古秦梁幽尚豐畢駘杠有危密瀕庸蜀羌髡之國  
晉志北地上郡天水隴西酒泉張掖金城武威燉  
煌諸郡各指其所入之里為尾為室也璧詳紀度  
數

唐志又稱東井居河之陰自山河上流當路紀之  
西北與鬼居兩河之陽自漢中東盡華陽與鶉火

相接當地絡之東南鶉火之外雲漢潛流而未達  
故狼星在江河上流之西弧矢鶉火皆徼外之備  
也西羌吐谷渾及南徼外夷人皆狼星

躔次

晉天文志上郡北人尾十度

唐志夏州東井之分

五星

鶉火實沉以負西海主於華山太白位焉

北方水位自河西皇甫川西經榆林至寧夏又西



經蘭州踰河至嘉峪關四千餘里得水位之平  
步天歌

井宿

八星行列河中浮一星名鉞井邊安兩河各三南  
北正天樽三星井上頭樽上橫列五諸侯侯上北  
河南積水欲覓積新東畔是鉞下四星名水府水  
位東畔四星序四瀆橫列南河裏南河下頭是肆  
市軍市團圓十三星中有一箇野鷄精孫子丈人  
市下立各立兩星從東說闕邱二箇河南東邱下  
一狼光蓬葦左畔九箇彎弧弓一矢擬射頑狼胸  
有箇老人南極中春秋出來壽無窮

鬼宿

四星册方似木櫃中央白者積尸氣册上四星是  
燿位天狗七星鬼下是外厨六間柳星決天社六  
箇張東倚社東一星是天紀



靈州誌蹟

地里山川誌第三

禹貢九州皆以山川定疆理蓋郡國有時改移山川千古不易也靈邑地接邊境舊時為戎馬出入之場今雖承平已久然道里之遠近商賈之阨塞水草之聚行爲治者置焉不講可乎况夫黃河為帶金積如礪峽口遙峙西南馬鞍環抱東北實北陲形勝之區也觀是編者一覽在目矣

地里

靈州州治在府東南九十里

靈州誌蹟

卷一

八

東至榆林府定邊縣界二百八十里

西至寧夏縣界三十里

南至李旺堡平涼府固原州界二百八十里

北至橫城邊牆七十里

東南至甜水堡慶陽府環縣界二百九十里

西南至廣武營中衛縣界一百二十里

東北至興武營一百四十里

西北至河西寨寧夏縣界七十里

山川



馬鞍山 在州東北五十里形似馬鞍

磁窑山 在州東六十里為陶冶之所出石炭成  
化九年撫臣馬文升議築磁窑堡於此以接靈州  
邊界

打狼山 在州東南明一統志狼山即此套虜由  
韋州入犯鎮原平涼道

三山 在韋州堡東一百里三峰列峙

樺子山 在三山南溪澗險惡豺虎所居人跡罕  
到

金積山 在州西南一百餘里產文石山土色如  
金北崖石板下水滴如雨禱早有應

炭山 在州南五十里

黑鷹山 在韋州堡南一百五十里迤琿八山

長樂山 在州南元和志迴樂縣有長樂山舊名

達樂山又曰鐸落山以山下有鐸落泉故名舊吐  
谷渾所居象守記引十道記云山迤安樂川

大蠡山 在韋州堡西二十五里層巒疊嶂蒼翠  
如染初無名明慶府長史劉坊以其岑如蠡故名



四旁皆平地屹然獨立上多奇水異卉良藥山北  
有祠雨暘輒禱之明慶王諸陵墓皆在焉舊尚有  
宮殿今皆毀

小蠡山 在大蠡山之南其脉相聯舊志在韋州  
西二十里亦曰螺山套虜入寇常駐牧於此

琥八山 在韋州堡南八十里琥八方言猶華言  
色駁雜也

打刺坡山 在韋州堡南四十里

峽口山 在州西南一百四十里東北岸為中衛

靈州誌蹟

卷一

十

界

平山 在州東八十里

囉龐山 在州西乾道六年夏相任得敬賜其主

仁孝欲分夏國仁孝分西南路及靈州之囉龐嶺  
與之即此

歡喜嶺 在州東明成化中虜入州東永隆墩諸  
戍官軍退敗之於此

黃河 在州西水經云河水又北逕臨戎縣故  
城西又北有支渠東出謂之銅口東逕沃野故城



南銅口即今峽口山州之秦漢渠口亦在焉

蒲草湖 在州南二十里

安樂川 在州南稍東一百八十里寰宇記川近

安樂山

天麻川 在州東址

東湖 在韋州東一里

鴛鴦湖 在東湖址三里

草場湖 在州南三十里

滾泉 在金積山東水自地湧出高文許其沸

靈州誌蹟 卷一

如湯

滴水 在滾泉南址崖上一石板突出下瞰水

自石板亂滴如雨

暖泉 在舊寧夏址三十里鹽池西南三十里

明萬歷四十一年總制黃嘉善檄操守盧文善拓

其基建亭鑿池為行邊暫憩之所元迴樂縣有温

泉即此

富泉 在蠡山之南引以溉田

旱海 在州東南宋張洎曰自威州抵靈州有



旱海七百里斥鹵枯馮無溪澗川谷張舜民曰今旱海坪即旱海在清遠軍北趙珣曰鹽夏清遠軍並係沙磧俗謂之旱海自環州出青岡川本靈州大路自北過美利砦漸入平夏徑旱海中至耀德清邊鎮入靈州

沙窩井 在惠安堡北五里許味清而甘美居民萬家及四方往來人畜咸利賴之雖旱不竭

羊坊井 在惠安堡北五里

簡尖山 在胭脂川接長流水中衛界山上有墩

為古水營汎界



靈武古郡也後改而邑之然地勢寥廓輪廓千里雖名為邑而郡之小者或形勢反不及焉其城池西阻河界而三十六堡環拱千里之內堡之大者往往立官職設兵衛而遠者去州城或二百里外星羅密布犬牙相錯如長山率然之勢故靈城雖斗絕一方而勢不慮其孤者恃堡寨為之輔也有守土之責者可按籍而籌焉

靈州城舊在黃河南洪武十七年城為河水所囓移

築于河北七里宣德三年河又崩塌移築于東北隅五里景泰三年展築之並南開週圍七里八分萬歷五年巡撫羅鳳翔築以磚石高三丈一尺址厚二丈五尺頂厚一丈五尺城門四道東曰澄清西曰孕秀南曰洪化北曰定期上皆有樓外有月城角樓四座敵樓四座門臺四座砲臺四座環城河一道深一丈寬三丈

國朝乾隆三年地震損塌五年重修知府朱佐湯千總索雲飛把總卨得倫孫洗監脩費



帑銀六萬七千一百餘兩

花馬池城明後衛所今屬靈州舊城築于正統八年  
在塞外花馬鹽池北天順間改築今地城門二東  
曰永寧北曰威勝萬歷三年開南門曰廣惠八年  
巡撫蕭大亨教以磚石

國朝乾隆六年重修週圍七里三分池厚二丈五尺頂  
厚一丈五尺門樓三座角樓四座池深一丈寬二  
丈駐州同叅將

清水營城週圍一里宏治間巡撫王珣拓以二里

靈州志蹟

卷一

十四

國朝乾隆六年重修高三丈址厚二丈五尺頂厚一丈  
五尺城門一道門樓一座駐把總

興武營城週圍三里八分明正統間巡撫金濂築萬  
歷十三年巡撫晉應槐築以磚石

國朝乾隆六年重修高二丈五尺址厚二丈七尺頂厚  
一丈五尺東門一南門一門樓二座池深一丈寬  
二丈駐都司

橫城週圍二里正德時總制楊一清築後巡撫楊時  
寧發以磚石



國朝乾隆六年重修高三丈址厚二丈五尺頂厚一丈五尺城門一道門樓一座乾隆二十五年河水泛漲冲塌靈州知州西岷峨詳請修築委江南銅沛營守備李永吉外河營千總劉德監督於乾隆二十五年十一月興工二十六年三月工竣費帑銀三千三百三十五兩零駐都司

惠安堡城週圍二里四分明巡撫黃嘉善甃以磚石巡撫崔景榮題設鹽捕通判高三丈址厚二丈五尺頂厚一丈五尺門二道門樓二座南北敵臺三

靈州誌蹟

卷一

座駐通判

韋州堡城週圍二里明宏治間巡撫王珣奏築東南門二道駐把總

靈州所屬堡寨三十六

秦園堡 在城西南四十里

吳忠堡 在城南四十里

惠安堡 在城南一百六十里 駐寧夏府通判司鹽務

漢伯堡 在城東南七十里

金積堡 在城西南七十里



忠營堡 在城東南七十里

秦壩關 在城西南七十里

同心城 在城西南四百五十里 明置搆守  
今設守備

胡家堡 在城南二十里

新接堡 在城西南三十里

臨河堡 在城北六十里 今設  
把總

夏家堡 在城北二十里

河東關 在城北四十里

大沙井 在城東南四十里 明設  
驛

靈州誌蹟 卷一 六

石溝駟 在城東南九十里 明置  
搆守

盩池堡 在城東南一百五十里 產鹽  
明置搆守  
今廢

隰寧堡 在城東南二百里 明有  
驛

萌城 在城東南二百五十里 明有  
驛

磁窑寨 在城東七十里 出渣炭  
其土可陶

清水營 在城東北七十里 明置搆守  
今設把總

橫城 在城北七十里 明置搆守  
今設把總

紅山堡 在城東北六十里 明置搆守  
今設把總

紅寺堡 在城南二百九十里 明置搆守  
今設把總



興武營 在城東北一百四十里 今設都司

花馬池 在城東二百六十里 明置後衛駐副將今因之後改恭將

韋州堡 在城東南二百一十里

安定堡 在城東二百里 明設守備今因之

柳楊堡 在城南一百四十里

野狐井 在城東南一百八十里

西水頭 在花馬池西六十里

南水頭 在花馬池南九十里

張貴堡 在花馬池西南一百二十里

靈州誌蹟一 卷一 十七

孫家水 在花馬池東南一百九十里

寺兒掌 在花馬池西南一百六十里

鉄柱泉 在花馬池西一百二十里

查舊志尚有紅崖站堡今廢



周禮建邦置邑有懸象之所有興賢之地公署學校自此時與靈州公署在城內者五散在各營堡者十有一凡倉廩庫局附焉若夫崇宮警尉以籍衿秀有員廩給有額課業有地脩脯有資元

聖天子作人之雅化與賢牧宰樂育之德也故為之誌公署

知州署在城東街庫在堂五額財經費銀四百兩  
吏目署在城西街 獄在城內西北

州同署在花馬池 益補通判署在惠安堡

益大使署在惠安堡內今裁

倉五

大倉在城中街 草場倉在東城 東園倉在東

倉俱在文廟街 道府倉在中廟街

草場在東門外

養濟院在白衣巷街養濟祿貧二十八名每月

支糧三斗

公館在城東街 南門外普濟堂官房一所



叅將署在城北街 守備署在城西南今無

軍器局在火神廟南 火藥局在廟北

教場在城東門外

花馬池叅將署在花馬池城內軍器局在署內火藥局在城北教場在東門外

興武營都司署在興武營城內軍器局在城東火藥局在城西北教場在城外東南

橫城都司署在橫城內軍器局在都司署內火藥局在城西北教場在城外東南

同心城守備署在同心城內軍器局火藥局俱在守備署內教場在城北

安定堡守備署在安定堡內軍器局在守備署內東火藥局在守備署內西教場在城北

清水營把總署在清水營內火藥局在城內教場在城北

毛卜喇把總署在毛卜喇堡內火藥局在堡內教場在堡外

紅山堡把總署在紅山堡內火藥局在堡內教場在



堡北

臨河堡把總署在臨河堡內火藥局在堡內教場在堡  
學校

學宮在州治東南明洪武十五年設州置學十七  
年州裁學廢正德十三年復立十五年寧夏巡撫  
王時中興建

皇清順治十六年省後衛教缺併入靈州巡撫黃圖安  
重修康熙四十六年中路同知祖真舉人李秋藩  
等重修雍正三年改靈州所學為靈州學

靈州誌蹟卷二

二十

大成殿七間東西廡各九間戟門三間東西角門外  
更衣廳三間省牲所三間名宦祠三間鄉賢祠三  
間泮池環橋一座上有坊樞星門三間照壁一座  
門東有聖域義路坊門西有賢關禮門坊

崇聖祠舊在廟東房有墩一亭廢

尊經閣一座在廟西明倫堂五間在閣東東西齋  
房各五間儀門三間東西角門各一間大門三間  
學正署在後學生三年二貢廩三十缺增三十缺  
每歲考取文武生各十五名科考取文生十五名



佾舞生六十四名

存貯書籍

御纂周易折衷四部每部十本

御纂四書解義四部每部十二本

御纂性理精義四部每部六本

欽定春秋傳說彙纂四部每部二十四本

聖諭廣訓一本

御批資治綱目一部四本

上諭一部

靈州誌蹟

卷一

二十一

欽定書經傳說彙纂四部每部二十四本

欽定詩經傳說彙纂四部每部二十四本

大清律一部二套

欽定四書文四部每部二十二本

駁呂良留四書講義八部每部八本

明史一部一百一十二本

廿一史一部五十套

十三經全部十二套

科場條例二部



學政全書一部

書院

鍾靈書院在州城西門外乾隆三十八年署知州周人傑創立有碑記見藝文

每歲捐膏火銀八十兩本官捐墊

鍾靈書院傾圮日久於乾隆五十一年經署本州廣玉及知本州楊芳燦相繼於城東南

文廟傍建修奎文書院俱有文卷存案其膏火之費有官建店房一所市舖三十間每月收租錢九千

靈州誌蹟

卷一

二十二

文又有官及閭屬士民捐存錢壹千肆百捌拾肆千俱交當商營運每月按一分五厘起息其租息錢文俱着本城監生賀人傑經營

廣揚二公各有碑記一篇見藝文

社學五

本城一所 吳忠堡一所 大沙井一所

惠安堡一所 花馬池一所

每歲脩脯銀四十四兩本官捐墊



壇廟所以報享也坊表所以定居也市集所以鳩  
貨也橋梁津渡所以濟往來便行旅也至於遊觀  
之境足以暢豁性靈疏導壅鬱亦一方之勝概也  
俱不可以不誌今合為一集以便觀覽焉

壇廟

社稷壇

在城西門外

先農壇

在城東門外

風雲雷雨壇

在城南門外

靈州誌蹟 卷一

厲壇

在城北

八蜡廟

在城南門外

文昌閣

在城東南

忠孝祠

在城東南

節義祠

在城東南

關帝廟

在城正南

城隍廟

在城西北

旗纛廟

在城南今廢

南鼓樓

在大倉前



東鼓樓 在州署東

馬神廟 在城東北

千佛寺 在城東

華藏寺 在城北

卧佛寺 在城東南

白衣寺 在城西

水洞菴 在城西 即州城內水所出之處今洞廢

牛首寺 在城西南有詩見藝文

一百八塔寺 在峻口山

靈州誌蹟 卷一

龍王廟 在南郭門外

永寧寺 在城北門外

東塔鎮海寺 在城東門外

舊志載

永靜寺 在城內

興教寺 在城內

石佛寺 在城北

康濟寺 在州堡

宏福寺 在後街



真武觀

在城南

三賢祠

在州內祀總督楊一清王瓊河西

道張九德今皆廢

坊表

翠挹蘭峰河東挺秀坊在西門外乾隆十三年知

州劉輝社建

城隍廟坊在城北街康熙丙申年建

輿梁橋坊在南門外康熙四十年中路同知祖良

禎建

靈州誌蹟

卷一

二十五

欽賜烈婦坊二

吳李氏坊在城西南街乾隆三十六年建

張蕭氏坊在磁窑寨堡外乾隆元年建

旌表節婦坊五

監生朱士挺之妻姚氏坊在城東

生員王式間之妻李氏坊在城南

民人文運祥之妻魏氏坊在城南

民人許昭之妻周氏坊在城西

民人馬健明之妻蔡氏坊在韓家橋



市集

州城米糧市一處

吳忠忠營二堡市集各一處每逢三六九日交易

金積胡家二堡市集各一處每逢二五八日交易

秦壩漢伯二堡市集各一處每逢一四六日交易

惠安堡市集一處

大水坑市集一處每逢三六九日交易

橋梁四

哈達橋 去城東二里

靈州誌蹟

卷一

興梁橋 去城南二里

韓家橋 去城南十五里

黑渠橋 去城北三里 以上橋皆在秦渠上

查舊志尚有通濟定期等橋

津渡三

寧河 馬頭 高崖

名勝

寧河勝覽 黃河東渡築臺高五丈餘登眺於上則河山景物舉在目中

晏湖遠眺 晏湖古為水澤臺崩似寧河而山環繞水碧沙明足以豁目



牛首飛霞

牛首山在中斷界山形突兀上有古刹時現祥霞

龍泉噴玉

泉在金積山其水清冷可掬滾滾若珠玉傾瀉

高橋春柳

城南有橋以形高故名焉自蕭關北荒沙無際至是忽睹林木陰森柳更條暢

若屏然相傳塞北江南蓋以此云

滴水秋梧

水日石洩若倒囊出珠下有梧相枝柯繁茂亦可觀

青峽曉映

即古之青崗峽旭日方升水光山色映若圖畫

黃沙夕照

成東之山半為沙礫每晴日夕時蒼黃遠映光照人目

章州四勝

蠡山翠翠

東湖春漲

西嶺秋葦

石關積雪



靈州誌蹟

風俗物產誌第七

蓋百里不同風十里不同俗善為政者因其俗而均節之則剛柔偏直咸歸中正故曰修其教不易其俗齊其政不易其宜不其然歟靈州風俗頗為近古其間如稷稻並炊尊卑異食一節尤徵孝弟敬愛之意采風者所樂道也夫羣黎萃處漸染無恒視長民者導之何如耳今取其節序禮俗可觀采者錄為一編而以物產附之主持風教者可以慨然興矣

風俗

疆梗尚氣重然諾敢戰鬪

金史夏國贊

雜五方尚詩書詞翰

朔方舊志

重耕牧閑禮義

朔方舊志

靈州尚耕牧工騎射信機鬼

舊志

富強日倍禮義日新

新志

後衛務耕牧習射獵

舊志

居室惟公署宦族覆瓦民家皆板屋覆以土猶秦風之遺中堂供先祖或懸佛像



食主稻稷間以麥貧者飯粟中人之家恒以一釜  
並炊稻稷稻奉尊老稷食早晚

衣布褐冬率裘迨世中家以上多襲絺綺矣女服  
尤競鮮飾

四時儀節元旦燃香燭祀真宰拜先祖長幼畢拜  
賀出賀姻友嘗預為三日炊曰年飯四日乃更炊  
坐米四日三鼓爇炭或鐵投醋盆繞屋行道吉語  
除不祥及大門外覆之曰醋壇又曰送五窮  
五日拘忌非至戚不相往來

新歲必擇吉持紙燭就郊外喜神方迎拜然後遠  
行作百事皆無禁忌

七日食餅麵擊銅器相叫呼為招魂

上元食團子前後三夜街市皆燃燈祀天神祝  
十六夜民戶婦女相携行坊衢間曰遊百病亦曰  
走橋經官禁近稍減

二月上丁後至清明擇吉日具牲酒載紙標為墓  
祭各修治先塚

清明日挈榼提壺相邀野田或梵刹間共遊飲曰



踏青插柳枝戶上婦女並戴於首

三月二十八日焚香東嶽廟前後三日並於東門外陳百貨相貿易老幼携持遊觀填溢孟夏八日西門外土塔寺為洗浚會亦如之

端午貼符戶插菖蒲艾葉飲雄黃酒喫角黍閩中並以綠絲作符剪艾虎相饋送

五月十三日競演劇祀 闕聖先日備儀仗迎神前列社火周遊城中望日記 城隍並於廟陳百貨為貿易

七夕閨人亦有以針工茗菓作乞巧會者

孟秋朔至望亦擇吉祭墓曰上秋墳墳地者於望日設祭於家

中秋祀月作月餅陳瓜果比屋皆然餅筵瓜果皆遍衢巷

重陽食糕飲菊酒亦有為登高會者

孟冬之朔祀先祖薦湯餅

仲冬長至日記先祖家人姻友相拜賀切肉雜粉腐為羹和酒啜之曰頭腦酒以冬至一陽生取



事有頭腦意

臘月八日煮粥雜以豆肉曰臘八粥是月初旬取  
水釀酒曰臘酒

廿三日以雞酒餅飴之屬祀竈神曰送竈雞陳而  
不殺至除夕始薦熟曰接竈

歲暮貼春聯桃符為餅餌酒食相饋送

除夕祀先祖拜尊長燃香燈鳴爆竹飲酒守歲分  
錢與卑幼曰押歲閨中以棗柿芝蔴及雜果堆滿  
盞著茶葉奉翁姑及尊客曰稠茶女筵以為特敬

新婦拜見舅姑針工外尤重此多者至百餘盞計  
其費一盞數十錢相傳始於明王府至今不能變  
云

婚禮媒妁既通必取男女年庚對合無忌尅乃定  
世家多不拘定禮用綵幣鐲鑲之屬貧者梭布簪  
珥女家以冠佩相答婚期既定男家必備禮盒酒  
果請賓送期於女家曰通信蓋古請期之遺既復  
擇吉日為茶菓具羊酒並衣物首飾送女家曰下  
聘亦納徵之遺意也先期一日女家以妝奩送男



家曰鋪床至日男家又以大蒸餅並菓盤隨綵輿  
赴女家曰催粧請女賓為新婦插花冠笄曰冠帶  
女家亦請女賓隨綵輿至男家曰送親娶多用綵  
轎鼓吹貧者以車世族之家間亦有奠雁親迎者  
新婦三日拜見舅姑贄以針工同室長幼各拜見  
曰分大小

冠禮多不行婚禮納徵時女家以冠履衣物相答  
必有梳篦鏡匣曰冠巾蓋亦存其意云  
喪禮俗最重衰經冠履多依古制三年服雖既葬

麻巾衰衣必大祥後始易期功以下近亦多就簡  
便不如古禮七日行大殮禮親戚多會吊 將葬  
先期訃親友前一日各以酒盒奠儀往祭喪家脩  
酒食相酌多者至數百人賻奠之儀恒不足為銘  
按費每進食飲孝子必出稽顙謝禮尤煩瑣羸弱  
者至憊不能支中衛靈州俗尤尚送葬男女或數  
十百人喪家為脩酒食車乘力不能辦者或至置  
殯數十年不能舉相傳明季近邊各堡黠虜常伺  
人葬出劫衣物故送葬者皆請姻戚為之脩今太



平已百餘年習而不改轉成弊俗矣

祭禮世族之家有宗祠家廟會祭多用羊士民多祭於寢用恒品隨豐儉無定數春祭墓夏無祭秋以七月望亦有墓祭者冬祭以十月朔冬至及歲暮祭必備物懸遺像其禮尤重

余輯靈州風俗誌至於喪葬一條不禁掩卷太息也曰俗之弊也久矣古者喪禮自大夫士以下或三月而葬或踰月而葬皆有常期近世靈州士族每有停柩數年者問之其人或曰年命不利或曰

親死而遽委之野心不忍也夫以不忍之心而言行道之人皆弗忍也先王制禮顧獨忍乎哉誠以人死則體魄屬陰陰性喜靜故死者以即土為安且古禮親死則人子倚藿占塊不敢預外事今士大夫停柩於家果能倚藿占塊一如古禮乎抑猶未免飲食出入如恒人也夫對親之柩而飲食出入如恒人此真孝子所不忍也忍於對親之柩飲食出入如恒人而顧不忍葬其親其不忍抑何悖也又况雞犬之震驚室宇之焚燬凡人世不可意



料之事孝子之心其惕息危懼更有不忍言者乎  
若夫屋命不利之說真野夫俗子之談為大雅所  
不道而欲藉親喪以求吉者尤孝子之所不忍也

物產

舊志賀蘭山出鉛礬麥梁山出鉄今皆不見麻碧

瑛馬牙鱧紅花無藍靛鐵磁器物

穀之屬 稻 糜 大麥 小麥 稷 羊眼豆

豌豆 綠豆 黑豆 黃豆 青豆 紅豆 扁

豆 蠶豆 胡麻 青稞 秫

靈州誌蹟 卷一

三四

菜之屬 芥 芹 葱 韭 胡蘿蔔 白蘿蔔

菠稜 芫荽 蒿巨 蔓菁 甘露子 白花菜

沙葱 白菜 沙芥 西瓜 甜瓜 絲瓜

黃瓜 冬瓜 南瓜 菜瓜 香瓜 茄蓮

地椒 葫蘆 滑菜 茗蓬 刀豆 豇豆

茶豆 茄 蒜 莧 芥 藕

花之屬 牡丹 芍藥 春海棠 薔薇 石竹

雞冠 萱草 玉簪 罌粟 小竹 戎 黃蜀

葵 百合 鳳仙 珍珠 山丹 菊 荷寶象



果之屬 杏 桃 李 梨 菱 藕 芋 奈

葡萄 林檎 櫻桃 秋子 胡桃 花紅 棗

白沙 沙棗 桑椹 酸棗 荔枝 杏桃

木之屬 松 栢 槐 椿 榆 柳 白楊

藥之屬 荆芥 防風 旋菴 枸杞 桑白皮

柴胡 甘草 黃芪 遠志 牛旁子 地骨皮

麻黃 黃芩 紫蘂 苦參 鬼絲子 寒水石

瞿麥 茴香 知母 升麻 藟蘆巴 天仙子

大戟 扁蓄 秦艽 黃精 三稜草 青皮香

靈州誌蹟

卷一

三五

百合 茵陳 葶藶 血竭 千金子 車前子

薄荷 菖蒲 木瓜 青蘘 鎖陽

禽之屬 鷓鴣 鴈 鶻 鷄 鶩 鴨 鷓 鴒

山雞 半翅 馬雞 天鵝 鶴 鶻 雁 鷓鴣

鷓鴣 鴛鴦 鷓鴣 鸚鵡 白鴿 鳧 鴨嘴

黃豆 倉庚 喜鵲 烏鴉 鴉 鳩 隼 雀

獸之屬 馬 駝 牛 羊 騾 驢 豕 虎

狼 鹿 麋 鹿 土豹 野馬 羴羊 青羊

黃羊 野豕 夜猴兒 艾葉豹 獾 狐 沙



狐 野狸 熊 豺 黑鼠 黃鼠

鱗之屬 鯉 鯽 鮎 鱧 沙魚 鱒 白魚

石魚 鮒

介之屬 鼈 蚌 螺

按風俗寧夏五色皆同中衛靈州平羅地近邊畜  
牧之利尤廣其物產最著者夏朔之稻靈之盪靈  
州貢有紅藍甘草菴蓂代赭白膠青蟲雕鷗白羽  
麝野馬鹿草野豬黃吉莫鞞韃毡庫利赤裡馬策  
印藍黃牛臆明制貢紅花洎馬紅花土實不產舊

靈州誌蹟 卷一

三十六

志稱歲役千夫貢只五百斤不解所由嘉靖初給  
事張紳始奏罷之

本朝寧夏無土貢尤見

體恤邊方之意云



余讀唐書地理志見靈武所隸諸州有鷄鹿燭龍之屬迴樂燕然之號曰是安在按籍以求則從從不可見矣及輯州誌采錄舊籍所載參諸故老所傳聞則之將想像髮鬢而如或見之夫古蹟之荒涼成沒久矣風沙擊壓之區昔時之井竈猶存尚或可履行以訪求其境矧夫墻垣城郭儼然聚廬舍而處者乎好古之士所宜深考焉

古蹟

靈州誌蹟

卷一

三七

長城 隋開皇五年司農少卿崔仲方發丁男三萬於朔方靈武築長城東距黃河西至綏州南至勃山嶺綿歷七百里六年春復令仲方發丁男一餘萬人修長城

受降城 唐景龍二年朔方總管張仁愿築

降城新唐志東城南直榆林中城南直朔方西北直靈武三壘相距各四百里其北皆大磧也唐志曰東受降城東南至朔州四百里西南渡河至勝州八里西至中受降城三百里本漢雲中郡地



中受降城西北至天德軍二百里南至麟州四百  
里北至磧石五百里本秦九原郡地在榆林漢更  
名五原西受降城東南渡河至豐州八十里西南  
至定遠城七百里按此則去寧夏極為遼遠姑因  
舊志列之以備考

靈武臺 唐天寶十五載安祿山反元宗避賊入  
蜀至馬嵬父老遮道請留上命太子宣諭之父老  
曰至尊既不肯留某等願率子弟從太子東破賊  
取長安若殿下與至尊皆入蜀中原百姓誰為之

主湏臾聚至數千人太子不可涕泣跋馬欲西建  
寧王俠與李輔國執鞋諫曰逆胡犯關四海分崩  
不因人情何以興復殿下不如收西北之兵召郭  
李於河北與之并力東討逆賊削平四海使社稷  
危而復安宗廟毀而復存掃除宮室以迎至尊豈  
非孝之大乎廣平傲亦勸太子留父老共擁太子  
馬不得行乃使傲白上上曰天也分後軍二千人  
及飛龍廐馬從太子仍諭之曰太子仁孝可奉宗  
廟汝曹善輔之又諭太子曰汝勉之勿以吾為念



西北諸胡吾撫之甚厚汝必得其用又宣言欲傳位太子太子不受太子至平涼未知所適建寧王倓曰殿下昔為朔方大使將吏歲時致啟倓畧識其姓名今河西隴右之衆皆敗降賊父兄子弟皆在賊中朔方道近士馬全盛裴冕衣冠名族必無二心速往就之衆曰善通夜馳三百餘里至彭原太守李遵出迎獻衣及糗糧遂至平涼閱監牧馬得數萬匹又募軍士得五萬人軍勢稍振議出塞關趣豐州朔方留後杜鴻漸水路運使魏少游即

度判官崔漪盧簡李涵相與謀曰平涼散地非屯兵之所靈武兵食完足迎太子至此北收諸城兵西發河隴勁騎南向以定中原萬世一時也會河西司馬裴冕亦至平涼亦勸太子之朔方鴻漸自至平涼迎太子說興復之計即上軍馬招輯之勢少游治宮室幃帳皆似禁中飲膳備水陸庚辰次豐寧軍七日至靈武辛酉太子即位於靈武尊上為太上皇見少游所治悉命撤之大赦改元以杜鴻漸崔漪知中書舍人事裴冕同平章事



靈州鎮 亦唐鎮宋靈州夏順州在府南六十里  
與定遠保靖咸有遺址

保靖廢縣 在府東南靈州界隋開皇十一年置  
宏靜縣唐屬靈州後改安靜縣至德元年又改保  
靖宋咸平四年李繼遷改懷遠縣府志在鎮南六  
十里

靈州故城 在州北地里志惠帝四年置唐曰靈  
州天寶初改靈武郡宋初改朔慶軍元復曰靈州  
迴樂廢縣 輿地廣記云在靈州故城之內唐肅  
宗即位於此

薄骨律城 在州西南後魏書太平真君五年刁  
雍為薄骨騮鎮將九年表求造城詔名曰刁公城  
水經注云城在河渚上赫連果城也但出戎方語  
不究城名訪諸耆舊咸言赫連之世有駿馬死此  
取馬色以為邑號故曰城為白口騮韻轉之謬遂  
仍今稱也

富平廢縣 在州西南漢置屬北地郡永初五年  
徙郡於池陽永建四年又徙馮翊自是故縣遂廢



温池廢縣 在州東南唐神龍五年置屬靈州縣  
側有鹽池五代時廢今惠安堡北至州一百八十  
里產鹽

燕然廢州 唐開元初置寄治迴樂縣界至德後  
廢

韋州廢城 在州東南西夏置宋史嘉祐六年夏  
人改韋州監軍司為祥祐軍後又改靜塞軍元廢  
鹽州廢城 舊志東南至靈州三百里今花馬池  
營是隋置蓋州郡西魏置西安州元和志貞觀二

靈州誌蹟

卷一

四十一

年平梁師都復置蓋州新唐志貞元三年沒於吐  
蕃九年復城之有蓋州府又有保塞軍宋咸平以  
後入西夏仍曰蓋州

興昌廢郡 在靈州東北西魏置臨河郡開皇元  
年改曰興昌三年廢新唐志靈州黃河外有新昌  
軍即此

白池廢縣 南至靈州九十里景龍三年置近於  
白蓋池故名本興寧縣宋陷於西夏遂廢

五原廢縣 漢置胸行縣屬北池郡西魏改五原



郡正統九年建興武營五原西按縣在今榆林界  
丁吳城 東觀記丁吳城在靈州北後漢永初六  
年漢陽賊杜季貢降於滇零羌別居於此任尚破  
之

豐寧城 新唐志靈州有武畧河間保靜鳴沙萬  
春五府豐寧保寧等城

鐵角城 與益州相近亦名三角城明初為官軍  
屯戍處

臨河鎮 宋置巡檢使管蕃部後陷於夏

靈州誌蹟 卷一

漢御史尚書光祿三渠 唐大歷十三年虜酋馬  
重英以四萬騎寇靈州塞御史尚書光祿三渠以  
擾屯田常護光逐之

唐光祿渠 即漢光祿渠也廢塞歲久大都督長  
史李聽復開決以溉屯田

唐特進渠 地里志靈州迴樂有特進渠長慶四  
年七月詔開溉田六百頃

地宮 明慶王建以避暑者在韋州府內





長白坡東氏豐

捐廉修輯

靈州

志

嘉慶戊午季冬





古者計丁授地而地無曠土後世按地課丁而丁無正額丁之額仍以地為額也靈州壤鄰大漠地之沙鹼者居多然渠水所灌率宜麥稻而斥鹵之地復產鹽以補丁稅之不給其餘山硝瘠田征額尤從其薄夫務隱漏嚴督促有司之職也而制經費課殿宸亦

國家之法也於催科之中寓撫字之意是在善為政者  
四劑爾今錄丁稅賦額為一編而以歷代

蓋法茶法綴其後俾觀者得裁別焉

丁稅賦額

原額地三千四百一十六頃九十四畝三分八厘

額外牛息糜糧四百五石一斗九升

在於特叅貪酷不職等事案內收節年開墾入額地六十七頃六十四畝三分二厘

又養廉牛棋湖田等地六十九頃四十七畝八分

四厘

除歷年勘報河冲沙壓地四百三十頃七十五畝



八分一厘

雍正九年在於酌請分疆定域案內請設花馬池  
州同分管熟地八百二十二頃八十五畝二分六  
厘除牛息糜糧四百五石一斗九升

今實額地二千三百頃四十五畝四分六厘二毫

內

上則全田

一百三十一頃八十四畝零每畝徵糧一斗  
二升草四分六厘三毫銀八厘八絲五忽

中則全田

五百七十四頃四十六畝零每畝徵糧一斗  
二升草四分六厘三毫銀三厘一毫八絲

中全田

八頃每畝徵糧一斗二升草四  
分六厘三毫銀一厘八毫一絲

上民田

三百六十八頃七十四畝零每畝徵糧  
八升草三分二厘銀八厘八絲五忽

中民田

二百九十五頃二十七畝零每畝徵  
糧八升草三分銀三厘一毫八絲

土兵田

五頃九十九畝零每畝徵糧八升  
草三分三厘銀三厘一毫八絲



一則沙田

五十五畝零每畝徵糧二升徵銀七厘八絲五忽

二則沙田

四十三頃四十八畝零每畝徵糧三升銀二厘一毫八絲

一則山田

一十三頃六十一畝零每畝徵糧三升三合九勺七抄一撮七圭八粟銀二分六厘九毫七絲二忽八微  
一織四塵三渺

二則山田

一十八頃七畝每畝徵糧三升三合銀一分八厘一絲一忽六纖八塵七渺

靈州誌蹟

卷二

三

三則山田

二百八十三頃二十四畝零每畝徵糧七合銀七毫六絲八忽七微六纖七塵七渺一漠

沙薄田

一百四十七頃四十五畝零每畝徵糧三升銀一分三厘四毫四絲八微五塵九渺八漠

硝全田

一百四十二頃九十二畝零每畝徵銀一分五厘七毫二絲

硝全田

五十二頃三十三畝零每畝徵折糧草銀一分二厘五毫四絲北畝銀一厘內有三十畝每畝徵銀九厘七毫八絲五忽折糧草銀地畝銀並同



硝鹼減田

四十一頃二十六畝零每畝徵銀一分三厘  
三毫五絲七忽內有二十一頃八十二畝零  
徵硝銀一分二厘五毫四  
絲地畝銀八毫一絲七忽

硝鹼田

五頃五十六畝零每畝徵折  
糧草銀一分二厘五毫四絲

硝田

三頃二十畝零每畝  
徵銀一分二毫四絲

硝鹼民田

二十二頃一十四畝零每畝徵地畝銀一厘  
折糧草銀一分二厘五毫四絲內有二頃六

靈州誌蹟

卷三

四

七十畝零每畝徵地畝銀七厘  
八絲五忽折糧草銀並同

硝民田

二十五頃八十三畝零每畝  
徵銀一分二厘五毫四絲

原額更名地四百八十九頃六十二畝內

全田

一百四頃四十五畝零每畝徵糧  
斗二升草三分銀三厘一毫八絲

蔗穀上田

三十三頃六十三畝零每畝徵  
糧一斗二升銀二厘一毫一絲

蔗穀中田



一百三十四頃五十七畝零每畝  
徵糧七升五合銀二厘一毫八絲

萊穀下田

一十三頃八十四畝零每畝徵  
糧五升五合銀二厘一毫八絲

一則灘田

九十一頃四十二畝零每畝  
徵糧八升銀二厘一毫八絲

二則灘田

二十九頃四十七畝零每畝徵糧六升  
四勺四抄三撮七圭銀二厘一毫八絲

口糧田

九頃八十四畝零每畝徵糧  
七升五合銀三厘一毫八絲

銀田

十頃每畝徵銀  
三分三厘一毫

硝田

四十二頃三十五畝零每畝  
徵銀一分三厘五毫四絲

硝全田

一十三頃九十畝零每畝徵銀一分五厘  
七毫七絲七忽二纖四塵一渺四漠六埃

半硝田

六頃六畝零每畝徵銀六厘二毫  
七絲五忽四微三纖八渺八漠

以上共實地二千七百九十頃七畝四分零



共應徵夏秋糧一萬八千二百二十一石七斗七  
升九合五勺內除沖壓地畝奉文停徵糧六百二  
十三石三斗九升四合七勺實徵糧一萬七千五  
百九十八石三斗八升四合八勺內  
小麥二千五百二十八石二斗四升五合二勺  
豌豆五千六百一十三石一斗五升一合一勺  
青豆五千三百四十五石二斗七升九合三勺  
粟米四千一百一十一石七斗九合二勺

共應徵穀草六萬一千二百七十二束五分六厘

共應徵地畝並折糧草銀六百一十三兩一錢三  
分二厘

九厘銀八百七十兩五分八厘

銀田布價銀二百一十四兩四錢四分二厘

牛具銀四十四兩一錢八分二厘

原額身差人丁雍正五年在於請做以糧代丁案  
內奉

旨通省以糧載丁按照實徵地畝銀兩均載丁銀每糧  
一石均載丁銀一分六厘一絲五忽共徵丁銀二



百一十六兩七錢五分七厘

以上共徵銀一千九百五十八兩五錢七分一厘  
內除冲壓地畝停徵銀一百四十二兩五錢六分  
九厘實徵銀一千八百一十六兩二厘州庫存留  
自支銀二百五十五兩二錢四分

一歲支各壇廟宇祭祀銀三十二兩七錢二分  
又支惠安堡鹽捕通判俸銀三十二兩各役工  
食銀共三百二十兩餘銀四十六兩五錢二分  
係裁汰鹽課大使各役原額俸工銀四十三兩

五錢二分空缺鄉飲銀三兩文武舉人每逢會  
試每名應領盤費銀五兩五錢二分四厘

起運銀一千五百六十兩七錢六分二厘

花馬池州同分管靈州

原額地八百九十五頃五畝三分八厘內

民地八百八十九頃一十五畝三分八厘每  
畝徵黃米七合屯田五頃九十畝每畝徵青  
豆三升

應徵糧六百四十一石一斗七升七合七勺內

黃米六百二十二石四斗七合七勺



青豆一十七石七斗

應徵丁銀一十兩一錢八分三厘

鹽法

寧夏鹽捕廳靈州花馬小池產鹽地方週圍三十  
六里零池設有壕墻按年疏築限隔內外

舊鹽井二百眼額墾夫二百名徵紙價銀五百二  
十二兩三錢四分工食銀二千四百五十七兩六  
錢撈鹽六萬一千四百四十石引六萬一千四百  
四十張徵課銀一萬三千二百四十兩三錢二分

靈州誌蹟

卷二

八

又於雍正六年在鹽井增添案內查出新井二百  
二眼共四百二眼額墾夫四百二名雍正十三年  
在署員內成效已著案增引六千張共新舊引六  
萬七千四百四十張原額每引徵銀一錢一分五  
厘五毫自康熙十五年至二十五年在於量增鹽  
課各案內適有加增除康熙二十年

恩詔豁免過閩增課二十五年部議停徵五分加增二  
案外現額每引徵銀二錢一分五厘五毫共徵課  
銀一萬四千五百三十三兩三錢二分按年解布



政司奏銷額產鹽六萬七千四百四十石在於平慶兩府各廳州縣並寧夏河東各營堡行銷

靈州所屬

吳忠等堡一十九堡原額引二千三百八十六張額徵課銀五百一十四兩一錢八分三厘

附歷代鹽法

周禮有鹽人之職漢置鹽鐵官蓋政之設舊矣而寧夏蓋池至唐始見於史

唐食貨志載鹽州五原有烏池白池茂池細項池

靈州誌蹟

卷二

九

靈州有溫泉池兩井池長尾池五泉池紅桃池迴

樂池宏靜池會州有河池三州皆輸粟以代鹽

周廣順二年勅令慶州權鹽務今後每有青蓋一

石抽稅錢八百八十五陌蓋一斗白蓋一石抽稅

錢五百八十五陌蓋一升此外不得別有邀求

宋至道末凡禁榷之地官立標識候望以曉民其

課蓋通商之地京西則京兆鳳翔府固華耀乾商

涇原邠寧儀渭廊坊丹環慶秦隴鳳階成州保安

鎮戎軍按宋初蓋莢只聽州縣給賣初未嘗有客



鈔也雍熙二年令商人所在納銀赴京請領麥引  
蓋邊郡入納筭請始見於此端拱二年置折中倉  
令商人輸粟京師蓋在京輸粟筭請始見於此天  
聖七年令商人推貨物入納錢銀蓋在京入納錢  
銀筭始見於此天聖八年以兵部員外郎范詳鈔  
法令商人就邊郡入錢四貫八百售一鈔至解池  
請蓋二百斤任其私賣得錢以實塞下省數十郡  
搬運之勞行之既久蓋價時有低昂又於京師置  
都蓋院陝西轉運司自遣官主之京師食蓋斤不

足三十五錢則飲而不發以長下價過四十則大  
發庫蓋以壓商利使蓋價有常而鈔法有定行之  
數年人以為利

元昊時請售青白蓋宋以其味佳值賤入中國則  
擾邊且阻解池絕國用遂不許

元各州縣戶口額辦蓋課運官召商發賣惟陝西  
運司官每年預期差人分道齎引遍散州縣陝西  
食蓋之戶談辦課二十萬三千一百六十四錠肉  
鞏昌延安等處認定課鈔一萬六千二百七十一



錠慶陽環縣鳳翔興元等處歲辦課一萬七千九百八十五錠其餘課鈔因關陝旱饑民多流亡至順三年鹽課十分為率減免四分行之三載尚多虧負時至元二年監察御史帖木兒不花及廉訪使胡通奉疏陝西百姓許食解鹽地遠腳力艱澁今後若因大河以東之民分定課程買食解鹽大河以西之民計日攤課任食韋紅之鹽則官不被擾民無蕩產之禍矣且解鹽結之於風韋紅鹽產之於地東鹽味苦西鹽味甘又豈肯舍其美而就

靈州誌蹟

卷二

十一

其惡乎使陝西百姓一概均攤解鹽之課令食韋紅之鹽則監吏免巡禁之勞而民亦受惠矣因命陝西行省官及李御史運司同知郝中順會鞏昌延安興元奉先鳳翔邠州等官與總帥汪通議俱稱當從帖木兒不花胡通奉所言限以黃河為界陝西之民從便食用韋紅二鹽解引依舊西行紅鹽不許東波獨郝同知鹽運司每歲辦課四十五萬錠陝西設辦二十萬錠今止認七萬錠餘十三萬錠從何處恢辦議不合而設戶部遂參照至順



二年例以涇州白家河永為定界聽民食用仍督  
所在軍民官嚴行禁約勿致紅韋二鹽犯境侵課  
中書省如何議行之

洪武間靈州鹽課司歲辦靈州二百八十六萬七  
千四百七斤

萬歷六年歲辦寧夏鎮年例銀一萬三千三百四  
十二兩

成化二十二年移前城批驗所於紅德城堡令黑  
城乳溝二路並車俱抵慶陽府城市卸載商人同

靈州誌蹟

卷二

十二

店主執引驗過赴行鹽地方貨賣畢引日付店主  
銷繳

宏治二年令靈州鹽課司行鹽地方仍舊於平涼  
靜寧隴德慶陽環縣等處

嘉靖八年議准大池增三萬三千六百二十六引  
小益池增二萬二千四百一十七引每引銀二錢  
五分卽引銀一錢共一萬九千六百一十五兩送  
平涼府收貯專備祿糧 十四年題准靈州小益  
池額益三千一百零五引專供花馬池一帶修邊



支用其加增鹽三萬引召商開中三邊輪流買馬  
或接濟軍餉支用 三十四年奏准陝西行鹽地  
方每鹽二百斤為一引每引收銀四錢五分西鹽  
三分搭配漳鹽八分俱聽分守隴右道監理收銀  
年終解送花馬池營管糧衙門防秋兵馬支用  
隆慶五年題准花馬池大小二池鹽每引照鹽四  
倍河東令各商報納每引增銀一錢二分共五錢  
二分其引引銀一錢二分西路斗底銀一錢五分  
共增課銀七千有奇

成化九年差御史一員巡視河東運司並陝西靈  
州大小二池鹽課其陝西河南所屬分巡各道官  
帶鹽法者悉聽節制 慶陽府每歲委佐貳官一  
員兼支靈州鹽課司商人納馬官稅及民間食鹽  
舊志原額鹽三千二百餘引宏治九年延寧二鎮  
輪招馬匹尋仍奏革正德初總制楊一清奏擬河  
東運司例每引收銀一錢五分課增五萬二千引  
時戶部又奏改易芻糧其引與淮浙同在南京戶  
部關支劉瑾專恣又令北京戶部亦造引板於是



真贖不分新故俱滯瑾既敗而奉詔裁革奸深弊  
固猶不能禁總制劉天和巡撫楊守禮徽會事孟  
憲議照寧夏小鹽池乃天生自然之利窮邊軍餉  
之需何先年人人願中以為奇貨可居今日報納  
無人視之以為陷阱皆緣舊引未清新鹽阻滯邊  
方雖有益池之設軍需畧無分文之裨嚴法清查  
其弊始革巡撫張潤尋又奏復朔城批驗鹽法稍  
通然課猶未甚今則增至淮引八萬五千浙引十  
萬九千五百夏之邊需故取足於屯糧歲有定數

不足則請給帑銀嘉靖年間請發內帑不敷乃派  
淮浙益引以充急用或淮多浙少或淮浙相均一  
視歲計盈縮量派嘉隆之際始定以淮四浙六官  
價淮引五錢浙引三錢五分照派定糧草輸足各  
赴淮浙運司守支淮引微有奇贏浙引虧折太甚  
加以開名不時高頭高估諸商遂稱困矣萬歷初  
巡撫羅鳳翔寬減芻糧斗頭商困少解迨後內瑞  
寓於江南驗引專掣內商賄買夾帶一引小鹽此  
實既開邊商益引難售資斧虧折困苦如水益深



又云二十年兵變開城糧餉缺乏巡撫周光鎬題  
增淮鹽八萬引官價每引五錢長蘆鹽二萬引官  
價每引二錢五分共筭銀四萬五千兩隨同額鹽  
招商輸納糧草以備軍興庶幾定為經制不意三  
十七年復將前項鹽引銀兩停發改濟別邊後巡  
撫黃嘉善題討暫准三萬兩接濟又巡撫崔景榮  
題討僅歲復一萬而終無濟於那借巡撫楊應聘  
再題討復疏下部未覆

按鹽之在三山兒者曰大鹽池在故鹽池之西

北者曰小鹽池其他名亭羅等池最多皆分隸  
大鹽池其鹽大都不勞人力因風自生殆天產  
以資邊需者也又地里志懷遠縣有鹽池三去  
城北各三十里俱有池一其產不多官亦不禁  
不知於古何名河東邊外有花馬紅柳鍋底三  
池以邊外煮

茶法

寧夏茶引原額四百道每引額茶一百一十四斤  
交課銀三兩九錢順治九年招商承辦寧夏商額



引二百五十道靈州商額引一百道中衛商額引  
五十道嗣因食茶人少消售維艱康熙時寧夏商  
告繳引八十道靈州商告繳引三十道

靈州現在當舖五十座歲收課銀二百五十兩

靈州經管

本城稅局一處歲額正項銀二百二十六兩

橫城口稅一處歲額正項銀二兩七錢六分

花馬池口稅一處歲額正項銀一十二兩一錢二

分八厘

吳忠惠安同心城興武營各堡收課銀二百五十

兩

牙帖歲納銀三十兩四錢

田房契稅歲無定額每價銀一兩照例收稅銀三

分



太史公作河渠一書曰甚哉水之為利害也然則脩濬有方斯人享其利一或失之而潰決為虞亦其勢然與靈州舊有秦漢二渠凡臨城上腴諸田悉沿渠上下以資其灌溉之利每歲春濬民間自脩夫料其良法美意前人經畫備矣然地勢之高卑隄捍之厚薄蘆口之廣狹往往隨時改易必長吏親為營度而以時稽覈其間使猾胥情民無由滋弊庶幾渠水所經民享其利而不虞其害也夫

水利源流

史記河渠書自武帝築宣房後朔方西河河西皆引河以溉田又匈奴傳云驃騎封狼居胥山漢度河自朔方以西至今居住往通渠置田官吏率此寧夏河渠所由昉也西羌傳又云虞詡奏復朔方河西上郡使謁者郭璜激河浚渠為屯田則開漢渠者虞詡郭璜矣唐渠不見開鑿由始唐書李聽為靈州大都督長史於境內復故光祿廢渠以溉田寧夏在唐時為懷遠縣靈州凡唐書所言靈



州皆兼寧夏五原有光祿塞漢光祿勳徐自為所築渠名光祿意亦自為所開然則今之唐渠或亦漢舊渠而後浚於唐自吐魯番傳載虜酋馬重英寇靈州塞漢御史尚書光祿三渠皆謂漢渠惟靈州有特進渠地理志云長慶四年詔開而亦不著其人又後魏刀雍請自富平西三十里有艾山鑿以通河富平即寧夏地西三十里今有廢渠疑即艾渠宋劉昌祚圍夏城城人決黃河七級渠以灌營元和志言千金陂在靈武縣北四十二里漢渠

在縣南五十里從漢渠北流四十餘里始為千金陂其左右又有胡渠御史百家等八渠宋楊瓊之稱其開渠溉田今皆不知其處元郭守敬董文用脩復唐宋漢延各渠更立棟堰今漢唐二壩是也舊制以薪木明僉事汪文輝易以石工益固

國朝康熙四十七年水利同知王金臣開

大清渠雍正四年又

欽命侍郎通智單疇書等開惠農渠與漢唐並列河渠之利益廣靈州中衛各有渠舊志元張文謙疏夏



靈應理鳴沙四川正渠十支渠大小共六十八然  
大抵唐漢故跡文謙為增治疏濬者居多不自元  
始也

秦渠自州屬青銅峽開口至州城北門外洩入澗  
河延長一百二十里正閘二空曰秦閘尾閘曰黑  
渠閘大支渠一十二道灌民田一十一萬七百畝  
零康熙時叅將李山重修俱以石甃底長百餘丈  
歲首夫料無算

漢渠自青銅峽秦渠上流開口至胡家堡洩入澗  
靈州誌蹟 卷三 五

河延長一百里正閘二空曰漢閘其後河勢偏西  
常苦無水康熙四十五年中路同知祖良貞改深  
閘底又增長迎水埽水乃足用康熙五十二年同  
知祝兆鼎重修東岸以洩山水冲决之害大支渠  
九道灌田一十二萬五千八百畝零每歲春濬俱  
係民間自備夫料



南北滂河記

李培榮

平定州人  
乙未進士

朔方水利舊矣蓋觀其經緯布置之宜而歎古之君子其利民也溥其慮患也周嘉慶己未春余署篆靈州州故有秦漢二渠下車始值民脩濬余親往相度維時吳忠數堡之民環聚馬首投牒互控大約以漲水侵疆殃及鄰界為辭細詢其故則渠水入田其尾滯而為湖北湖自金積堡下至吳忠堡之東南共十二處汪洋清澈幾數千頃南湖自忠營堡至漢伯堡雖勢不甚廣而渠之所經偶破

衝口窪處輒鍾聚夏秋之交洪河盛溢渠流張王游波入湖湖不能受則漫衍田畝浸壞屋廬亦其勢然也及詢其所以經理之宜則言人人殊不復可辨余無可如何姑令徐退既而思之古之君子利民溥慮患周所以圖始善終者宜無不脩豈獨無道以處此耶抑其蹟久而或湮耶適有客來謁謂公初至地情未緒此間舊有南北二滂河吳忠之稍為清滂河漢伯之稍為渾滂河緣歲久淤塞民憚其勞惟以壑鄰興訟濬此二處則湖患息矣



余曰若然是湖非為民患民自貽患也乃率士民躬為指畫南澇河計長二十餘里分三段修濬由三岔口抵澇河橋工屬忠營堡 河橋抵小蘆洞工屬漢伯堡蘆洞至梢工屬吳忠堡寬六尺深六尺俱安底石為証北澇河計長四五里挖深三四尺兩河總匯閼尾閘由山水溝而北抵大河蓋論其害則北湖為巨計其功則南湖較艱其形便不同如此既迺著為成式以圖經久北湖之田涸出幾半明春修濬北河宜按湖田出夫水利堡長主之母得攤累通堡南河按段分濬蘆洞以下尤為緊要稍有偷減通身復淤如吳堡之人不盡力則忠漢兩堡合力通濬而吳忠堡人不得復藉指水以灌田違者官治其罪其種稻之處上下堡亦輪年更換以輕水患凡此數端民皆謂便積年之患一朝頓除向之訟者僉曰公之賜也民之福也於是羅拜車前以謝余惠而豈知前人之圖始善終不啻餘隙有如此耶然則古今廢興成毀之故類此者多矣作者未始不欲其永久而其後往往



輟墮也貪咫尺之得忘尋丈之失憚一日之勞遺  
數年之患余甚懼焉因為錄次其事以附州誌庶  
使後之君子知前人之深心不可沒而留心水利  
者亦有所藉以考焉

漢渠水舊豐足自乾隆三十八九年来河勢東阜  
水流西向漸不入渠州民之於時知州黎請  
帑銀四千兩捐糧六百石令庠生顏俸督工料理  
迤渠而南至野馬灘開掘接築迎水埝十數里以  
通壅滯水乃足用至今賴焉州人立碑頌德



朝廷設官非謂治爾絲卷簿籍徒以為文而已而境內之理亂係之士人服官非謂縮章緞食廉俸徒以為榮而已而民生之利病係之靈州舊設中路河知自

因朝雍正三年改設知州其在州城內者文職自知州以下有學正吏目等官武職自參將以下有守備千把等官其列在各營堡者文職有通判州同等官武職有參將都司守備千把等官分隸軍民各

襄厥事昔朱邑為桐鄉嗇夫民有蒸嘗之報如人克盡厥職雖微員吏皆足自効矧一方之漢軍政舉於其人者責成者其職任尤匪輕也考其姓名可見者列於誌俾觀者得稽其所務以辨其能否焉

職官

靈州知州 每歲俸銀八十兩養廉銀六百兩  
費銀三百六十兩

門子二名歲支工食銀一十二兩過關加銀一兩皂隸一十六名歲支工食銀九十六兩



鈔也雍熙二年令商人所在納銀赴京請領麥引  
蓋邊郡入納筭請始見於此端拱二年置折中倉  
令商人輸粟京師蓋在京輸粟筭請始見於此天  
聖七年令商人推貨物入納錢銀蓋在京入納錢  
銀筭始見於此天聖八年以兵部員外郎范詳鈔  
法令商人就邊郡入錢四貫八百售一鈔至解池  
請蓋二百斤任其私賣得錢以實塞下省數十郡  
搬運之勞行之既久蓋價時有低昂又於京師置  
都蓋院陝西轉運司自遣官主之京師食蓋斤不

足三十五錢則歛而不發以長下價過四十則大  
發庫蓋以壓商利使蓋價有常而鈔法有定行之  
數年人以為利

元昊時請售青白蓋宗以其味佳值賤入中國則  
擾邊且阻解池絕國用遂不許

元各州縣戶口額辦蓋課運官召商發賣惟陝西  
運司官每年預期差人分道齎引遍散州縣陝西  
食蓋之戶該辦課二十萬三千一百六十四錠肉  
鞏昌延安等處認定課鈔一萬六千二百七十一



加奉八兩馬快八名歲支銀一百三十四兩  
錢過閏加銀一十一兩二錢  
食銀二十四兩過閏加銀二兩  
工食銀二十四兩過閏加銀二兩  
名歲支工食銀二百二十八兩  
八名歲支工食銀四十八兩  
夫七名歲支工食銀四十兩  
二兩過閏加銀三兩五錢

州同 每歲俸銀六十兩養廉一百二十兩

門皂馬夫九名歲支工食銀五十四兩  
銀四兩五錢民壯四名歲支工食銀二十四兩  
過閏不加

吏目 每歲俸銀三十一兩五錢二分養廉銀六

十兩

靈州誌蹟 卷三

門子一名歲支工食銀六兩過閏加銀五錢  
隸四名歲支工食銀二十四兩過閏加銀二兩  
馬夫一名歲支工食銀六兩過閏不加

靈州學正 每歲俸銀四十兩

齋夫三名歲支工食銀三十六兩過閏加銀一  
兩膳夫二名歲支工食銀一十三兩三錢三分  
三厘過閏加銀一兩一錢一分一厘門斗三名  
歲支工食銀一十八兩過閏加銀一兩五錢  
生三十名歲支餼糧銀九十二兩八錢八分  
厘歲貢一名額設花紅旗匾銀二兩二錢二分  
八厘

歷任姓氏

靈州舊設中路同知



祖良禎 盛京人康熙四十一年任

祝兆昂 直隸天津人康熙五十一年任

雍正三年改設知州

蔡書雲 江南人雍正三年任

朱佐湯 山西臨汾人乾隆三年任

劉輝祉 直隸安平人乾隆十一年任

謝玉 江南武進人乾隆十八年任

江鯤 直隸天津人乾隆二十年任

西岷峨 鑲白旗滿洲人乾隆二十二年任

靈州誌蹟 卷三

賈建奇 河南祥符人乾隆二十七年任

奇明 鑲白旗滿洲人乾隆三十七年任

黎珠 鑲白旗滿洲人乾隆四十年任

佟躍岱 順天人乾隆四十年任

黃恩 安徽婺源人乾隆四十六年任

孝順阿 正白旗滿洲人乾隆四十七年任

洪彬 安徽祁門人乾隆四十八年任

廣玉 正白旗滿洲人乾隆五十年任

楊芳燦 江蘇金匱人乾隆五十二年任



連彭年 浙江上虞人嘉慶三年任

豐延泰 正白旗滿洲嘉慶三年任

鹽捕通判

朱亨衍 廣西桂林人乾隆元年任

蔡永寧 正白旗漢軍乾隆七年任

李昌陵 山西安邑人乾隆十三年任

徐廷璐 順天大興人乾隆二十四年任

鄭景 安徽涇縣人乾隆三十年任

承裕 鑲黃旗滿洲乾隆三十四年任

靈州誌蹟 卷二

二十三

尚玉琅 鑲藍旗漢軍乾隆三十六年任

崔泳 浙江嘉興人乾隆四十四年任

花馬池州同

梁德長 陝西長安人雍正九年任

錢孟揚 江蘇太倉人乾隆四年任

楊起元 江蘇宜興人乾隆十一年任

陳冠吉 江西吉水人乾隆二十年任

佟鏊 正藍旗漢軍乾隆二十年任

梁昌 山西介休人乾隆二十五年任



高士堂

順天大興人乾隆二十五年任

李立

山西陽曲人乾隆二十八年任

李鏞

山西臨汾人乾隆二十九年任

章攀桂

安徽桐城人乾隆二十九年任

李文曾

山東膠州人乾隆三十年任

戴恭暉

湖北江夏人乾隆三十一年任

楊瀛仙

雲南石屏人乾隆三十四年任

伍葆光

廣西興寧人乾隆三十六年任

胡誠

順天大興人乾隆三十九年任

靈州誌蹟 卷二

二十四

窩什澤

鑲藍旗漢軍乾隆三十九年任

朱蘭

山東歷城人乾隆四十一年任

靈州舊設訓導

李龍雲

榆林人康熙四十九年任

孫四正

長安人康熙五十九年任

雍正三年改設學正

吳郡

蘭州人雍正四年任

張大本

邵陽人雍正十三年任

李飛雲

華陰人乾隆四年任



郝鵬圻 宜川人 乾隆十二年任

朱錦 汧縣人 乾隆二十四年任

雷繩武 渭南人 乾隆三十年任

張璉 郿縣人 乾隆三十五年任

楊崑 蒲城人 乾隆四十七年任

田種玉 城固人 乾隆五十四年任

雷懋德 鳳翔人 乾隆五十五年任

劉晉 臨潼人 乾隆五十七年任

梁楚翹 耀州人 乾隆五十八年任

靈州誌蹟 卷二

武職

靈州營參將一員 中軍守備一員 把總四員

花馬營參將一員

興武營都司一員

橫城營都司一員

同心營守備一員

安定堡守備一員

歷任姓氏

花馬池舊設副將



趙之鐸 順天人順治二年任

吳登科 奉天人順治九年任

萬承選 奉天人順治十二年任

姚承德 直隸人順治十五年任

李正芳 順天人順治十六年任

王有才 山東人康熙五年任

石福 榆林人康熙十五年任

黃可樂 汾州人康熙二十二年任

黃昱 臺灣人康熙二十五年任

靈州誌蹟 卷三

徐達 潞安人康熙二十九年任

高永謙 秦州人康熙三十七年任

趙永吉 金鄉人康熙四十六年任

金國正 本鎮人康熙四十六年任

改日新 宛平人康熙五十四年任

惠延祖 濟寧人康熙六十一年任

任春雷 西寧人雍正九年任

韓應奎 西安人乾隆元年任

王良佐 保定人乾隆六年任



晏嗣漢 貴州人 乾隆十年任

張晟 奉天人 乾隆十六年任

容保 奉天人 乾隆十七年任

達啟 奉天人 乾隆二十年任

福興 奉天人 乾隆二十年任

定柱 奉天人 乾隆二十年任

色倫泰 奉天人 乾隆二十八年任

乾隆二十八年改設參將

塞爾領 奉天人 二十九年任

靈州誌蹟 卷二

二十七

劉鑑 奉天人 三十年任

張邦仁 襄陽人 三十六年任

薛大楷 山西人 四十一年任

靈州營參將

盧養元 州人 順治元年任

蔣國泰 淮安人 順治二年任

杜茂松 榆林人 順治四年任

程天壽 奉天人 順治七年任

張國俊 河間人 順治十二年任



劉君榮 寧遠人順治十七年任

周元 江西人康熙元年任

楊三虎 金華人康熙十年任

張靖 通州人康熙十七年任

呂自奎 岳州人

吳志 福建人康熙二十二年任

王永若 邵陽人康熙二十四年任

王祚昌 錢塘人康熙二十六年任

路全功 直隸人三十年任

靈州誌蹟

卷三

二十六

陳化龍 通州人三十五年任

齊得弁 濟寧人三十六年任

祁朝相 永昌人三十六年任

馬際伯 寧夏人三十八年任

羅大虎 寧夏人三十九年任

段枚臣 鞏藍旗人四十年任

李耀 寧夏人四十四年任

李山 上元人四十六年任

劉大忠 寧夏人五十三年任



馬龍 西寧人康熙五十七年任

常傑 長安人六十年任

高錦 涼州人雍正元年任

張國棟 肅州人二年任

王廷瑞 寧夏人六年任

陳弼 肅州人七年任

朱彪 直隸人乾隆元年任

馬奇 肅州人十年任

楊大業 江南人十五年任

靈州誌蹟 卷三

武福 甘州人十八年任

馮天錫 長安人十九年任

吳士勝 二十九年任

承保 鑲白旗人三十年任

夏國泰 滋陽人三十六年任

福明 鑲黃旗滿洲三十六年任

福長 鑲黃旗人乾隆四十二年任

興武管遊擊

張紀 北直人



吳光先 鐵領衛人順治四年任

樊朝臣 直隸人

姜友才 寧夏人順治七年任

田元國 北直人十三年任

謝鴻儒 鞏昌人十八年任

李登相 順天人康熙八年任

吳志 澧浦人十六年任

賈士威 鄆縣人二十三年任

陳良弼 福建人三十六年任

靈州誌蹟 卷二

劉天元 涼州人四十年任

趙俸 靈州人五十一年任

李元 涼州人五十三年任

潘華 靖遠人五十七年任

吳自端 南昌人五十九年任

竇棟 諸城人雍正三年任

卓靈阿 正黃旗人四年任

晏嗣漢 貴州人乾隆四年任

柴大成 肅州人五年任



凱音布

盛京人乾隆九年在

劉志高

翰林人乾隆十一年任後改設都司

靈州誌蹟

卷三

三



靈州花馬興武橫城及各營堡防兵併壹千五百九十八名其分為馬兵者伍百壹十一步兵者壹百九十壹守兵者捌百九十陸其各營汛塘墩合九十六驛遞八為馬一百有二十夫六十九塘馬一百八夫五十四凡兵之糧餉馬之草料夫之工食稱是嘗試論之古之名臣有偶歷邊屯悉取其兵數屯戍及道路斥堠走集之所疏為方寸小冊以備察覽一旦有事不煩指顧而摩畫已定蓋是

數者皆籌邊之要畧也因各輯其類而誌之

兵額

花馬池營併分防安定惠安韋州三堡兵四百七

十六名

馬一百九十三 步三十九 守二百四十四

靈州營併分防同心城臨河堡二處兵五百六十

一名

馬一百七十二 步一百一十八 守二百八十八

興武營併分防毛卜喇堡兵三百二十六名

馬一百三

十二 步五十一

守一百四十三

橫城營併分防清水紅山二堡兵二百三十五名



馬一十四守  
二百二十一

營汛

橫城營墩十四處

通關閘門有五石嘴邊墩 出水壑以上屬橫城安邊

墩 大鶯墩閘門鎮羅邊墩 窰兒邊墩以上分屬紅山

堡廟兒邊墩 塔兒邊墩 定遠邊墩 金湯墩

閘門靖邊墩 古寺邊墩 柔遠墩以上分屬清水營

興武營墩十六處

苦水邊墩 平安墩 閘門墩閘門 沙溝邊墩

靈州誌蹟 卷三

三十三

雙溝邊墩 鹹口邊墩 西沙邊墩 沙嶺邊墩

興武營門閘門 高梁邊墩 硝池邊墩 乾溝邊墩

中沙邊墩 半箇城墩 清字邊 鎮邊墩

花馬池營墩二十一處

芟芟溝邊墩 十一鋪邊墩 七鋪邊墩 閘門

四鋪邊墩以上分屬安定堡 二十三鋪邊墩 二十一鋪

邊墩 十九鋪邊墩 十六鋪邊墩 十三鋪邊

墩 八鋪邊墩 三鋪邊墩 二鋪邊墩 長城

關門閘門 二鋪邊墩 五鋪邊墩 七鋪邊墩 九



舖邊墩 十三舖邊墩 十七舖邊墩 二十一

舖邊墩 與延綏定邊營接界

以上各墩防兵三名

靈州營二十五處

磁窑寨墩 新墩子墩 茨烟墩 上十里墩

麥崗子墩 白土墩 舊石溝墩 紅窑墩 深

沙溝墩 晏湖墩 馬站湖墩 夏家堡墩 魚

湖墩 野馬墩 以上屬靈州 大紅溝墩 白崖口汛

紅石崗汛 胭脂川汛 以上屬同心城 紅寺兒汛 水頭

靈州誌續 卷三

見汛 滾泉汛 大壑子水汛 以上屬紅寺堡 河東關汛

木場墩 平湖墩 以上屬臨河堡

花馬營一十一處

二道溝汛 傅家地坑汛 武家淌汛 以上屬花馬池 十

里墩 紅墩子墩 湯房墩 以上屬惠安堡 威遠墩 雄

峰墩 大口子汛 石板泉汛 石頭坂汛 以上屬章州

西路塘房墩 東路塘房墩 以上屬惠安堡

興武營四處

峭汲塘房墩 西倒墩塘房墩 以上屬興武營 鎮安塘房



墩 石山塘房墩以上分屬

橫城營五處

大墩塘房墩 石嘴塘房墩 以上屬 出水塘房墩

鎮羅塘房墩 以上分屬 廟兒塘房墩 分屬 清

紅山堡 按前明嘉靖築河東新墻後盡減其馬以省草料

之費息餼養之勞惟置軍夫沿溝壘守之謂之擺

邊給事中管律著論非之其畧曰亘三百六十餘

里皆虜入寇之路步計一軍談十二萬猶虞稀濶

矧見軍未及十之三乎法曰以逸待勞者勝擺邊

靈州誌蹟 卷二 三五

晝夜戒嚴恐非逸道也倘虜衆分道而來則十萬

之衆豈能一呼成陣首尾勢不相援為今之計宜

息肩養銳聯絡于諸寨待其來也相禦禦之如不

果禦隨向往而追逐之况兵貴奇正患無應援將

貴主一患在勢分擺邊之舉有五弊焉無奇正無

應援主將不一士卒分散以五弊之謀禦方張之

虜不資敵之利乎舊志

驛通

在城驛東至紅山駟六十里西至寧夏縣王洪朝



三十里額設馬四匹夫三名

同心城駟南至固原州李旺駟九十里北至中衛  
縣沙泉駟九十里額設馬八匹夫七名

橫城駟東至紅山駟三十里西至寧夏縣在城駟  
三十里額設馬十八匹夫九名

紅山駟東至清水駟四十里額設馬十八匹原額  
夫三名新添夫七名

清水駟東至興武駟六十里額設馬十八匹原額  
夫三名新添夫七名

靈州誌續

卷二

三十六

興武駟東至安定駟六十里額設馬十八匹原額  
夫三名新添夫七名

安定駟東至花馬駟六十里額設馬十八匹原額  
夫三名新添夫七名

花馬駟東至延安府安邊駟六十里額設馬十八  
匹原額夫三名新添夫七名

共馬一百二十匹每匹日支草料銀七分三厘歲  
共銀二千八百八十一兩三錢四分外備銀三百  
五十九兩三錢六分六厘額載支直廩口銀一百



四十三兩八錢九分二厘九毫靈州同心二馴馬  
歲料一百二十九石六斗

共夫六十九名歲支工食銀六百二十四兩糧二  
百四石

橫城塘至紅山塘三十里馬一十二匹夫六名

紅山塘至清水塘四十里馬一十二匹夫六名

清水塘至毛卜塘四十里馬一十二匹夫六名

毛卜塘至興武塘三十里馬一十二匹夫六名

興武塘至永興塘三十里馬一十二匹夫六名

永興塘至安定塘三十里馬一十二匹夫六名

安定塘至高平塘三十里馬一十二匹夫六名

高平塘至花馬塘三十里馬一十二匹夫六名

花馬塘馬一十二匹夫六名

共馬一百八匹每匹日支草料銀八分五厘歲支  
銀三千三百四兩八錢

共夫五十四名歲支工食銀六百四十八兩



朔方官蹟一編托始周南仲考南仲在周文王世為將帥當是時虜公助睢麟之化召伯有甘棠之惠而出車一詩獨誇設旒建旄之盛非以地重邊防人高武節故與夫文武異用而殊塗同歸鄒魯遺訓載在芹藻之章秦雍雄風脩見小戎之什假使禦戎虜以弦歌何異章甫而揖盜也今考秦漢以來二千餘年間名將偉畧有功斯土者輯而錄之將俾績炳旗常勲昭青簡永不墜云

歷代官蹟

周南仲周之卿士城朔方伐西戎 在詩小雅

秦蒙恬秦始皇使蒙恬將三十萬衆北逐戎狄悉收河南地因河為塞築四十四縣城臨河徙適戍以充之通直道自九原至雲陽因邊山險墾豁谷起臨洮至遼東萬餘里

漢衛青河東平陽人元朔二年出雲中至隴西捕虜數千畜百餘萬走白羊樓煩至王遂取河南地為朔方郡封長平侯上曰匈奴逆天理亂人倫暴



長虐老以盜竊為務行詐諸蠻夷造謀籍兵數為  
邊害故興師遣將以征厥罪詩不云乎薄伐獫狁  
至于太原出車彭彭城彼朔方今車騎將軍青渡  
西河至高闕獲首二千三百級車輜畜產畢收為  
鹵已封為列侯遂西定河南地按榆谿舊塞絕梓  
領梁北河討蒲泥破符離執訊獲醜全甲兵而還  
其益封青三千八百戶其後屢出朔方以功拜大  
將軍

蘇建衛青校尉封平陵侯築朔方城

靈州誌蹟

卷二

三十九

主父偃言朔方地肥饒外阻河蒙恬城以逐匈奴  
內省轉輸廣中國滅虜之本也上覽其說遂置朔  
方公孫宏以為罷弊中國奉無用之地使朱買  
臣等難宏葢十策宏不得一謝曰願罷西南夷事  
事朔方上許之

郭昌驃騎封狼居胥山是後匈奴遂遁而幕南無  
王庭漢度河自朔方以西至今居往往通渠置田  
官吏卒五六萬天子巡邊親至朔方勒兵十八萬  
騎以見武節匈奴數使奇兵侵犯漢邊漢乃拜



昌為拔胡將軍及汲野侯屯朔方以備寇

鄧遵元初三年為度遼將軍率南單于及羣虜悉  
王須沈萬騎擊零昌于靈州斬首八萬餘緘封滇  
沈為破虜侯金印紫綬賜金帛財物各有差

魏原子雍字靈和少好文雅篤志於學推誠待士  
多歸之遷夏州刺史適朔方胡反圍城城中食盡  
子雍詣東夏州運糧為胡帥所擒子雍以義感眾  
不為屈胡帥遂降糧道既通二夏以金封樂平縣  
公

靈州誌蹟

卷二

四

宇文泰夏州刺史賀拔岳遣泰詣洛陽察陳高歡  
反狀魏主喜以岳為都督二十州諸軍事岳遂引  
兵屯平涼夏州刺史彌俄突附岳靈州刺史曹泥  
附歡岳以夏州被邊要重表用泰為刺史泰遣李  
虎擊曹泥虎等招諭賈也頭之眾與之共攻靈州  
九旬曹泥請降高歡自將萬騎襲夏州不火食  
四日而至縛稍為梯夜入其城擒刺史解救彌俄  
突因而用之留張瓌將兵鎮守遷其部以歸靈州  
曹泥復叛降東魏西魏圍之水灌其城不沒者四



尺歡款阿至羅騎徑歷靈州進出西魏師後西魏  
師退歡迎泥拔其遺戶五千以歸

周源雄字世畧少寬厚美姿容以伐齊功封朔方公

歷真平二州刺史

隋王仁恭字元實天水上邽人工騎射從楊素擊突  
厥于靈州以功拜上開府

元冑洛陽人素有威名拜靈州大總管北夷甚憚  
焉

唐江夏郡王道宗高祖時為靈州總管時梁師都弟

靈州誌蹟

卷三

四

洽仁連突厥兵數萬傳于壘道宗閉城守伺隙出  
戰破之高祖謂斐寂曰昔魏任城王彰有卻敵功  
道宗似之因封任城王始突厥郁射設入居五原  
道宗逐出之震耀威武斥地贏千里貞觀元年召  
拜鴻臚卿遷大理太宗方經畧突厥復授靈州都  
督

崔敦禮字安上雍州咸陽人太宗時以兵部侍郎  
出為靈州都督還拜兵部尚書詔撫輯回紇鐵勒  
部姓會薛延陀寇邊與李勣合兵破之置和連川



處其餘衆

魏元忠宋州宋城人武后時以御史大夫為隴右諸軍大使以討吐蕃又為靈武道行軍大總管禦突厥馭軍持重雖無赫然功亦未嘗敗

張仁愿華州下邳人本名仁亶有文武材神龍二年朔方軍總管沙叱忠義為突厥所敗詔仁愿攝御史大夫代之既至賊已去引兵踵擊夜掩其營破之始朔方軍與突厥以河為界時默啜悉兵西擊突騎施仁愿請乘虛取漠南地于河北築三受降

靈州誌蹟卷二

四二

城絕虜南寇路表留歲滿兵以助功役者盡力六旬而三城就以拂雲為中城南直朔方西城南直靈武東城南直榆林三壘相距各四百餘里又于牛頭朝那山北置烽堠千三百所自是突厥不敢踰山牧馬歲費省億計減鎮兵數萬景龍二年拜右衛大將軍同中書門下三品封韓國公仁愿為將號令嚴將吏信伏按邊撫師賞罰必直功罪後人思之為立祠受降城出師輒享馬在朔方奏用御史張敬忠何鸞長安尉寇泚鄴尉王易從始平



主簿劉體微分摠軍事太子文學柳彥昭為管記  
義烏尉晁良貞為隨機皆著稱後至大官世名仁  
慮知人

姚崇字元之陝州硤石人武后時以鳳樓同鳳  
閣鸞臺三品出為靈武道大摠管張柬之等謀誅  
二張崇適自屯所還遂參計議以功封梁縣侯  
張說字道濟洛陽人開元中王峻討康待賓詔說  
相間經畧時党項羗亦連兵攻銀城說將步騎萬  
人出公河關掩擊破之十年詔為朔方節度大使

靈州誌蹟

卷二

四三

親行五城八月康待賓餘黨康願子反掠牧馬西  
涉河出塞說追討至木盤山擒之乃議徙河曲二  
州殘寇于唐鄧仙稷間空河南朔方地奏罷緣邊  
戍兵悉還農

牛仙客涇州鶉觚人開元末為朔方摠管尚書省  
用倉庫積實器械鋒銳遷工部尚書同中書門下  
三品

渾瑊本鐵勒九姓之渾部也父釋之有才武從朔  
方軍積戰功累遷寧朔郡王廣德中與吐蕃戰沒



城年十一善騎射隨釋之防秋朔方節度使張齊  
邱戲曰與乳媪俱來耶是歲即立功後從李光弼  
郭子儀擊吐蕃與李晟收復京城累功封咸寧郡  
王  
王忠嗣以武功至金吾衛將軍本勇敢及為將乃  
能持重俄為河西隴右朔方河東節度佩四將印  
控制萬里每互市高估馬價諸胡爭以馬求市胡  
馬遂少

郭子儀華州鄭人天寶十四載安祿山反詔子儀

靈州誌蹟

卷二

四四

為衛尉卿靈武郡太守充朔方節度使率本軍東  
討後明皇幸蜀肅宗即位靈武詔班師子儀與李  
光弼率步騎五萬赴行在時朝廷草昧衆軍寡軍  
容闕然及是國威大振拜子儀兵部尚書同中書  
門下平章事仍總節度時帝倚朔方軍為根本焉  
大歷三年吐蕃入寇詔率師五萬屯奉天子儀遣  
將白元光破虜于靈武九年入朝上書曰朔方國  
北門西禦犬戎北虞獫狁五城相去三千里開元  
天寶中戰士十萬馬三萬僅支一隅自先帝受命



靈武戰士從陛下征討與寧歲頃以懷恩亂瘼傷  
凋耗止三分之二比天寶中止十之一臣惟陛下  
制勝力非不足但簡練不至進退未一時淹師老  
地廣勢分類於諸道料精卒滿萬者列屯北邊則  
制勝可必後以功封汾陽王謚忠武

杜黃裳字遵來京兆萬年人擢進士第郭子儀  
佐朔方府子儀入朝使主留事李懷光與監軍陰  
謀矯詔誅大將以動衆心欲代子儀黃裳得詔判  
其非以質懷光懷光流汗服罪於是諸將狼駭難  
制者皆以子儀令易置衆不敢亂後至宰相

李晟洮州臨潭人大歷初李抱玉署晟右將軍吐  
蕃寇靈州抱玉授以兵五千擊之辭曰以衆則不  
足以謀則多乃請千人由大震關趨臨洮屠定素  
堡執其帥慕容谷鍾虜乃解靈州去遷明府備門  
三司累功封西平郡王

史敬奉靈州牙將吐蕃十五萬衆圍鹽州刺史文  
文悅竭力拒之凡二十七日敬奉言於朔方使  
使杜叔良請兵解圍叔良以二千五百人進



奉行旬餘無聲問衆以為俱沒矣無何敬奉自他道出吐蕃背吐蕃驚潰敬奉奮擊大破之

杜希全朔方節度軍令嚴整人畏其威奉天之狩引兵赴難賊平遷靈鹽豐夏節度使

崔知溫字體仁許州陽陵人為靈州司馬境有渾斛薩萬帳數擾齊民農皆釋耒習騎射以扞賊知溫表徙河北自是人得就耕田野始安特詔同門下三品遷中書令

五代康福蔚州人明宗時靈武韓洙死其弟澄立而

偏將李從賓作亂朝廷以福為涼州刺史河西節度使破吐蕃於青岡峽威脅大振居靈武三歲歲常豐稔有馬千匹蕃彘畏服

張希宗字德峯幽州薊人遷靈武節度使靈州地接戎狄戍兵餉道常苦抄掠希宗乃開屯田教耕種軍以足食又能招輯夷落自回鶻瓜沙皆遣使入貢居四歲上書求還內地晉高祖入立復拜靈武節度使

馮暉魏州人降晉高祖拜義成節度使徙鎮靈武靈



武自唐明宗以後市馬糴粟給賜軍士自閔以西轉輸供億民不堪役青岡土橋之間氏羗剽掠商旅多阻暉至推以息信部族懷惠止息侵奪然後廣屯田以省轉餉治倉庫亭館千餘區多出俸錢民不加賦管內大治党項拓跋彥超為最大暉至超來謁遂留之為起第於城中遇之甚厚因服諸族

葉元福并州晉縣人晉開運中為威州刺史蕃酋拓跋彥超等攻靈州詔以河陽節度馮暉鎮朔方

召關右兵進討以元福將行營騎兵元福與暉出威州土橋西遇彥超兵七千元福轉戰五十里殺千級擒三十餘人朔方距威州七百里無水草號旱海師須齎糧以行至耀德食盡彥超衆數萬布為三陣扼要路據水泉以待暉軍軍中大懼暉以玉帛求解和彥超許之至日中列陣如故元福曰彼知我軍飢渴邀我於險欲困我耳遷延至暮則吾黨成擒矣彼雖衆而精兵絕少依西山為陣者是也乃以麾下先擊西山兵敵果潰元福舉旗暉



軍繼進彥超大敗橫尸蔽野是夕入清遠軍明日  
至靈州元福入宋為檢校太尉鎮陝州

宋馮繼業字嗣宗暉之子也幼敏慧有度量以父任  
補朔方軍節院使暉卒遂代其父為朔方留後以  
郊祀恩加靈州大都督府長史建隆初來朝以駝  
馬寶器為獻後拜靜難軍節度使

王侁秦州副將帝遷之靈州與田仁郎等討李繼  
遷繼遷陷三族仁郎次綏州請益兵帝聞三族已  
陷竄仁郎商州侁出銀川北破悉利諸砦麟州諸

靈州誌蹟

卷二

四

蕃皆請納馬贖罪討繼遷侁與所部兵入濁輪川  
斬賊首五千級繼遷遁去郭守文復與尹憲擊鹽  
城諸蕃焚千餘帳由是銀麟夏三州蕃百二十五  
族內附戶萬八千餘

劉綜字居正虞鄉人咸平中夏人擾邊詔以綜為  
轉運副使時靈州孤危獻言者或請棄之綜力上  
言靈州民淳土沃為邊陲巨屏所宜固守以為扞  
蔽詔從其請語詳藝文

董遵誨涿州范陽人領靈州路巡檢豁達多方畧



在懷遠軍凡十四年安撫一面夏人悅服嘗有剽掠進奉使兵器者帳下欲討之夏人懼盡歸所畧拜伏請罪自是各謹封界秋毫無犯

段思恭澤州晉城人代馮繼業知靈州太祖壯其往賜窄衣金帶錢二百萬仍以途涉諸部令別齎金帛以遺之思恭下車矯繼業之失綏撫夷落訪求民病悉奏免之

侯贊并州太原人知靈州按視蕃落宴犒以時得邊士心部內大治在朔方十餘年上念久次求可

代者而難其人卒贈本衛上將軍

安守忠字信臣并州晉陽人初知靈州繼從夏州在官七年每西戎犯邊戰無不捷錄功就拜漢州

團練使

侯延廣汾州平遙人淳化二年李繼遷始擾夏臺命延廣知靈州賜金帶名馬會趙保忠陰結繼遷朝廷命騎將李繼隆率兵問罪以延廣護其軍既而夏臺平保忠就縛手詔褒美延廣在靈州部下嚴人悅服繼遷素辟其鋒監軍康贊元害其功誣



奏詔還至道間繼遷寇靈州朝廷謀帥錢若水稱  
延廣再知靈州兼兵馬都部署獨引數十騎之鎮  
戎人素服其威名皆相率引避

慕容德豐字日新太原人淳化二年知延州時候  
延廣在靈武或言其得虜情倔強難制命德豐代  
之為四方館使兼都部署時穀價踴貴德豐出私  
廩賑飢民全活甚衆

李繼隆上黨人至道二年馬紹忠送糧靈州為繼  
遷所邀敗洛浦河上間之怒亟命繼隆為靈環十

州都部署討繼遷

王昭遠冀州人色黑又名鐵山至道中李繼遷據  
西鄙絕靈武糧道命昭遠為靈武路都部署護二  
十五州芻粟虜不敢犯

田紹斌汾州人靈州馬步都部署入蕃討賊斬首  
二千級獲馬牛駝二萬計以給諸軍

曹璨字韶光武惠王彬子至道初知靈州徙河西  
鈐轄後以麟府濁輪副部署出蕃兵邀繼遷俘賊  
甚衆



丁罕潁州人淳化五年以容州觀察使領靈環路  
行營都部署與繼遷戰斬獲數萬

郭密貝州經城人充靈州兵馬都部署訓練士卒  
號令嚴明夏人畏服邊境以寧

鄭文寶字仲賢太宗時授陝西轉運副使前後自  
環慶部糧越旱海入靈武者十二次曉達蕃情習  
其語經由部落或宿酋長帳中其人每呼為父朝廷  
議城古威州遣使訪文寶言威州在清遠軍西北  
八十里樂山之西唐大中時靈武朱叔明收長樂

州郊寧張君緒收六關即其地也故壘圮水甘土  
沃有良木薪秸之利約葫蘆臨洮二河壓鳴沙蕭  
關而戍東控五原北固峽口足以襟帶西涼咽喉  
靈武城之便

張凝滄州無棣人少有武畧倜儻自任咸平四年  
代潘璘為邠寧環慶靈州路副都部署時斥候數  
擾轉運使劉綜懼飛輓不給問計於凝凝曰今當  
深入因敵資糧不足慮也乃自白豹鎮率兵入敵  
境生擒賊將燒蕩三百餘帳芻糧八萬獲牛馬甲



器二萬降九百餘人

楊瓚汾州西河人至道初改防禦使靈慶路副都督部署河外都巡檢使賊累寇疆瓚守禦有功賊於合河鎮北擒獲甚多導黃河溉民田千頃增戶口益課利時號富強

潘羅支六合酋長李繼和言其願戮力討夏乃授朔方節度保吉陷西涼羅支偽降保吉受之不疑羅支遽集六合蕃部合擊之保吉大敗中流矢死明沐英定遠人洪武十年以征西副將軍從鄧愈出

塞渡黃河耀兵崑崙轉戰數千里俘獲萬計論功封西平侯十三年脫火赤犯順英由靈武口渡黃河歷賀蘭山涉流沙分為四翼自以驍勇衝其中堅啣枚夜薄其營生擒脫火赤及知院愛足全部以歸封黔寧王卒謚昭靖配享廟庭

史劍直隸藁城人以父敬功授寧夏世襲指揮遂家焉累以軍功歷總兵宣德元年挂征西將軍印鎮寧夏所統官軍悉聽節制虜也先脫干為患劍出奇計擒之劍用兵有紀律料敵制勝所向無功



家傳稱劍常出征經大漠人馬渴甚劍潛心默禱  
忽前有茅菴訪之見二尼隨所指引得甘泉如注  
師用濟旋踪跡之菴尼皆不復見惟遺一色裏內  
鐵燕一支兵書一篋自是謀畧益神每行軍則置  
鐵燕於帳前以候風色占驗動靜毫髮無爽於花  
馬池建築四步戰室制今尚存壽八十三卒於官  
史昭合肥人宣德七年以征西將軍鎮寧夏李的  
達里麻犯邊遣兵擊之至澗臺察罕俘獲甚衆進  
都督同知正統初昭以寧夏孤懸河外東抵綏德  
二千里曠遠難守請於花馬池築哨馬營增設烽  
堠直接哈剌九速之境邊備大固尋進右都督居  
寧夏十二年老成重慎政舉兵修邊境無事

盧茂成化間以都指揮守備靈州驍勇無人到任  
之二日敵以百騎來犯茂單騎馳突之俄敵漸衆  
而茂兵亦至奮呼一擊斬其犯陣一將餘遁去數  
歲不敢近靈州邊

王驥字尚德正統九年命與都御史陳謚巡邊初  
寧夏備邊軍半歲一更後邊事亟三年乃更軍士



日久疲罷又益選軍防冬家有五六人在邊者軍用重因驥請歲一更當代者以十月至而代者留至來年十月乃遣歸邊備足而軍不勞帝善其議行之諸邊卒年八十三贈靖遠侯謚忠毅

秦紘字世纓單人成化十四年秋寇大入花馬池敗官軍孔壩清詔起紘戶部尚書總制三邊紘馳至祭亾檜骼奏錄死事指揮朱拊等五人恤軍士戰沒者家劾治敗將楊琳等四人罪更易守將練壯士興屯田申明號令軍聲大振又請於花馬池

靈州誌蹟

卷二

五十四

迤西至小鹽池二百里築十堡以固邊防又作戰車名全勝詔頒其式於諸邊在事三年四鎮晏然卒贈少保謚襄毅

史鏞劄姪孫年十八世襲指揮同知以功陞靈州叅將正德二年寘鐠反鏞飛報陝西諸路兵令集近地聲援先率衆把守黃河要口奪其船使賊不得渡於是諸軍繼進賊遂平

叢蘭字廷秀文登人正德間以戶部侍郎督理三邊軍餉後華管固靖等處軍務蘭上言靈州鹽課



請照例關中招商羅糧軍士折色主者多尅減乞  
選委隣近有司散給並從之

楊一清丹徒人宏治十五年擢左副都御史督理  
陝西馬政會寇大入花馬池詔命一清巡撫陝西  
南受事寇已退乃選精卒教演之創平虜紅古二  
城以獲固原築垣瀕河以捍靖虜又為三邊總制  
安化王寘鐫反一清部將仇鉞捕執之一清馳至  
鎮宣布德意安撫士民不貪其功夏人德之

王瓊太原人嘉靖七年代王憲督理三邊軍務時

靈州誌蹟

卷二

五十五

北寇常為邊患明年以數萬騎寇寧夏已又犯靈  
州瓊督遊擊梁震等邀斬七千餘人其秋按行塞  
下虜帳迷遁糶兵而還

劉天和麻城人嘉靖十五年總制三邊軍務倣前  
督秦紘制隻輪車練諸邊將士言囊陷花馬池塞  
斬失守指揮二人敵侵固原東乾溝溝令任杰等  
襲其後擄斬二百級論功加太子太保兵部尚書  
又城鐵柱泉扼北虜入寇之路邊人賴之

王崇古字學甫蒲州人嘉靖四十三年改右僉都



御史巡撫寧夏宗古喜談兵具知諸邊扼塞修戰  
守納降附數出兵根巢故寇累殘他鎮而寧夏獨  
完隆慶初代陳其學進提督陝西延寧甘肅軍務  
崇古指畫地圖分授諸大將趙尙雷龍等數有功  
著力免行收河東龍潛出與武襲破其營斬獲甚  
多吉龍犯邊為防秋兵所遏移營白城子龍等出  
花馬池城關與戰大敗之崇古在陝七年前後獲  
首功無算卒贈太保謚襄毅

李震字卯泉鎮番人庠生襲祖職協守寧夏王宗

古駐花馬池知套虜有異謀以輕騎三千屬震為  
虜所覺部分精銳逆戰震虜其堅陣突入帳中所  
遇強壯盡殲之白城子之捷以震功為宸陞甘肅  
總兵挂平羌將軍印脩葺五郡磚城

正效延綏人讀書能文辭嫻韻畧騎射絕人中武  
會試嘉靖十一年冬充提兵官代周尚文鎮寧夏  
吉囊犯鎮遠關效與梁震鄭時史經敗之柳門追  
北蜂窩山蹙溺之河斬首百四十有奇璽書獎賚  
吉囊十萬騎復窺花馬池效同震拒之不得入虜



趨固原又趨青山峴大掠安定會寧效移師還援  
破之安定再破之靈州斬首百五十餘級十五年  
賊據芴苦灘打磴口等地效率副總兵馮大險任  
杰奮擊之斬獲無算賊乃遠遁

黃正慶陽人靈州禦備都司寘鑄作亂潛謀尅日  
渡河正先機斂奪船屯兵據守賊不敢動先定預  
防之策正實與有功馬陞都督僉事

張九德字威仲慈谿人為河東兵備時悍丁金白  
張威等因調遣殺領官九德聞變即大書撫榜前

誌蹟卷三

五十七

導安家密擒渠魁置之

以安天啓二年靈

州河大決九德建石渠

省功役無算秦渠

常苦涸漢渠常

築長埽以獲秦開蘆口

以洩漢計復拓

百頃號張公隄歷任六年以

卓異擢巡撫

是靈州有祠祀楊一清及王瓊

不為人奉而三之更其額曰三賢

靈州參將明季無為教稱居士作亂夜入

殺河東道曹孟吉時桂香已卸事乃率眾守城

使賊不得出盡攻殺之





長白以東氏豐

捐廉修輯

靈州志

嘉慶戊午春



靈州誌蹟

人物鄉獻誌第十四



余少讀史傳即知靈州有傅氏云寤寐思存庶見名賢之後裔厥後遊歷是邦勤加詢訪而竟不可得聞有傅姓一二族又復譜系不存音徽莫嗣蓋世紀之中衰久矣余竊悲前誥之風流歇絕久而不振也而尤懼其懿行卓德歷世而愈湮也因取漢晉以來至於

國初諸前輩即其言行卓卓者著於編而以科貢附之詩不云乎高山仰止景行行止後生之士可以聞

風而起矣

漢傅燮字南容黃巾賊亂燮上書陳致亂之由請速行讒佞之誅言甚剴切語在本傳中常侍趙忠惡之會燮功當封忠譖之帝猶識燮言不加罪尋任為議郎每公卿有缺衆議必歸之帝使忠論討黃巾功忠使弟延致殷勤於燮曰公當少答我常侍萬戶侯可得也燮正色曰遇不遇命也有功不論時也傅燮豈求私賞哉忠愈恨然憚其名不敢害



出為漢陽太守韓遂擁兵十餘萬圍漢陰城中兵少食盡熒子幹年十三言於熒曰國家昏亂遂令大人不容於朝今兵不足以自守宜還鄉里徐俟有道而輔之熒慨然曰汝知吾必死耶聖達節次守節殷紂暴虐伯夷不食周粟而死吾遭世亂不能養浩然之氣食人之祿又欲免其難乎吾行何之必死於此汝有此才智勉之勉之遂揮左右進兵臨陣戰歿謚曰壯節侯

魏傅嘏字蘭石弱冠知名有精識遠鑑達治理司空

陳羣辟為掾劉邵作考課法嘏建議駁之時躡其論後為河南尹治以德教為本持法有恒簡而不可犯遷尚書衆方議伐吳獻策各不同嘏謂惟進軍大佃坐食積穀乘釁討襲無遠勞費振長策以御之斯為全勝計時不從軍竟為吳所敗司馬景王平母丘儉文欽嘏有謀焉景王薨嘏與司馬文王徑還洛陽遂以輔政後以功封楊鄉侯卒年四十七謚曰元侯

晉傅祗字子莊嘏之子性至孝早知名以才識明練



稱起家太子舍人累遷散騎黃門侍郎賜爵關內侯楊駿輔政欲悅衆心議晉封爵祗作書止之駿不從駿誅祗為侍中多所推正趙王倫輔政以為中書監祗以疾辭倫遣御史與祗就職王戎陳準等相謂曰傅公在事吾屬無憂矣其為人物所倚信如此懷帝即位加右僕射中書監及洛陽陷衆共建行營推祗為監主赴告方伯徵義兵祗自屯盟津以暴疾薨自以義誠不終力疾手書勅勵其二子宣暢詞旨深切覽者莫不感激宣暢亦並有

令名

梁祚字某篤志好學歷治諸經尤善公羊春秋鄭氏易常以教授有儒者風辟秘書中散稍遷秘書令為李訢所排出為統萬鎮司馬徵為散令乃撰并陳壽三國志名曰國統又作代都賦頗行於世清貧守素不交勢貴年八十七卒

傅元字休奕燮之孫性剛勁亮直州舉秀才除郎中武帝即位初置諫官以元為之尋遷侍中轉司隸校尉每奏劾無所容貸貴游震懾臺閣生風封



清泉侯謚曰剛

傅咸字長虞元之子剛簡有大節襲父爵拜太子洗馬累遷御史中丞兼司隸校尉顧榮稱其勁直忠果劾案驚人孫瑗亦以學業知名官至安定太守

南朝傅亮字季友善文詞宋國初尚書令武帝有受北禪意亮悟旨請暫還都許之亮出夜見長星竟天拊髀曰我常不信天文今始驗矣至都帝即徵入輔政俄代晉亮後領護軍將軍與謝晦共廢少帝

靈州誌蹟

卷三

四

迎立文帝元嘉三年被誅

傅迪亮之兄也仕宋官至尚書亮方貴迪每深誠焉而不從見世路屯險著論名曰演慎及少帝失德內懷憂懼因直宿禁中見夜蛾赴火作感物賦以寄意

傅昭字茂遠咸七世孫也年十一隨外祖於朱雀船賣歷日為雍州刺史袁顛客顛常來昭所昭讀書自若神色不改顛嘆曰此兒神情不亢必成佳器後丹陽尹袁粲辟為主簿深加禮敬每至昭戶



輒嘆曰經其力寂若無人披其帷其人斯在豈非  
名賢尋為總明學士梁天監中累遷左民尚書出  
為信武將軍安成內史歷太常卿臨海太守又領  
秘書監本州大中正遷散騎常侍金紫光祿大夫  
昭蒞官常以清靜為政不尚嚴肅居朝無所請謁  
不畜私門生不交私利終日端居以書記為樂雖  
老不衰極博古今世稱為學府大通二年卒年七  
十五謚曰貞子

傅映字徽遠昭之弟三歲而孤兄弟友睦修身厲

靈州誌蹟 卷三

行非禮不動褚彥回歎映以昭未解褐須昭仕  
乃官累遷光祿卿大中大夫卒年八十三

傅琰字季珪美姿儀仕宋為武康令遷山陰令並  
著能名二縣謂之傅聖

傅翹琰之子為官亦有能名後為吳令別建康令  
孫廉因問曰聞丈人發奸摘伏惠化如神何以致  
此荅曰無他唯清與勤而已清則憲綱自行勤則  
事無不理豈無治得乎

傅岐字景平翹之子美容止博涉能占對侯景之



難以勞封南豐縣侯不受宮城失守岐帶疾出圍  
卒

傅緯字宜事幼聰敏七歲誦古詩至十餘萬言為  
文典麗雖軍國大事下筆輒成未嘗起草甚為後  
主所重然性強頗負才使氣凌侮人物朝士多銜  
之後為貴倖構下獄後主使謂曰我欲赦卿卿能  
改過否對曰臣心如面面可改則臣心可改後主  
怒死獄中

傅宏之字仲度泥陽人傅氏舊屬靈州漢永郡境

州誌蹟

卷三

六

為虜所侵士大寄寓馮翊置泥陽富平二縣靈州  
廢不立故傅氏悉屬泥陽晉武帝太康三年復立  
靈州而傅氏還屬靈州宏少倜儻有大志歷官建  
威將軍順陽太守從宋武帝入關宏之善騎乘嘗  
於姚泓馳道內緩服戲馬往還二十里中甚有姿  
制羗胡聚觀數千人並驚歎遷寧朔將軍畧陽太  
守佐義真留長安後義真東歸赫連勃勃傾國追  
攝宏之軍敗不屈死

傅隆字伯祚咸之主孫少孤負有學行不好交遊



年四十始為建威將軍元嘉初遷御史中丞當官而行甚得司直之體出為義興太守有能名尋轉太常致仕隆手不釋卷博學多通尤精三禮當世宗之

唐韓游環始為郭子儀裨將從討安祿山功第一朱泚之亂游環扈衛在奉天李懷光叛約游環為變游環發其謀帝詔嘉之後平賊功與渾瑊齊史敬奉有才武走逐奔馬矛矢在手前無強敵破吐蕃解益州圍益封五千戶語在宦蹟

何進滔少客魏事田宏正宏正攻王承宗承宗引精騎千餘馳魏壁進滔率猛士逐之幾獲承宗從討李師道以功兼侍御史史憲誠死軍中傳語曰得何公事之軍安矣進滔下令曰公等既迫我當聽吾令衆唯唯執殺前使及監軍者斬九十餘人釋脅從者素服臨哭將吏皆入吊詔拜留後俄進授節度使居魏十餘年吏民悉安之

康日知少事李惟岳擢趙州刺史惟岳叛日知與別駕李濯及步將百人共盟固州自歸惟岳怒遣



兵馬使王武俊攻之日知使客說武俊還斬惟正以獻德宗美其謀擢深趙觀察使會武俊叛命遣將攻趙州日知破之上俘京師徙奉誠軍節度使又徙晉絳加檢校尚書左僕射封會稽郡王卒贈太子太師子志睦亦以功封會稽公

宋周美字之純以才武稱真宗幸澶淵常令宿衛累遷秩副都總管在邊十餘載所向有功諸將服之周永清字肅之世家靈州州陷於夏祖美後歸京師永清以廕從任宰相龐籍薦其忠勇加閣門祇

侯押時服賜夏國夏人受賜不跪詰之恐而跪歷渭川鈴轄渭兵勁而陣伍不講永清訓以李靖法帥蔡挺上其圖以令諸軍知順德軍夏衆入寇擒其首呂效忠募勇士夜襲夏帳斬三百級俘數千人獲駝馬甲器萬計威名甚著擢涇原路鈴轄知

涇州

幹道冲字聖宗其先仕偽夏主世掌國史道冲通五經為番漢教授譯論語註別作解義三十卷又作周易十筮斷以其國字書之行於國中後官至



其國之中書宰相

明周鏞字蒲溪以歲貢任平定州訓導陞靈州所教諭讀書窮理兩任司鐸恒以道德與諸生相長都給事中俞鸞出其門

孟養龍崇禎元年恩貢工詩文尚氣節關賊遣兵攻城養龍糾衆捍禦州境卒全寧夏道黎士宏撰墓誌詳載其事著有吹萬吟

國朝孟之珪康熙甲戌進士天姿穎異品行端方文章字學兼有名於時立條教闡明理學至今靈武學

靈州誌蹟

卷三

九

士皆宗仰之

謝王寵字賓于幼孤負好學冬月藉草讀書康熙壬午中鄉試丙辰成進士選翰林院庶吉士尋告假回籍雍正元年

特旨召見問所讀何書寵以性理對命講太極圖說

上大喜擢補山西雁平道訪求利病善政累累戊申春轉光祿寺少卿四月陞翰林院侍讀學士五月署國子監祭酒時太學藏書散失寵疏請秘閣發書



四十五部復自捐俸購經分給諸生誦讀已進順  
天府尹都察院左副都御史一歲中凡五遷辛亥  
七月調宗人府府丞尋以疾告休卒年七十三所  
著有反經錄

李源號誠菴雍正丁未進士累官監察御史糾彈  
無隱後以事罷歸寓居寧朔縣馬寨堡教授生徒  
以脩脯自給從遊者甚衆常以生平所身體力行  
者書存誠行恕敦孝弟戒淫行謹言語慎威儀嚴  
交遊立志節八則於學堂學者欽仰之

許體元字御萬賦質純朴沉潜理學尤精於易乾  
隆十一年舉優貢生任安定縣司訓值安定荒體  
元奉憲檄出賑遠近不遺貧民被澤甚夥尋告休  
著有春秋傳叙易經彙解卒年七十七

王寅字賓陽拔貢生性質和易端方所學有源本  
事親能似志養工詩古文教授於家遊其門者多  
以文學著稱子可久壬申科舉人孫晟庚子會試  
進士翰林院庶吉士

科貢附



進士

俞鸞 嘉靖辛丑歷官  
兵科給事中

孟之珪 國朝康熙  
甲戌

謝王寵 丙戌翰林院庶吉士歷官  
順天府府尹兵部人府府丞

李源 乙未主事山  
東鹽察御史

謝升 雍正庚戌知  
雲南府事

梁棟 乾隆丙辰知湖  
南興化縣事

李秘 乾隆丙辰知  
黃州府事

高遴 乾隆壬戌知  
黃岡縣事

陸允鎮 乾隆丁丑歷官  
浙江都察道

王晟 乾隆庚子翰林  
院庶吉士

舉人

李泰 成化癸卯  
知瀘州事

趙璽 宏治  
辛酉

俞鸞 見進士

陳有增 天啟  
丁卯

鄭感民 丁卯  
孟之珪 見進士

靈州誌蹟 卷三

六

李源 見進士

高宣 康熙  
甲午

李宗儒 丁酉

陳訥 庚子知樂  
平縣事

周昌祚 雍正丙午  
知河縣事

王加民 已酉  
縣教諭

謝升 見進士

梁棟 見進士

李玘 見進士

李紹 乾隆  
戊午

白貽遠 辛酉知慶  
雲縣事

陸允鎮 見進士

王可久 壬申  
中

潘濬 丁卯知嘉  
定府事

朱泚 庚午知巴  
東縣事

陸允銑 庚午知衡  
水縣事

李中翰 壬申知來  
鳳縣事

陸允鈞 癸酉知山東  
沂水縣事

姚信璧 癸酉山東  
水利通判

趙瓚 丙子知靖  
邊縣事

辛融 丙子西安  
府教授

常養蒙 己卯知上  
元縣事

王建元 己卯知  
濬縣事

林慎修 乙酉

王賜節 甲午咸寧宮教  
習邠州教諭

王晟 見進士

趙標 己巳



莊慶餘癸卯 梁聯第癸卯 梁聯箕丙午

陸溥戊申 祁颺廷甲寅 賀緯戊午 王敦厚壬子

科分無考

宋文元 季秋橘富平 張樹栢

貢生

趙文良甲申 金章丙戌 元經庚寅 趙泰辛巳 蔣泰壬午

何英壬辰 聞薰巳 彭廷玉甲午 王鑑庚子

趙佐丙申 山景率戊戌 張臻巳 王鑑庚子

王堂壬寅 陳榮甲辰 李瑞戊申 周鏞甲戌

靈州志蹟 卷三 士

元繡庚戌 江東丙辰 汪待龍 王邦戊午

王震 安惠明庚申 顧良臣 趙世輔壬子

燕臣 孫棟甲申 李儒蒲州

曹希仲丙寅 郭勛宣城 隆呂 韶戊辰 鎮

王維垣 馬椿巳巳 姚佐絳縣

王朝觀庚午 張梅庚午 沈一經壬申 魏汝舟

萬趙 璵癸酉 徐宰恩 趙世屏甲戌

王第 何鎮丙子 宣大治 東

王第 何鎮丙子 宣大治 東



周士觀

孟

召

庚辰選貢  
知涿州

陳邦政

知遼東  
縣事

季學程

壬午泰  
州博

李朝鸞

孫

桂

甲申沁水  
縣教諭

賈貞

丙戌

袁賓

郭

澳

戊子知梁  
山縣事

武

統在浪  
訓導

陳升

忻州  
判

呂

敏

選貢同知  
州事

戴

任知永  
州縣事

柳本正

丁酉

張守謙

戊戌

邵

保庚子  
安教授

劉應爵

文從謙

甲辰上蔡  
訓導

周志誠

丙午

羅

森

孫

禎

庚戌

趙

玠

乾隆

撒成鈞

己未

王

寅

庚申  
拔貢

孫文信

辛酉

李

鯤

靈州誌蹟

卷三

十三

許體元

甲子  
優貢

毛文郁

陳廷獻

己丑

馮益勤

黃恒

丁卯

初兆文

常著

戊辰

王

建

邵鏞

辛未

顧大夏

壬申

侯

銘

癸酉

郁承業

祝天佑

丙子

徐振綸

費作梅

丁丑

陳

閻

己卯

季

忻辛巳  
恩貢

趙體選

壬午  
恩貢

呂大南

癸未

蔡坤

乙酉

劉建業

馬鴻圖

丙戌

梁

渤

聶折桂

己丑

劉維本

庚寅  
城縣博

李獻捷

辛卯

施

辟壬辰

李兆基

甲子

李

護

壬辰

王

晟

拔貢

王鳳飛

丁酉  
拔貢

祁

綸

施維翰

戊戌



萬植 毛振辰 張鉅 王冲

劉興海 潘文煊 閻靖已 李裕

李仲庚 李繡 湯佐學 梁聯輝

陸淇 拔貢

年分無考

李際隆 榜副 季秋槐 榜副 戴廷諤 拔貢 季春光 拔貢

孟之珪 榜副 陳常 榜副 胡璞玉 拔貢 季海梁 拔貢

靈州誌蹟 卷三 十四

孟養貞 恩貢 李子發 恩貢 喻文 何秀

趙公盡 龍現光 趙誠 段九成

張芬 陸士謨 辛永祿 莊士儒

武進士

史經 正德戊辰歷官靈州參將 保周 庚辰靈州參將

郭震 嘉靖戊戌南官南京提督陝西總兵中左二府僉事

盧杜瑾 國朝康熙癸巳侍衛西寧提兵 王綏 雍正庚戌侍衛江南提督

乾隆

張鉅 丁巳侍衛貴州總督 梁聯科 辛未侍衛歷官參將 丑虎臣 壬申



吳登魁丑巳

李飛雲壬辰侍衛

科分無考

朱世植探花二等侍衛

辛永偉二等侍衛四川都司

季烜守備

馬名南探花副寧鎮總兵

朱濂都司

武舉

郭震見進士

何廷桂順治壬子

靳兆珠順治壬子

梁從直雍正甲辰

張樹棠浙江遊擊

雷育直隸都司

買成璋

丁琦

楊樹檜丙午

買成璟 李發元 孟鏞 雷光 朱洙配

靈州誌蹟 卷三

五

王綏見進士

朱泗配

雷子劍 張懋德

陳五教壬子

馬雲

張鉅 王字

施瑰 王可立卯 唐際盛 馬洗瑞

桂瑄 江玉瑞午戌 譚秉哲辛酉 郁振基甲子

朱績焜守備 丁洪仁 尹大本 尹虎臣見進士

陳錡卯丁 李廷售 李騰蛟庚午 馬負圖

梁聯科士見進 馬攀龍 馬建造 馬伯麒

趙雋 俞玠癸酉 買偉 戴如玉丙子

馬廷傑 尹俊 蘇珩 謝光國



張可成乙卯 張濬英 李維華 王訓庚辰

許嘉謨 朱震壬午 馬大昇 楊士雄

李榮武 蕪繩武 辛養性乙酉 朱理

王廷琳 王文魁戊子 王賜勳 陸允鎬庚寅

馬國璽 李玉堂辛卯 李飛雲見進士 李步堂甲午

徐大本丁酉 吳毓龍 吳廷杰乙巳 吳倬

王又賓 朱果 朱集才 劉藻 朱娘

科分無考

盧茂英 郁起蛟 郁起雋 周陝右 馬蛟

靈州誌蹟一 卷三

十六

韓濟 盧仲麟 文生儒 岳鍾靈 龐鏡

朱士樸 萬孔府 陸士雲 趙體仁 雷寵

楊體程 朱士植 辛永偉 季江 朱濂

馬名南 文星偉



人稟五常之性以生生者性之不死者也原夫赴鼎鑊蹈白刃義重生輕捐軀殉節豈匹夫之為諒與抑成仁之素志也至於聚薪流慟銜索與嗟灑風樹以隕心瀕寒泉而沫泣至性之感通神明焉若夫幽蘭弱質苦栢貞心早歲逢艱暮年勵節幾救誓忘聲悲寡女之絲飲泣撫孤淚染婺婦之績斯皆抱不死之心無虛生之愧足以激清風於萬古厲薄俗於當年者矣俎豆馨香永世勿替有以靈州誌蹟

也夫

宋裴濟知靈州興屯田之利謀輯八鎮趙保吉圍靈州餉絕援兵不至城陷濟死之

明許永都指揮守備靈州天順間追寇至河套鹿泉永乃據險掣全軍回力戰射死虜首數人又斃首子三人力竭自刎敵憤甚剗其肉煮其骨以灌駝趙壘指揮宏治六年與賊戰靈武口廟山墩下力盡遇害



成賢指揮膽勇出衆嘉靖十三年套騎四萬餘入  
寇賢從總兵王效為前鋒率八百騎迎於秦塢力  
戰移日賢獨當一面虜被傷者甚衆因併力攻之  
遂死事聞廢子梁為都指揮同時指揮呂仲良劉  
勲王濬與賢俱沒於陣

史開先勲之子靈州叅將長於將畧崇禎七年套  
虜數萬犯邊開先馳報寧夏巡撫總兵遂收集城  
外居民生畜入城深溝高壘以待固靖甘涼之兵  
賀虎臣自寧赴靈欲引兵拒戰開先切諫不聽婦

謂其長子曰我家世受國恩豈敢畏死此役也我  
必不復生還矣遂引兵先驅賀亦出遇賊於大沙  
井灘賊圍賀四面不能援勲僕史進才以急告開  
先策馬冲入重圍殺數百人外無援圍益逼遂遇  
害進才殉焉賀亦死時官軍死者七千餘人枕尸  
遍野不可別識公少為馬撞落二齒以銀鑲之家  
人以此為識僅得首以歸葬追贈右都督諡忠烈  
李世松州人性忠直善左右射耕於晏湖墩側插  
漢入世松率衆拒賊衆寡不敵人悉奔松獨守



上射賊輒斃賊恨甚攻圍益力凡兩日夜松左右  
大柏皆裂見骨被創死

江孔學州人居胡家堡挿首之變賊圍堡孔學登  
垣罵賊堡陷孔學自刎一家俱罹難

蔡應昌武興所千戶任花馬池千總明末羅凸土  
寇搶掠應昌勦賊血戰死

包永成庠生弟永明亦庠生明末賊破惠安堡凡  
弟不屈俱被害

侯知道程俱羅唐時人居親喪穿墻作墳皆身其  
靈州誌蹟

卷三

十九

勞鄉人助者即哭而却之廬墓次哭血無節知道  
七年俱羅三年不止知道垢塵積首率夜半繞墳  
踊哭鳥獸為悲號李華作二孝贊表其行詳藝文  
徐勇州人事母孝謹母年九十四勇自少至老飲  
食起居未嘗稍離鄉黨稱之劉東陽之變勇率眾  
守城兩獻俘馘

趙誠州人奉繼母至孝母歿朝夕哭奠終喪不御  
酒肉著有易經述古百一稿

陸國相明昭信校尉養二親能先意承志父萬乾



病甚衣不解帶虔禱於藥王後服劑隨愈因力脩藥師殿在郡城間母喪徒步馳歸喪毀骨立時天旱蝗惟國相種穀數十畝無損人以為孝感所致國相以所獲分貸里中貧者

于翼龍衛學生家棗園堡崇禎中侍母郝氏往張思堡為弟納聘途次乾河墩突遇寇掠生奮不顧身棄所攜幣以餽賊負母疾馳得免官為給致身救母顏以旌其門

鄭興基衛學生家花馬池值年荒其父為虜掠去

興基詢知父在板城隻身徒步趨父所板城在北口外道經山西時晉省大旱人相食興基奮不顧難決意長往間聞至殺虎口得達板城父子相見抱持大哭見者俱感動有喇嘛僧憐其孝贈馬二匹銀十兩衣二襲令其歸興基遂奉父旋里

李宗儒花馬池監生雍正二年早山堡人多逃竄儒曰我家尚有粟三窖願與鄉里共之食盡同竄未晚也由是一方胥濟是年除夕夢一人偉衣冠囑曰明歲鄉試汝必往切勿悞醒而異之及期勉



強入園果中二十四名舉人

姚進福惠安堡人居鄉樂善好施予值歲大旱山堡一帶皆赴州領賑惠安僅產鹽非地丁不在賑例百姓聞聲携持老幼越兩日程至州既不得糧又乏歸路費羣情窘甚時進福商販到州哀其情代請於監牧廳王公願以已房千金作質借官糧三百石散給無賑飢民公允其請語該官還其券並給義氣可風額以旌之又惠安居民千家食水惟城北二井屢為沙壓進福捐貲脩浚利及桑梓

靈州誌蹟

卷三

二十一

烈女馬氏許聘營卒羅伏受為妻聞夫陣亡哭五日不食死

烈女蕭氏州民張文彩妻文彩素與同里楊文厚文見蕭氏少艾欲污之氏堅不從以線自縫其衣防閑極謹文懟甚轉以氏行不端譖文彩彩信其言給氏婦寧竟與文共殺氏於墩坡溝後得昭雪

雍正十二年

旌表入祠

李氏州民吳連妻連姊夫徐龍章素強暴慕其色



以言誦之守正不從後強犯之氏叫詈遂被殺後蒙

旌表入祠

郭氏州民陳鳳妻鳳賈遊歿於外郭年二十一忍死奉姑誓不渝志年八十終

李氏生員王式閭妻年二十七夫亡時翁姑年邁遺子甫周歲家計蕭條氏晝夜勤苦訓子澤深成立入泮守節三十三年終

竇氏州民姚欽妻夫亡時遺孤一歲氏年二十四守節四十一年終

靈州誌蹟

卷三

二十二

韓氏州民許津妻年二十六夫亡遺子開元甫五月家徒壁立茶苦備嘗事孀姑以孝聞撫子成立苦節三十四年終

蔡氏馬健明妻年二十六夫亡上奉翁姑下撫幼孤艱苦備嘗終始如一守節五十一年終

梁氏魏錦妻年二十九歲夫亡守節三十六年終姚氏監生朱士挺妻年二十五夫亡守節三十八年遺腹子洙亦勵志讀書早擢士林



王氏何騰遠妻年二十三夫亡守節三十三年

郭氏劉得先妻年二十七夫故遺腹未產矢志不移守節六十五年壽至九十餘

王氏周榮妻年二十八夫故姑老子幼家計貧窘氏孝慈兼盡茹苦三十七年終

魏氏文運祥妻年二十七夫亡守節四十九年撫子振孟成立為國學生

沈氏張仁妻年二十七夫亡守節四十二年

王氏何光國妻年二十五夫故守節四十九年

李氏何嗣俊妻年二十二夫故斷髮自矢堅貞不移苦節四十五年事孀姑以孝聞

常氏施祈經妻于歸二年夫故氏年十八勤脩紡織孝事翁姑撫育孤子教誨成人苦節三十二年鄉里並稱其德

張氏生員高日棟妻于歸三年夫故氏年二十歲時二親皆七旬有餘孤子甫周歲家貧甚氏紡織度日曲盡孝慈苦節四十一年毫無怨色

王氏田盡忠妻年二十一夫故守節三十九年



王氏吳世熹妻守節四十年仰事俯育各盡其道  
清標玉立鄉黨稱焉

許氏生員級景妻年二十五夫故苦節四十年  
常氏生員馬景良妻于歸一年夫故氏年十七秉  
性堅貞備嘗辛苦守節三十二年卒

鍾氏盧復嗣妻年十九夫故家計拮据茹苦終身  
守節三十年卒

周氏許昭妻年二十三守節禮法自持閨門嚴整  
四十餘年外人罕覩其面鄉里稱之

靈州誌蹟一 卷三

二十四

王氏萬挺妻年二十一夫故守節三十九年

呂氏郭嵐妻年二十歲夫故守節三十九年

烈婦黃氏者吳忠堡農家女也適馮氏夫名廷舉  
朴而駸為人傭工氏食貧操作隣居未嘗聞詬詈

聲回民保文元素狡黠與比閭窺氏色悅之心念  
其家貧甚謂可以利誘乃貸其夫錢若干陽為索  
逋至其家微以言挑之氏揣知其意弗善因以針  
繭之餘促還其逋屬其夫後勿與往來文元知無  
隙可乘欲以強劫之一日伺其夫外出徑攜餅餌



至氏家出褻狎語氏斥詈之文元復加以恫喝氏  
張目大罵曰汝所為乃禽獸之不若吾視汝真猪  
狗也且吾不畏死寧怯汝耶言次即取所攜餅還  
擲其面文元怒批其頰氏且哭且詈因大呼隣媪  
聞聲趨視文元始逡巡去氏恚憤甚其夫婦隣媪  
具語之仍勸慰氏氏飲泣無一言夜乘夫熟寢自  
經於牖側文元恐以利啖其夫冀息其事氏叔黃  
某控於州官往詆其屍氏面色如活掌痕宛然立  
拘文元至訊鞫得實寘之法具以狀上聞

嘉慶肆年

詔旌其閭



自書契肇興而藝文斯尚原厥體要蓋有二焉曰  
經濟曰諷誦諷誦之文主於抒寫性靈敷揚文藻  
詞華之工於斯為盛若乃因時度務言堪底績陳  
之當時而灼如著蔡傳之奕世而炳若丹青斯誠  
著述之宏規立言之不朽矣故余輯靈州誌於藝  
文所錄率多名臣 奏章廟堂 碩畫其他銘頌  
序記亦取按切事勢關係政化者詳為蒐集庶有  
益於經濟至於諷誦之文不過畧存梗概而已後  
之覽者亦將有取於是與

請復三郡疏

漢 虞 詡

臣聞子孫以奉祖為孝君上以安民為明此高宗  
周宣所以上配湯武也禹貢雍州之域厥田為上  
且沃野千里穀稼殷積又有鹽池以為民利  
水草豐美土宜產牧牛馬銜尾羣羊塞道北阻山  
河重阨據險因渠以溉水春河漕用功省少而軍  
糧饒足故孝武皇帝及光武築朔方開西河置上  
郡皆為此也而遭元元無妄之災衆羗內潰郡縣



兵荒二十餘年夫棄沃壤之饒損自然之財不可  
謂利離山河之阻守無險之處難以為固今三郡  
未復園陵單外而公卿選懦容頭過身張解難設  
但計所費不圖其安宜開聖德考行所長

西河修城表

魏刁雍

臣聞安不忘亂先聖之政也况綏服之外帶接邊  
城防守不備無以禦敵者也臣鎮所縮河西爰在  
邊表常懼不虞平地積穀實難守護兵人散居無  
所依恃脫有妖奸必至狼狽雖欲自固無以得全

今求造城儲穀置兵脩守鎮自建立更不煩官又  
於三時之隙不令廢農一歲二歲不訖三歲必成  
立城之所必在水陸之次大小高下量力取辦

論邊事疏

宋宋琪

臣頃任延州節度判官經涉五年雖未嘗躬造夷  
落然常令蕃落將和斷公事歲無虛月藩部之事  
熟於聽聞大約党項吐蕃風俗相類其帳族有生  
戶熟戶接連漢界入州城者謂之熟戶居深山僻  
遠橫過寇略者謂之生戶其俗多有世讐不相來



往遇有戰鬪則同惡相濟傳箭相率其從如流雖各有鞍甲而無魁首統攝並皆散漫山川居常不以為患党項界東自河西銀夏西至靈鹽南距鄜延北連豐會厥土多荒隙是前漢呼韓邪所處河南地幅負千里從銀夏至清白兩池地惟沙磧俗謂平夏拓拔蓋蕃姓也自鄜延以北多土山栢林謂之南山野利蓋羌族之號也從延州入平夏有三路一東北自豐林縣葦子駟至延州縣接綏州入夏州界一正北從金明縣入蕃界至盧關四五

百里方入平夏州南界一西北歷萬安鎮經永安城出洪門至宥州四五百里是夏州西境我師如入夏州之境宜先招致接界熟戶使為鄉導其強壯有馬者令去官軍三五十里踏白先行緣此三路土山栢林溪谷相接而復隘陁不得成列攝此鄉導可使步卒多持弓弩槍鋸隨之以三二千人登山偵邏俟見坦途寧靜可傳號勾馬遵路而行我皆嚴備保無虞也長興四年夏州李仁福死有男彛超擅稱留後當時詔延州安從進與李彛超



換鎮彘超據夏州固不奉詔朝廷命邠州藥彥調  
總兵五萬送從進赴任時頓兵城下議欲攻取軍  
儲不繼遽命班師而振旅之時不能嚴整夾戈棄  
甲遂為邊人之利臣又聞党項號為小蕃非是勅  
敵若得出山步陣止勞一戰便可盪除深入則饋  
運艱難窮追則窟穴幽隱莫若緣邊州鎮分屯重  
兵俟其入界侵漁方可隨時掩擊非惟養勇亦足  
安邊凡烏合之徒勢不能久利於速鬪以騁兵鋒  
莫若持重守疆以挫其銳彼無城守衆乏餼糧威

賞不行部族分散然後密令覘其保聚之處預於  
麟府鄜延寧慶靈武等州約期會兵四面齊進絕  
其奔走之路合勢擊之可以翦除無噍類矣仍先  
告語諸軍擊賊所獲生口資畜許為已有彼為利  
誘則入百其勇也靈武路自通遠軍入青岡峽五  
百里皆藩部熟戶向來使人商旅經由並在部族  
安泊所求賂遺無幾謂之打當亦如漢界逆旅之  
家宿食之直也此時大軍或須入其境則鄉導踏  
白當如夏州之法况彼靈州便是吾土芻粟儲蓄



率皆有備緣路五七程不煩供饋止令逐都兵騎  
裹糧輕齎便可足用該所謂磨鑣殺馬劫一時之  
力也旬浹之餘固無闕乏矣

上經制西邊疏

張齊賢

臣在先朝常憂靈夏兩鎮終為繼遷并吞言事者  
以臣所慮為太過畧舉既往之事以明本末當時  
臣下皆以繼遷只懷戀父祖舊地別無他心先常  
與以銀州廉察庶滿其意爾後攻劫不已直至降  
麟府州界八部族蕃酋又脇至賀蘭山下帳族言

事者猶謂封獎未厚泊陛下賜以銀夏土壤寵以  
節旄自此姦威愈滋逆志尤暴屢斷靈州糧路復  
撓緣邊城池數年之間靈州終為吞噬當靈地清  
遠軍垂欲陷沒臣方受經畧之命臣思繼遷須是  
得一兩處强大蕃族與之為敵此乃以蠻夷攻蠻  
夷古今之上策也遂請以六谷名目封潘羅支俾  
其展効其時近臣所見全與臣謀不同多為阻撓  
及繼遷為潘羅支射殺邊患可謂少息今其子德  
明依前攻劫拆逋遊龍鉢等盡在部下其志又似



不小臣慮德明乘大駕東幸之際去歲六谷則瓜  
沙甘肅于聞諸處漸為控制矣向使潘羅支尚在  
則德明未足為慮今潘羅支已亡廝鐸督恐非其  
敵望委大臣經制其事

上靈州事宜疏

張齊賢

靈州斗絕一隅當城鎮完全積路未梗之時中外  
已言合棄自繼遷為患以來危困彌甚南去鎮威  
約五百餘里東去環州僅六七日程如此長途不  
須攻奪則城中之民何由而出城中之兵何由而

歸欲全軍民理須應接為今之計莫若增益精兵  
以合西邊屯駐對替之兵從以原渭鎮戎之師率  
山西熟戶從東界而入嚴約師期兩路交進設若  
繼遷分兵以應敵我則乘勢而易攻且奔命道涂  
首尾難衛千里趨利不敗則禽臣謂兵鋒未交而  
靈州之圍自解然後取靈州軍民而置若於蕭關  
武延川險要處以僑寓之如此則蕃漢土人之  
有所依賴裁候平寧却歸舊貫然後從蕃漢之  
乘時以為進退則成功不難矣



上備邊疏

張齊賢

清遠軍陷沒以來青岡砦燒棄之後靈武一郡援  
隔勢孤此繼遷之所覬覦而必至者也以事勢言  
之加討則不足防患則有餘其計無他蕃部大族  
首領素與繼遷有隙者若能啗以官爵誘以貨利  
結之以恩信而激之利害則山西之蕃部族帳靡  
不傾心朝廷矣臣所領十二州軍見二萬餘人若  
緣邊料東本城等軍更得五萬餘人招致蕃部其  
數又踰十數萬但彼出則我歸東備則西擊使之

奔走不暇何能為我患哉今靈武軍民不翅六七  
萬陷於危亡之地若繼遷來春於我兵未舉之前  
發兵救援靈武盡驅其衆并力攻圍則靈州孤城  
必難固守萬一失陷賊勢益增縱多聚甲兵廣積  
財貨亦難保必勝矣臣所以乞封潘羅支為六谷  
王而後以金帛者恐繼遷旦暮用兵斷彼買馬之  
路也苟朝廷信使得達潘羅支則泥埋等族西南  
遠蕃不難招集西南既稟命而緣邊之勢張則廊  
延環慶之淺蕃渭原鎮戎之熟戶自然歸化然後



步騎五千守之涇原渭川苟有緩急會於此軍并力戰守則賊必不敢過此軍而緣邊民戶不廢耕織熟戶老幼有所歸宿此軍苟廢則過此新城止皆廢壘有數路來寇若自隴山下南去則由三百堡入儀州制勝關自瓦亭路南去則由彈箏峽入渭州安國鎮自清石嶺東南去則由小盧大盧潘谷入潘原縣若至潘原而西則入渭州東則入涇州若自東石嶺東公主泉南去則由東砦故彭陽城西並入原州其餘細路不可盡數如以五千步

騎令四州各為備禦不相會合則兵勢分而力不足禦矣故置此城以扼要路即令自靈環慶鄜延石隰麟府等州以外河曲之地皆屬於賊若更攻陷靈州西取回鶻則吐蕃震懼皆為吞噬西北邊民將受驅劫若以可惜之地甘受賊攻便思委棄以為良策是則有盡之地不能供無已之求也臣慮議者以調發芻糧擾民為言則此軍所費上出四州地里非遙輸送甚易又劉綜方興屯田屯田若興積中有備則四州稅物亦不須得况今繼遷



使之與對替甲兵及駐泊軍馬互為聲援則萬山  
間之必不敢於靈州河西頓兵矣萬山既退則賀  
蘭蕃部亦稍稍叛繼遷矣若曰名器不可假人爵  
賞不可濫及此乃聖人為治之常道非隨時變易  
之義也

奏疏

李繼和

初繼隆之請城鎮戎軍也朝廷不果於行繼和面  
奏曰平涼舊地山川險阻旁扼夷落為中華襟帶  
城之為便太宗乃許焉後復不守咸平中繼和又

靈州誌蹟

卷三

三十三

以為言乃命版築以繼和知其軍兼原渭儀都巡  
檢使城畢加領平州刺史建議募貧民及弓箭手  
墾田積粟又屢請益兵朝議未許上曰苟緩急部  
署不為濟師則或至失援矣命繼和兼涇原儀渭  
幹轄時繼遷未弭命張齊賢梁顥經畧因訪繼和  
邊事繼和上言鎮戎軍為涇原儀渭北面屏蔽又  
為環慶原渭儀秦熟戶所依正當回鶻西涼六谷  
吐蕃咩連賤遇馬臧梁家諸族之路自置軍已來  
克張邊備方於至道中所葺今已數倍誠能常用



強盛有踰曩日從靈州至原渭儀州界次更取隰  
子山以西接環州山內及平夏次并黃河以東以  
南隴山内外接儀州界及靈州以北河外蕃部約  
數十萬帳賊來足以闚敵賊遷未盛不敢深入今  
則靈州北河外鎮或軍環州並北徼靈武平夏及  
山外黃河以東族帳悉為繼遷所吞縱有一二十  
族殘破奔迸事力十無二三自官軍瀚海失利賊  
俞猖狂羣蕃震懼絕無鬪志兼以咸平二年棄鎮  
戎後繼遷徑來侵掠軍界蕃族南至渭州安國鎮

北一二十里西至南市界三百餘里便於蕭關屯  
聚萬子米漚西嵐等三千以脅原渭靈環熟戶常  
時族帳謀歸賊者甚多賴聖深遠不惑羣議復置  
此軍一年以來蕃部咸以安集邊民無復愁苦以  
此較之則存廢之說相失萬倍矣又靈州遠絕居  
常非尺布斗粟以供王府今關西老幼疲苦轉餉  
所以不可棄者誠恐滋大賊勢使繼遷西取秦城  
之羣蕃北掠回鶻之健馬長驅南牧何以支吾昨  
朝廷訪問臣送芻糧道路臣欲自關至鎮戎城



若西就胡盧河川運送但恐靈州食盡或不守  
清遠固亦難保青岡白馬曷足禦捍則環州便為  
極邊若賊從蕭關武延石門路入鎮戎縱有五七  
千兵亦恐不敵即回鶻西涼路亦絕斷伏見咸平  
三年詔書緣邊不得出兵生事蕃夷蓋謂賊如猛  
獸不拂其心必且不動臣愚慮此賊他日愈熾不  
若聽驍將銳旅屢入其境彼或聚兵自固則勿與  
鬪妖黨纒散則令掩擊如此則王師逸而賊兵勞  
賊心內離然後大舉及靈州孤壘戍守最苦望比

他州尤加存恤且守邊之臣內憂家屬之窘匱外  
憂奸邪之憎毀憂家則思為不廉憂身則思為退  
跡思不廉則官局不治思退跡則庶事無心欲其  
奮不顧身令出惟行不可得已良由賞未厚恩未  
深也賞厚則人無內顧之憂恩深則士有效死之  
志古之帝王皆懸爵賞以拔英俊卒能成大功大  
允君子求名小人徇利臣為兒童時嘗聞齊州防  
禦使李漢超守關南齊州屬州城錢七八萬貫悉  
以給與非次賞賚動及千萬漢超猶私販權場規



免商筭當時有以此事達於太祖者即詔漢超私  
物所在悉免關征故漢超居則營生戰則誓死貨  
產厚則心有繫必死戰則動有成績故畢太祖之  
世一方為之安靜今如漢超之材固亦不少苟能  
用皇祖之遺法選擇英傑使守靈武高官厚賞不  
吝先與徃日留半奉給其家半奉資其用然後可  
以責潔廉之節保必勝之功也又戎事內制或失  
權宜漢時渤海盜起龔逐為太守尚聽便宜從事  
且渤海漢之內地盜賊國之饑民况靈武絕塞西

鄙疆戎又非渤海之比苟許其專制則無失事機  
縱有營私冒利民政不舉亦乞不問用將之術異  
於他官貪勇智愚無不皆錄但使法寬而人有所  
慕則久居者安心展體竭材盡慮何患靈州之不可守哉

請復兵餉原額疏

巡撫 楊應聘

題為兵餉不敷搜借久空套虜渝盟陷危可虞懇  
乞聖明亟復原額補發借欠以濟兵食以資戰守  
事臣猥以謏庸誤蒙我皇上任使授以西河衝邊  
重寄臣感恩思奮誓欲捐糜此軀以圖報稱故視



事之始即清查本鎮錢糧兵馬數目見得廣裕庫冊報軍餉等項率開借嘉本詢及借過各項大都解到即還還後復借而借出之數常多還入之數常不足年復一年不足者竟成烏有因面問前任談道僉事龔文選並見任監叔同知王廷極俱面稱軍餉缺乏之由蓋自壬辰遭變善後添兵題增淮蘆引價銀四萬五千兩原是計口計食經制已定之數乃自萬歷三十七年談部停革以致軍餉坐匱節年那借市本業已積至十三四萬虛懸在

冊今軍餉既無終歲之計而市本且有耗罄之耻興言至此皆蹙額攢眉憂形於色彼時諸虜尚爾相安外侮未形臣仍照前撫臣崔景榮原議量討再復二萬常額亦不敢外討補發借欠者祇仰體內帑匱乏時際不偶期以節省自在欲將逃故斟酌勿補漸次縮兵就餉良非得已不虞自閏八月以來突遭套虜吉能火落赤發難延鎮東西號名以圖牽制兩河諸酋咸思蠢動分地謀犯羽檄交馳無處不備亦無處不寡鎮城聽詢軍丁止於前



後二司不過五百正遊二營量留貼防近城堡分  
又多步卒一經調發壁壘遂空戍守幾於無人岌  
岌危殆之勢真同累卵臣嘆居恒無事每嫌兵多  
耗餉及目擊此時更不勝空拳搏虎之恐總計寧  
夏一鎮全兵纔三萬三千餘名除各墩堡哨守及  
驛遞儀校外實在營陣應敵之兵不過萬餘以兩  
河孤懸三面受敵之地而兵力僅僅若此雖增之  
不易而汰之實難兵不容汰餉豈容減此不待智  
者而決也計閭鎮額餉總少月餘之支尚有閏月

不與且本鎮未款之前原有京運客兵銀二萬兩  
專供防秋客兵支用後因虜款停革一萬兩止發  
一萬兩充作市本節年防秋客兵俱支此銀聊足  
相當此係就平時無事言之耳今秋虜氛驟發詢  
固原等處兵馬防援日久支用錢糧數倍此時兼  
值歲歉穀價騰湧益糧銀易併併交納隨納隨支  
猶不接濟每粟一鍾可費往年之二更苦天旱野無  
芟草收買載運即至近者不下百餘里外每芻一  
束費又不啻往年之三目下客兵雖退而倉場已



竭主兵之需固未已也况諸虜不過因草枯暫爾  
踰伏然業已敗盟款事便難收拾明歲光景尚不  
可知兵端既肇戰守宜備所以備戰守鼓士氣者  
全在糧芻食不預足軍馬何所仰給士不宿飽戰  
守何以責成即欲及時儲峙而出入懸絕輾轉實  
難勝虜變動若彼軍餉匱乏如此所有原俸引價  
若不控籲議復彼至明歲夏秋馬壯羣醜控弦鳴  
鏑而來芻餉不繼騰飽無資士卒既不能枵腹與  
狂虜角旦夕之命而前有勁敵後有嚴法一呼庚

癸真可寒心臣縱不敢自愛髮膚誓竭駑鈍然亦  
豈有奇謀密術能點賀蘭之石為金煮黃流之水  
為粥以飼此不得不用命之卒而保此至危至重  
之鎮哉謹會同總督劉敏寬巡按龍遇奇合詞上  
請懇乞聖明軫念封疆安危關係匪細亟勅該部  
覆議合無每年量復二萬常額外將節年停過宿  
餉雖不敢望如前請十萬之數亦乞量補五萬稍  
抵借過各項虛懸缺額庶幾緩急應手而士卒之  
心可安戰守之氣可鼓內憂外侮之盟可消斗懸



孤鎮可保無虞矣謹題

請復兵餉原額疏

總督 黃嘉善

題為糧餉驟減兵難輕銷懇乞聖明俯賜復議事  
萬歷三十六年十一月內准戶部咨稱將寧鎮前  
議准蘆葦引折價銀四萬五千兩或革虛冒或汰  
老弱在於本鎮自行設處勿得以京運為常當以  
三十六年為止該臣備將本鎮營伍單弱地方困  
苦兵難裁減餉難措處等情移咨本部照舊議發  
乃遵行未幾復於三十七年十二月內准本

為京運匱極設處計窮再申前議臣查照本鎮越  
在河外三面受敵東起定邊西接甘固袤延千有  
餘里無處不衝視他鎮不啻稱孤懸矣而兵馬錢  
穀曾不及他鎮之十一此中外之所知歷查原額  
官兵共七萬有奇馬騾一萬有奇及節年消耗半  
減於前迨至壬辰之變而營伍殘壞並不可支是  
以當事諸臣目擊艱危題增兵馬及新增功陞官  
員俸糧加添軍丁月糧馬匹草料計每年共該增  
銀七萬一千四百六十五兩六錢八分議八年例



解發隨經本部議覆題奏欵依自二十二年為始  
即於本鎮添開淮鹽八萬引每引官價五錢蘆鹽  
二萬引每引官價二錢五分計一十萬引訣銀四  
萬五千兩隨同額鹽糧料招商輸納以充前餉仍  
少銀二萬六千四百六十五兩六錢八分先借大  
倉銀與同年例解發候運司徵完添引餘沒銀解  
京照數抵補此益引議設之原也嗣因前引招商  
掣支不便改易帶鹽折價以至於今雖節經議停  
而竟未支停者則以本鎮凋敝之故耳矧當時建

議原在事平特為善後而設非謂今日可增而明  
日可減目前可急用而將來可不必用也若必如  
部議停革勢必銷兵而後可邊疆重地誰能去兵  
此不待智者而決也又勢必常無事而後可然本  
鎮豈無事之區乎羣醜之向化未醇銀定之匪茹  
正肆兼以瘡痍甫起倉廩甚匱一遇有警猶不勝  
空拳搏虎之懼而再於軍餉中議裁匱誦中求省  
臣竊以為非計也且前餉兵糧雖云取給引價而  
解發不時每呼庚癸或暫借商金以濟然眉或折



兌商糧而滋偶語臣受事以來東那西補僅免脫  
巾每慮邊長兵寡議量加增而祇以錢糧難處竟  
從中止未敢請分毫於經制之外也今議以蓋法  
壅積減停引價以七十萬引帶十萬引之價猶易  
辦也而以四萬餘餉頓汰四千以外之兵其將能  
乎雖虛冒老弱難必盡無而屢經查開為數能幾  
額餉已歷多年一旦復行更革臣竊以為非體也  
至於設慶一節臣非不竭力撻刷第本鎮彈丸邊  
地別無郡縣徵輸之積向惟民屯蓋糧支吾接濟

在民糧額在西慶等府素疲州縣加以歲事不天  
常多逋負每年檄催徒煩僅完十之六七是正項  
且縮又甚分外加之乎則民糧措處之難矣在屯  
田自大兵之後繼以凶年邊民父子死徙相半又  
河灘沙壓虛懸糧草數多小民望空色賸已不勝  
苦方欲勘明題豁為殘黎請旦夕之命而可復筮  
楚橫征以益重其困耶則屯糧措處之難矣在蓋  
糧近因南中壅滯各商困苦見今台中不前視為  
陷阱即其乞憐陳情急迫可知則蓋糧又難之難



矣即今內帑如洗司農告匱臣敢不仰遵成命痛  
加節縮惟是無米而炊巧婦所難不食則饑負卒  
易動展轉籌思計無所出臣之不職何所逃罪然  
臣猶有說焉糧餉重務也省奢美名也假使減之  
安妄臣亦曷敢貽瀆第恐一減之後反增多事彼  
時即以起釁罪臣臣不敢辭竊恐所費不貲又不  
止十倍於此者非臣之所忍言也伏乞皇上軫念  
凋殘重地利害攸關勅下戶部再加酌議俯將本  
鎮前項原額淮蘆鹽引價銀四萬五千兩照舊議

發如或有防鹽務亦即於別項改撥增入年例每  
歲全發仍將三十七八兩年原停未發銀九萬兩  
如數補發以濟兵馬支用並將河南原兌欠三十  
四等年年例銀共八萬四千九百八兩零嚴催解  
鎮庶人心可安不致有洶洶虞矣謹題

蓋法議

張鍊

夫食鹽山澤自然之利天地所以養民也上古無  
征近古薄征以佐國用要在先不病民而後利國  
為可貴耳關中食鹽一出於河東一出於花馬池



一出於靈州一出於西漳靈州西漳去三輔絕遠專供靈夏洮岷西北兵民之用無容議矣花馬池鹽供延慶平三府寧榆二鎮南與河東鹽並行於三輔間河東鹽上下公行謂之官鹽花馬池鹽私自貿易謂之私鹽民間便於私鹽而不便於官鹽者百年於茲矣必欲行河東官鹽其弊有四蓋行鹽郡縣各有分界所司徒知緝上陳跡河東鹽行三省不可越縮若究其實山西河南未知何如其在閩中自長安以西河東美鹽絕跡不至間有至

者皆混澤苦惡中人不以入口唯耕夫孀婦黽勉食之計其所售無幾也名雖謂行其實未嘗行之一也往年商人慮惡鹽不售告發郡縣使所在輦運外加榷鹽色封印及之及以給民封者自佳輦者自惡唱戶分鹽畏如飲鴆計賤徵價峻於正稅今雖暫止既為故事恐不能已二也商人賣鹽於販夫隨以小票鹽盡票不收毀官鹽不至西路則無票無票則通責店肆負販細人請東路自買未毀之票繳官公人亦幸免責不問由來互相欺抵



三也買票日久奸人依式私製盜賣僥倖者冒利  
敗露者破家雖有防禦迄今未已四也必欲禁花  
馬池私鹽其弊有五關中民貧衣食驅遣賦稅催  
切罄家所有走北地販鹽莫獲升斗之利一為公  
人所獲身入陷阱家計盡空一也貧人既為囚繫  
內無供餽冬月多斃於獄考驛遞囚帳鹽徒居半  
死者又居於半民命可恤二也小販懼捕結聚大  
夥經山谿要隘偶遇公人勢強則抵敵勢弱則冒  
險奔迸投崖落澗人畜死傷塗地三也公人無有

力慣販者交關終歲不捕反為導護惟卑弱貧瘠  
者捕之或以升斗惡益強入路人筐袋執以報公  
使無辜受害四也衆役工食悉有定例惟巡捕工  
食私帮公費歲增十倍官吏比銷徒御勞悴動經  
時月候文曠職旅食空囊或罰或貸俱為無補五  
也夫物力不齊物之情也好美惡惡趨利就便民  
之情也所欲與聚所惡勿施衷多益寡因俗成務  
司國計者之情也以物力言河東舊商帶支坐因  
新商起納無幾澆晒徒勞增課未減公私俱稱歎



矣河東一池雖差大供三省則不足花馬二池雖  
差小供三郡二鎮則有餘自然之勢也以人情言  
河東鹽百方督之使行至以泥沙勒售假票甘罪  
而終不能行花馬池鹽百方禁之使不得行至於  
比屋破產接踵喪生而終不能禁者民之大欲大  
惡不可強也以國計言河東歲課一十九萬有奇  
花馬二池歲課不盈數千河東鹽一引三錢有奇  
二池鹽一石六分有奇如是相懸者意河東與天  
下六運自祖宗朝俱有定額由來久遠二池迫近

塞垣棄取不時故課亦微渺後來因循取足原辦  
而止耳夫河東鹽既不能及遠二池鹽卒不能禁  
民間又不可一日無鹽而盜買盜賣終非常理今  
當直開二池鹽禁使西鳳漢中沛然通行計三府  
所當常食鹽河東一十二萬有奇歲課即照河東  
責三府代辦以其事權統歸河東巡鹽御史則違  
觀無異督禁有程兩地歲徵四鎮年例保無纖爽  
而關中可少事矣夫居害者擇其寡與利者取其  
多倘今不弛二池鹽禁則愚民被連供餽為費贖



罪為費奸人騙詐為費兵民歲增工食為費官吏  
比銷為費一切顯隱猥雜不可會計財足抵河東  
花馬二池正課出於千瘡百痛徒然費之而下殘  
民命上損國體有餘殃也倘今一弛二池之禁則  
愚民被逮供餽可省罪贖可省奸人騙詐可省歲  
增工食可省官吏比銷可省一切顯隱猥雜不可  
會計財足抵河東花馬二池正課出於不識不知  
漠然省之而下活民命上全國體又餘福也夫入  
情不甚相遠比間益法待御皆一時英碩表表長

者使其間見悉如閩中人習知利害則亦何憚而  
不為良處哉但其受命而來也惟以行官益禁私  
益為職而反是則駭笑地非素履事未前聞雖三  
人有所不知者何可遽望改易其常耶雖然安國  
家利百姓大夫出疆之義也究理從長議政從便  
人心不昧因革有時此又閩斯民之幸不幸也

朔方形勝賦

明副使  
曹 璉

暨夏州之大郡實陝右之名邦當三邊之屏翰關  
千里之封疆廓開阜而為坦濶峽川澤而為湟角甌



鼉而為道卧蟠螭而為梁帶河渠之重沮奠屯戍  
之基張墾良田之萬頃撐喬木之千章益池澆澆  
瀆其隈菊井馥郁馨其傍桑梓相接棟宇相望若  
率土而論其邊陲則非列郡之所擬方也今焉載  
瞻其四維也漢隴蟠其西晉洛梗其東北跨沙漠  
之險南吞巴蜀之雄山奔突而若馳水旋繞如環  
雍廓遐郊其坦夷聳孤城之崇隆內則殿衙衢兮  
輻輳紛輿馬兮交通外則經溝塍兮刺錢畝原隰  
兮腴豐任土作貢而域雍兮星分井鬼罷侯置守

而隸靈兮民雜漢戎出河朔山川之外臨藩落境  
界之中青窺華嶽之隱隱翠挹岷峨之重重遙躋  
西嶺之屹屹近俯東湖之溶溶營興廣武坊旌効  
忠壩瀆積石関邇臨潼橋橫通濟兮接賓之鋪連  
棟園開麗景兮望春之樓凌空澹清潭兮天光雲  
影翠秀色兮綠水芙蓉赫連春曉兮日烘桃李靈  
武秋高兮風墜梧桐斜陽夕照荒祠兮落花啼鳥  
飛瀑暗懸峭壁兮玉澗垂虹轆轤呶軋兮影落蘆  
溝之夜月漁歌款乃兮響窮古渡之秋風於是高



臺日上長塔烟浮晴虹之影乍弄蒲牢之聲初收  
大河之水未波蠡山之雲不流藹華實之蔽野漫  
黍稷之盈疇石闕雪積兮銀鋪曲徑漢渠春漲兮  
練拖平邱騏驎如雲兮花馬之池鱗鯉盈肆兮應  
理之州平羅城兮執訊獲醜鳴沙洲兮落雁浮鷗  
城傾黑水兮類雉殘堞津問黃沙兮短檝輕舟神  
槎湮兮猶存博望之跡石峽鑿兮尚傳大禹之遊  
高塚巍哉兮元昊之魂已冷古剎煨燼兮文殊之  
像常留表賀獻俘而忠貫日月兮唐將之精靈耿

耿書抗偽跡而重邱山兮宋賢之遺韻悠悠此名  
天下播海陬而為西夏之勝概可與江南而匹儔  
者然猶未也若乃考其四時也春則杏塢桃溪霞  
鮮霧靄秋則鶴汀鳧渚月朗風微夏則蓮濯碧沼  
之金波嬌如太液池邊之姬媵冬則柏傲賀蘭之  
暗雪癯若首陽山下之夷齊與夫觀鷹鷂之雄度  
則凜凜乎周家之尚父也睹芝蘭之葱蒨則奕奕  
乎謝庭之子姪也對松竹之森立則挺挺乎汲黯  
之剛直也翫鷗鷺之瑩潔則皎皎乎楊震之清白



也以至芳林鶯語柳樹蟬聲又有若回琴點瑟之  
立夫孔楹也此皆玩耳目娛心志而為西夏之美  
觀不減江南之佳致者是使騷人墨客碩士英賢  
尋幽覽勝游樂流連於以羅珍饌列綺筵飛羽觴  
奏管絃品題詞藻繡句錦篇觥籌交錯屢舞僊僊  
撫乾坤之塊北掃亭障之烽煙詢古今於故老稽  
成敗於遺編方其王命南仲往城於方此何時乎  
迨漢郭璜繕城置驛浚渠溉田省費萬計蓋一盛  
也整居焦濩侵鎬及方此何時乎迨唐李聽興仆

舉廢復田省餉人賴其利又一盛也嗟夫時有盛  
衰治有隆替天道循環斯亦何泥方今聖主起運  
應符丕建人極重熙皇圖混車書於六合覃恩威  
於九區登斯民於懷葛躋斯世於唐虞矧茲夏州  
趨軼往古詩禮彬彬衣冠楚楚建學立師修文偃  
武尚陶甓貴簪組祛異端禦狎侮抑工商之浮華  
敦士農之寒苦沙漠塵空閭閻安堵白叟黃童謳  
歌鼓舞熊羆奮勇於陣行麋鹿潛行於巢所弓矢  
藏於服韋干戈戢於庫府而况蔭土封者惟德



義遠超樂善之東乎握將柄者有嚴有翼端繼為  
憲之吉甫予也一介之書生敢擬韓范之叅伍耶  
泚筆而紀行議者幸勿謂其狂魯

靈武受命宮頌

唐楊炎

臣聞享天隆命惟德也戡難奉時惟聖也必有非  
常之運是興撥亂之功君以蒼生為憂不以濡足  
為患此陶唐所以捨而不畏舜禹所以受而不疑  
靈武宮皇帝龍躍之所日者奸臣竊命四海蕩波  
我聖皇天帝探命歷之數啟龍圖作受命之書付

於我皇帝皇帝方遊崆峒以求至道於是羣公卿  
士負玉旅金壘望氣芒碭之野三進於閭闔之中  
曰臣聞在昔蚩尤連禍大盜中國神農民兵莫能  
勝天降元女敕軒轅氏大定其災厥後堯有九州  
之害而命禹禹以四海之功而受舜陛下主聖大  
位十有九年元德上違景福有歸六聖睹命歷之  
期兆人有臨難之請陛下畏災運而不寧棄黎元  
而不顧以至仁為薄以大寶為輕臣等若不克所  
請與億兆之衆將披髮拊膺歸於天而訴於帝矣



皇帝唯然改容曰豈人心與丁邠廣平王做大尉  
光弼司徒子儀尚書左僕射冕兵部尚書輔國與  
北軍將士西土耆老萬五千人排闥以訴帝曰今  
豺狼穴居宮闕陛下兆庶為餌宗廟為墟若臣等  
誠懇未通是高祖不歆於太廟且陛下涉渭則洪  
流涸迴鑿則慶雲見布澤而川池廣勤道而嘉禾  
生靈祇髣髴元貺幽感臣聞符命待聖而作天運  
否終而會歲蕤臍蠻會也睿武英明聖也臣等敢  
昧死上聞帝乃灑齋宮啟金匱嗚咽拜受詔有司

大赦天下改元曰至德元年尊聖父為文武大皇  
帝是日烟雲變作士庶踴躍黃龍見於東野紫氣  
滿於天門翌日也數百里衣裳會兼旬也數千里  
朝貢會踰月也天下兵車會浹時也四方重譯會  
以一旅成百萬之師率六軍平社稷之難禮郊祀  
戴聖皇與人合誠心以氣消天厲動罔不吉歆無  
不報是以白鹿擾於王廷靈芝產於延英化動而  
成功淵默而頌聲言神代者陋蒼梧易姓之名語  
嗣守者羞唐堯積善之辱述戡亂者嘆四紀而復



夏美中興者噓三六而滅新於戲神祇之所歸往  
品物之所法象鼓飛龍於尺水仗大義而東向矢  
謨發號實在此都願篆石宮廷以垂萬古俾過山  
澤知風雨之奧窮造化識天地之爐臣炎稽首敢獻  
頌曰赫赫河圖啟天之祐雲從億萬皇居九五惟  
昔陶唐克傳舜禹濩也武也夫何足數彼妖者勃  
惟暴惟貪天實即命人將不堪皇曰內禪於丹於  
三畫武之善去湯之慙兵車百萬洶洶雷震橫會  
九州為行為陣恃力者踣從命者順孝以奉天神  
沛邑空歌周原已古徘徊頌聲永介茲土

三受降城碑銘

唐石温

夏后氏遏洪水驅龍蛇能禦大菑活黔首周文王  
城朔方逐獫狁能捍大患以安中區若非高岸峻  
防重門擊柝雖有盛德曷觀厥成然則持璣璿而  
弛張萬象昊穹之妙用扼勝勢以擒縱八極王者  
之宏圖道雖無外權則有備變化消息存乎其人  
三受降城者唐皇之勝勢也昔秦不量力北築長



城右北洮臨左馳竭石生人盡去不足乘障而漢  
之後類為荒邱退居河許歷代莫進矯亡秦之弊  
則可矣盡中國之利則未然唐興因循未暇經啟  
有拂雲祠者在河之北地形雄坦控扼樞會虜居  
其下以窺域中禱神觀兵然後入寇甲不及環突  
如其不鯨一躍而吞舟虎數步而擇肉塞草落而  
邊吐懼河冰堅而羽檄走爰自受命至於中興國無  
寧歲景龍二年默啜強暴瀆隣構怨掃境西伐漢  
南空虛朔方大總管韓國公張仁愿躡機而謀請

築三城奪據其地跨大河以北嚮制胡馬之南牧  
中宗詔許橫議不撓於是留及瓜之戍斬姦命之  
卒六旬雷動三城岳立以拂雲祠為中城東西相  
去各四百里過朝那而北闢斥堠迭望幾二千所  
捐費億計減兵萬人分形以據同力而守東極於  
海西窮於天納陰山於寸眸拳大漠於一掌驚塵  
飛而烽火耀孤雁起而刁斗鳴涉河而南門用晏  
閑韓公猶以為未也方將建大旆提金鼓馳神策  
鞠虎旅者旄頭明滅興太白進退小則責責琛受



厥角定保塞一隅之安大則倒狼居竭瀚海空西  
塞萬里之野大畧方運元勳不集天其未使我唐  
無北顧之憂乎厥後賢愚迭任工拙異勢剛者黷  
武柔者敗律城隳險固寇得凌軼或馳馬飲河而  
去或控弦劇壘而旋吾知韓公不瞑目於地下矣  
今天子覃敷文德茂育羣生戢兵和親戎狄右袵  
然而軍志有受降如敵大易有安不忘危崇墉言  
言其可弛柝亦宜鎮以元老授之廟勝伸述舊職  
而恢遺功外勤撫綏內謹經畧使其來不敢仰視

去不敢反顧永讐猛氣無生禍心聳威馴息禽息  
荒外安固萬代術何加焉敢勒銘城隅庶復隍而  
光烈不昧銘曰韓侯受命志在翔易北方之強制  
以全策亘漠橫塞揭茲雄壁如三闕龍躍出大澤  
並分襟帶各閉風雷俯視陰山仰看昭回一夫登  
陴萬里洞開日晏秋盡纖塵不來時維韓侯方運  
神妙觀釁則動乃誅乃吊廓乎窮荒盡日所照天  
乎未釐不策清廟我聖耀德罷扃北門優而柔之  
用息元元曷若完守推亡固存于襄于夷永裕後



昆

靈州不可棄議 補遺此應在兵餉原額上

劉綜

咸平初靈州孤危獻言者或請棄之綜上言曰國  
家財力雄富士卒精銳而未能除剪凶孽者誠以  
賞罰未行而所任非其材故也今或輕從羣議欲  
棄靈州是中賊之奸計矣且靈州民淳土沃為西  
陞巨屏所宜固守以為扞禦然後於浦洛河遠軍  
城屯兵積糧為之應援此暫勞永逸之勢也况鎮  
戎軍與靈州相接今若棄之則原渭等州並須設  
備其勞費十倍而多則利害之理昭然可驗矣

靈州誌蹟 卷三

季六





長白岐東氏豐

捐廉修輯

靈州志

嘉慶戊午季冬





靈武二孝贊

唐李華

靈武二孝曰侯知道程俱羅目不觀朝廷之容耳  
不聞韶夏之聲不登齊魯之境所見戎馬旃裘  
於夷狄而能生養以孝沒奉以哀穿墻起墳出於  
身力鄉人助之者哭而反之廬於塚次號泣無節  
侯氏七年矣程氏二年矣根於天性陶我孝理其  
至矣乎埃垢積首草生髮間每大漠晨空連山夜  
寂人煙四絕虎豹與隣擁墳推膺聲氣咽塞下入

靈州誌蹟

卷四

一

九泉上徹九天背爛心朽皮枯節擗草木先秋而  
凋落景氣不時而凝閉殊鳥異獸助之悲號萬物  
有極此哀無窮大哉二子能以孝終始乎語曰孝  
如曾參不忍離其親生既不忍歿忍離之哉二子  
之孝過於曾參矣昔吳起忍與母盟陳湯忍匿父  
喪起謀復楚霸而戮死湯功釋漢耻而囚廢神道  
昭昭若何無報九州之衆誰非人子踐霜露者聞  
風永懷士有感一諾一頌猶或與之死生喜一草  
一木猶或為之歌詠而况百行之宗終天之感乎



華奉使朔陲欲親往弔焉屬河凌絕渡願言不果  
憑軾隔川寄聲二孝同為贊一章敢旌善人以附  
博史其文曰厥初生人有君有親孝於親者為子  
忠於君者為臣兆自天命降及人倫背死不義忘  
生不仁愚及智為就之禮文禮文不能節其哀緊  
道德之元純至哉侯氏創鉅病殷手足胼胝成此  
高墳蔬果為奠茅蒲為茵其奉也敬其生也貧大  
漠黃沙空山白雲柏庭既夕松路未晨寇戎接境  
豺狼成群夜黑颺動如臨鬼神哭無常聲迴徹蒼

靈州誌蹟

卷四

二

旻風雨飄搖交體鱗皴色慘我蒿聲酸棘薪首斬  
三年而獨終身邑子程生其哀也均顧後絕配瞻  
前無隣冬十一月河水寒津吾將弔之其路無因  
寄誠斯文揮涕河濱

河源記

元潘昂霄

河源在吐蕃朶甘思西鄙有泉百餘眼或潦水沮  
汝渙散方可七八十里且泥弱不勝人跡近觀弗  
克傍立高山下視燦若列星以故名火墩腦兒譯  
言星宿海也群流奔湍近五七里匯二巨澤名阿



刺腦兒自西徂東連屬吞噬廣輪馬行一日程迤  
遷東驚成川號赤賓河二三日程水西南來名亦  
里出合赤賓三四日程水南來名忽闌又水東南  
來名也里木合流入赤賓其流漫大始名黃河然  
水清人可涉又一二日岐裂八九股名也孫幹論  
譯言九渡通廣六七里為亦可渡又四五日程水  
渾濁土人挹草囊為過之民聚部落斜集木幹  
象舟傳毛草以濟僅容兩人繼是兩山岐東廣可  
一里二里或半里深莫測矣朵甘思東北鄙有大

雪山名亦耳麻不莫刺其山最高譯言騰乞里塔  
即崑崙也山腹至頂皆雪冬夏不消土人言遼年  
成冰六月見之自八九股水至崑崙行二十六日  
程河行崑崙南半日程既又四五日程至地名濶  
即及濶提二地相屬又三日地名哈刺別里赤兒  
四達之衝也多寇盜有官兵鎮防崑崙迤西人簡  
少多處山南山皆不窮峻水亦散漫獸有犁牛野  
馬狼狽獐羊之類其東山益高地亦漸下岸狹隘  
有狐可一躍而越之處行五六日程有水西南來



名納隣哈刺譯言細黃河也又兩日程水南來名  
乞兒馬出二水合流入河河北行轉西至崑崙北  
二日程地水過之北流少東又北流入河半月程  
至貴德州地名必赤里始有州治官府州隸河州  
置司吐蕃等處宣慰司所轄又四日程至磧石  
州即禹貢磧石云

靈州名賢祠碑記

僉事 張嘉謨 郡人

名賢者古今賢人之有名者也德行功業與夫利  
澤及人者雖所建不同顧因賢制名則一而已名

靈州誌蹟 卷四

四

亦非要而得之者也蓋實在此而名自若焉大而  
九寰四海小而一鄉一邑無地無賢而賢之名亦  
未嘗不流播後世不賢者欲致一人一日之名尚  
不可得况後世而為之祠乎靈為關陝襟喉國初  
以土漢之人雜居之今歷百年餘並見繁庶宏治  
中都憲曹南王公珣始議奏添靈州及州學授州  
之俊秀為生徒草創頃王公適去忌者從中以策  
已之正德已知都憲東黃王公時中撫邊之暇慨  
曰聖朝文教溥海內外無不誕敷而吾夫子之道



不以邊隅而或問州治未暇論是學可已乎乃復  
疏其興廢之由及夷夏之人之願上之皇上詢於  
禮曹卿屬議曰可遂復學焉未幾學師象相繼至  
公集舊學生復分寧夏餘生徒實之夫子廟及學  
舍悉修整倍昔固無名賢祠州人曰惟地有賢惟  
賢有祠天下之通議也靈雖遐邇或生於其地或  
仕於其方先後未嘗無賢不祠可乎乃各出羨餘  
市材木煨甄瓦聚土石鳩工役卜大成殿後為祠  
三楹案豆祭嘗悉有所取工始於正德庚辰三月

是歲八月事竣靈之守臣吳山趙璧士夫季赤馬  
璘師生龐經元元經及嘉謨咸擬古傳公燮在漢  
嘗仕議郎多直諫不避權貴康公曰知在唐為觀  
察使封會稽郡王忠拒叛逆於靈為文行先達可  
祀之擬前王公珣今王公時中於靈為功德及人  
可祀之偶聞於公公不悅曰他所擬者皆宜惟愚  
不可且興廢繼隆政之常耳僉復進曰古者禦大  
災捍大患以勞定國皆祠之公之功非特一學也  
若中路大沙井至萌城每五里築墩表延相望往



來行旅遂不為黠虜所掩添設中路參將一統兵  
馬三千今可以併遏虜寇清屯田之沙壓崩塌使  
老少殘疾之人得輕賦稅今得蘇息者不可勝數  
濟河凜而水利周修險隘而邊塞鞏潔無一芥之  
污勞無一日之停其功德及靈茲又大矣若為元  
祀尚宜曷不可乎公再力辭曰禮樂必俟君子愚  
智賢不肖必百年而後定其勿強焉復邀復答如  
初嗚呼若公者可謂不伐善不施勞而始終不變  
其執者靈之後人不能無賢且名者他日祀是祠  
為記

鉄柱泉記

管律

去花馬池之西南興武營之東南小蓋池之東北  
均九十里交會之處水湧甘冽是為鉄柱泉日飲  
數萬騎弗之涸幅幘數百里又皆沃壤可耕之地  
北虜入寇往返必飲於茲是故散掠靈夏長驅平  
鞏實藉之以其嬰是患也並沃壤視為葉土百七  
十年矣嘉靖十五年丙申都察院左都御史兼兵



都左侍郎松石劉公奉聖天子命制三邊軍務乃躬涉諸邊意在悉關隘之夷險城寨之虛實兵馬之強弱道路之緩急而後畫禦戎之策以授諸將是故霜行霍食弗避厥勞至鉅柱泉駐蹕移時喟然諭諸將曰禦戎上策其在茲矣可城之使寇絕飲固不戰自憊何前哲弗於是是圖哉維時巡撫寧夏右副都御史字川張公謀與公協乃力襄之即年秋七月丙申案察僉事譚大夫閻度垣墉量高厚計丈尺鎮守總兵官都督劾帥師徒具楨幹

從畚鍤人樂趨事競効乃力越八月丁酉城成環四里許高四尋有奇而厚如之城以衛泉隍以衛城工圖永堅百七十年要害必爭之地一旦成巨防矣置兵千五兼募土人守之設官操馭皆檢其才且能者慮風雨不蔽之患則給屋以居之因地之利而利則給田以耕之草萊闢禾黍苗又可以作牧而庶孳畜棄於百七十年者一旦大有資矣其廨宇倉場匪一不脩宏綱細節匪一不舉炫觀奪目疑非草創之者先時虜常內覘河東諸堡為



脩甚勤而必先之以食雖翔價博易猶虞弗濟泉  
既城虜憚南牧則戍減費省糴之價自不能騰實  
又肇來者無窮之益是皆出於公之卓識特見而  
能乎人所未能今年丁酉去茲泉南又百里許亘  
東西為牆塹於所謂梁家泉者亦城之重關疊險  
禦募之計益密矣借虜騁驕忌入之騎不得飲  
進則為新邊所扼退則為大邊所邀天受之矣用  
是以息中原之擾以休番戍之兵以寬饋餉之後  
豈第微公出將入相之才之德而已功在社稷與

黃河賀蘭實相悠久謂有紀極哉是故不可以不  
記也松石名天和湖南麻城人字川名文魁中州  
蘭陽人俱正德戊辰進士譚閩西蜀蓬溪人正德  
辛未進士王効陝西榆林人正德丁丑武舉法得  
脩書

重修邊牆記

巡撫 趙時春

國家威制四夷嚴岨封守而陝西屯四鎮強兵以  
控遏北虜花馬池尤為襟喉減其北而益之墉樓  
檜臺燈舖墩守哨之具星列幕布式罔不脩成化



以來其制漸渝黠酋乘利稍益破壞以便侵盜而  
大將率綺紈纓弁子莫或者禦朝議益少之始務  
邊臬將以功首級差相統制而巡撫都御史居中  
畫其計督監司主饋餉更請置總制陝西三邊軍  
務以上卿居之士象知爵賞可力致則颺起而諸  
將奏功相繼虜頗懾伏北引矣嘉靖十年總制兵  
部尚書兼右都御史王公瓊始興復之虜倘屯結  
恫喝未克即叙時用唐公龍來代博采郡獻惟良  
是是凡厥邊保悉恢故制寧夏夾河西遷亘數百

里顏垣墊洩於崇於濬嘉靖十四年秋工乃告竣  
請給官費僅二萬兩役不踰數千人無敢勞怨行  
者如居掠效用息是役也相其謀者則巡撫寧夏  
都御史楊公志學張公文魁繩其任者則巡按御  
史毛君鳳龍屠君鈇督其事者則按察司僉事劉  
君恩譚君閻至於擁衛士象過絕軼哭則總兵官  
都督王効咸協共王役贊襄洪猷是用勒銘以永  
後範銘曰曼高墉兮繚坤維踞尊收兮環虺螭鎮  
貊貉兮伏揆猱揚威稜兮世永熙



東長城關記畧

副使 齊之鸞

河東弁不毛千里皆古朔方地成化間即其處築長城三百餘里顧虜日抄掠而咸復差薄安足為障乎嘉靖乙丑虜入寇總制王公瓊破走之乃憑城極目套壤嘆曰城去營遠賊至不即知夷城入信響飛掣設險守國重門禦暴不如是也吾欲沿營畫塹聯外內輔車犄角之勢乃疏論之以之鸞與僉事張大用領其事庚寅秋就緒及冬虜入果不能越因復疏請自紅山堡之黑水溝至定邊之

南山口皆大為深溝高壘峻華夷出入之防塹深廣皆二丈堤壘高一丈廣二丈沙土易圯處則為牆高者長二丈餘有差而塹制視以深淺焉關而四清水興武安邊以營堡名在花馬池營東者為總要則題曰長城關高臺層樓雕草虎視凭欄遠眺朔方形勢畢呈於下毛卜喇堡設閘門一又視夷險三五里置周廬敵臺若於所皆設戍二十人乘城擊刺射敵之器咸具

楊王二公祠記

巡撫 霍冀



靈州一路乃寧鎮樞會之區北望不百里遠即為  
巢虜其地澶漫夷衍虜悍騎迅長驅莫之能制毒  
痛蔓延秦雍四民之苦於侵暴者久矣國朝成化  
間始自州北築長城三百餘里為扼險守固之計  
顧歲久圯剝虜易窺軼正德丁卯大學士少傅總  
制三邊遼庵楊公一清建議請發內帑脩復舊邊  
上報可發銀若干萬兩公畫地經費自橫城興工  
僅築四十餘里尋為逆瑾矯詔中止時虜患無寧  
歲也嘉靖己丑太子太保兵部尚書總制三邊晉

溪王公瓊復疏於朝請終其緒公得報身提重師  
經畧塞上工自紅山堡起至定邊止延袤四百餘  
里恢拓遺功克底成績而綜理贊翊之者則前為  
憲僉李君端澄後為齊君之鸞焉迄今數十餘年  
方內耕者牧者行旅者戍守者咸有時而無恐非  
諸公大造之功德耶嘉靖丁巳靈州鄉官王堂周  
鏞庠生呂清張俊劉應璧許宗魯等感今追昔爰  
謀立祠中路叅將徐仁和廼後先相繼脩需鳩工  
委指揮雍時等於城北構堂五楹翼以兩序重門



周垣罔不修飭祀揚王二公於其中而以二憲僉  
附享焉王堂等偕教官趙應奎屬余為序余惟先  
王之制有功德於人者則祀之聞茲長城之築楊  
王二公力任其事群議不撓而憲僉李君端澄齊  
君之鸞相繼督工險艱不避卒使崇墉岳立大患  
捍除即古之城朔方築降城者未之過也是皆功  
德顯著之甚大者合而祀之非禮也與語曰德厚  
者其感深功大者其思永今楊王諸公沒世垂數  
十年而士民之感思者無間於遠近今昔忻忻然

建祠舉祀蓋無所為而為之者又豈非天理民彝  
之不容已者耶噫揚王二公之德及一方功施一  
時者靈之士民固知之矣至於施之宗社被之天  
下者亦嘗知之乎揚公為相前後幾十年王公為  
尚書歷吏戶兵三部皆當正德之末嘉靖之初時  
值多故二公立朝議大政決大事苟利國家知無  
不為險難百折無所疑憚故能光輔盛業宏濟時  
艱在朝廷則朝廷重在邊鄙則邊鄙重蔚然為當  
代名臣余每思見其人敬奉奔走而不可得也近



以承之出撫夏州二年來亦得竊藉靈靈幸無他  
虞則所以崇報之者豈獨士民宜爾耶余既議行  
祀事復為之記俾刻石祠下以永邊人之思且使  
後來者有所感而興焉

平虜大捷記

狀元翰林 康海

嘉靖十三年甲子虜酋吉囊盤據河套數年秣馬  
勵兵將圖大舉入寇兵部尚書兼都察院右都御  
史唐公龍興總兵官都督同知劉文講畫戰守之  
法緩急遠近部署咸定七月初寧夏報吉囊結營

於花馬池唐公遂下令曰賊寇延綏鎮西將軍張  
鳳主之寇寧夏征西將軍王效主之寇固原都督  
劉文主之其當衝截突副總兵都督僉事梁震主  
之十四日巳知虜由定邊乾溝剗崖入鐵柱泉劉  
文堵截不得犯固原二十三日戊子乃從青沙峴  
入寇安會金三縣文率所部叅將霍爾崔高彭濬  
守備吳英崔天爵馳兵往赴明日巳丑戰於會寧  
柳家岔及葛家山斬其桀者數十人虜懼思遁文  
曰賊歸必自青沙峴遊擊將軍李勳守脩陶希臬



可趨青沙峴伏道以俟紅古城半箇城零賊之所  
必犯指揮王縉可按兵截殺二城無事海刺都乾  
益池鳴沙州石溝可安堵矣八月四日戊戌虜果  
合衆出青沙峴文督戰當衝伏兵盡起復大敗虜  
衆而王縉於半箇城與指揮田國亦破零賊前後  
斬首一百二十又七所獲達馬一百三十又二甲  
冑器械衣物一千九百三十又七梁震與叅將吳  
吉遊擊徐淮守脩戴經遇虜於乾溝大戰破之斬  
首一百八十又無所獲達馬二百又四器物四千

七百四十又七王效與副總兵苗鸞遊擊鄭時蔣  
存禮又遇虜於興武營大戰破之叅將史經劉朝  
分布常州張年又從苗鸞擺邊遇劉文驅虜結營  
北奔各哨奮勇而前後斬首一百三十所獲達馬  
二百又二器物二千一百六十又六虜幸得及老  
營晝夜亟遁故海刺都乾益池鳴沙石溝號牛羊  
富有之地雖緩行不敢正目視昔駐掠幽隴而諸  
將閉門籲天不能得一遺鏃何如哉十萬之虜經  
年在套秣馬勵兵欲圖大舉二旬之內連復三捷



蓋惟皇上神武聖文知人善任故唐公得以志心  
壯猷諸將得以據忠自奮爾語言上下相須千古  
為難豈不信哉唐公受命以來寒暑僅四閱也斬  
獲虜首殆及千餘威寧細溝之功北征已後謂為  
再見今日之捷視威寧細溝不知相去幾許廟堂  
與本兵大臣必有以休休之心翊贊皇度矣方諸  
簡冊周宣漢武不足言也邊方父老以予撰碑叙  
述其事周告將來辭曰惟明九業篤生聖皇允文  
允武帝德用昌因心宏化寵綏萬邦內治既洽息

被邊疆惠德有齊拂義必匡元臣若德迪惠厥常  
蠢茲首虜潛蠕幽荒教既未逮警亦屢徧盪據河  
套未遂驅攘屢犯屢挫曾不戒戍公壯其猷九伐  
斯張青沙之役易若驅羊興武既馘乾溝亦襄大  
舉反魃鼠竄惟囊恭惟神武所嚮必斂况此元老  
維德之行弗崇唐譽克屏譎狂稽勳者勩而無否  
臧元戎丕奮叅佐孔良節制四載其武湯湯皇心  
勿二公德愈光甲午之捷萬古所望後賢秉鉞尚  
慎勿忘



靈州河堤記

巡撫張九德

靈州阻河而城其西南當河流之衝復趨而北可  
十里每夏秋湍激受害不啻剝膚雖秦漢二渠溉  
田至數千頃而利與害錯其侵城實甚粵稽洪武  
甲子迄今城凡三徙皆以河故而河亦益徙而東  
自不佞來受事不一載去城僅數十武矣先是禦  
河歲役夫三千束薪十萬罔慮數百千金率委諸  
壑人情沟沟議徙民徙城以為長策不佞則謂禦  
河猶禦虜也虜闌入不偏之去猶延之入乎且勢

若建瓴而僅僅積薪委土與陽侯爭此助之決目  
計非巨石砥柱之不可獨慮費且不貲計無出不  
佞即捐月俸二百金為役者先而謀之薦紳邑令  
戴君任及諸生輩議堤以石無所事薪改徵河西  
年例柴價五百金軍民願輸地基銀八十兩暨諸  
捐助驗庫藏之羨合之得千四百有奇費用集矣  
則議民間量地畝出夫量田里出車調兩河營卒  
更番受役工力備矣乃造船百艘運峽口石往來  
不絕材具危矣遂請於先撫寧夏今制臺少司馬



介石李公前制臺今大司徒瞻予李公俱報可則以守備張大綬董隄務指揮孟養浩司出納經歷李盛春程工作大興石隄之役而議者紛若謂濱河皆流沙不受任石恐卒無成功適旋築旋潰衆口愈囂予堅持之曰此根虛易傾目水豈能負石而趨耶益令聚石投之一日盡八百艘三日基始定於是從南隅實地始累石為隄首四十餘丈用遏水衝繼以次迤西而北其累石亦如之計堤長六千餘丈功甫成而河西徙復由故道視先所受

嚙地淤為灘可耕可藝去城已十數里矣是役也經始於天啟癸亥之正月告成於天啟乙丑之四月凡費時二年有半費金九百一十有奇費米麥六十石而貯尚有餘羨念往歲議隄請帑金萬二千業奉旨下部覆不果今議約三千金猶慮不足至厯少司馬公損俸金百兩而同守盧君自立叅戎高君師孟等亦釀助有差然卒以有餘羨故蘭還是皆百執事殫心經畫靡有虛糜之成效也憶不佞初抵靈行河籌之再三始而秦渠堤隄水暴洩不



能灌溉為築長堤濬之歲比稔而漢伯渠又苦無  
尾間腴田皆成巨浸因以治隄之餘為開蘆洞長  
十三丈五尺高廣各三丈五尺自秦渠北岸抵靈  
橋疎渠道三十里馮水入河復故田數百頃增稅  
額數千石凡費金五十六兩有奇而椿鍊諸費不  
與焉古有言河者天下之大利大害也故周禮慎  
水政以防止水以瀦蓄水以溝蕩水其法甚備自  
隄石而城無受啗庶幾於河之害遠矣而二渠之  
役亦借以收其利不佞三年於此未事則憂物力

方事則憂成勞已事則憂久遠今幸三憂且釋得  
藉手告終事矣抑天下事惟賢者能慮始其次莫  
若因是三役者因法於古因石於山因為於民因  
能於衆因主裁於上獲道喜事之辜是皆今日所  
以成功之本也例不可以無記遂次其終始以係  
之銘銘曰渾渾經濟亘以金隄順流而西潛於靈  
府禔福下土聿肇靈武爰固我圉用昌我稷黍匪  
處白壁而崇紺蓋是維川后之仁俾無逢其藹宮  
亦越千禩曰寧以泰



靈州張公堤記

太僕少卿崔爾進

靈在寧夏鎮河以東劉綜所謂西陲巨屏居人三時農作寄命於河有渠曰漢延曰唐來俱西為鎮城所有其在東者秦家一渠古稱光祿等三渠百家等八渠今湮沒意當時兼東西渠名之或曰邗秦家支渠皆不可考渠故有堤土新間築旋築旋圯父之益廢不復治歲屢不登觀察張公既下車亮采惠疇大猷允迪數問民所困苦得此覈然謂非石礪無以集事于是相度鳩工躬為激督綜覈

不半載告竣延袤四百餘丈高厚堅緻亘如長虹水無壅滯泛濫頓成有年畚鍤之費出公捐俸及搜括贖鍰不以勞民民大悅營參戎馬君載道併鄉紳縣尹戴君任等即以張公名堤如姑蘓之白公堤武林之蘓公堤而介郡二守沈君道隆求余為記余按河出崑崙崙壩歷蒲昌出積石入燉煌諸境以至朔方此即其地也河從高趨下最善潰至是為青銅峽約束漸就平行稍瀦瀉以資稼穡世謂天下多苦河害惟朔方收河之利良然而關西



諸鎮九原張掖左右邊虜此居其中形雖曷時實  
衿喉焉自昔置材官輓飛數萬甲仗糗芻之需仰  
給帑金不及四萬緡其餘民運而外一切取足屯  
田又何約也持笏而畫者毋亦曰濱河為利徵靈  
於天實甚奢俾半食其力以舒縣官急而天何可  
常則亦利不利之灼然者矣公清修介節偉畧直  
心盤錯所至剖決若神日加意元元綢繆其制作  
永逸規模成以顧顧滕位相接可導可郵無盪無  
涸無淤天若不自以旱乾水溢為政而獲畬惟斥

鹵之場芄芃桑麻無論家給人足陳因我庾而市  
價不驟騰湧荷戈輩宿飽以養直前之氣縱天驕  
百萬莫敢南向發一矢即不然狡馬以逞阡陌蛇  
涎險阻繡錯我以投石拔距之餘遏颼風驟雨之  
象扼吭躋角制彼死命礪蕭斧伐朝菌日然則是  
役也自金積而南周索自我入保出遮虜絕歐脫  
之跡盡神皋輿區之域惟公之所保厘而又安之  
而余竊謂此并畫之遺也趙營平行之金城而致  
矣今大司徒所仰屋而嘆必曰遼餉加派南敵三



倍原額監司二千石而下且以此定殿最新餉日  
急舊餉日逋急者終付尾閭逋者致各塞有庚癸  
之呼何如推公此法於薊門通津間芟夷羨蕪嚴  
首其圩塹埤坊且耕且戰不愈於水陸飛輓數千  
鍾致一鍾乎公堤築既成則有見於河漸內徒懷  
襄之勢且及城陟復切猶溺之視條畫石碣便宜  
上之臺使者興作伊始民之室宇靡所不奠居以  
無至昏墊微寒始有金湯至夫肅憲章貞百度嚴  
刁斗明烽燧飭將吏課博士弟子董正鹽法龍服

援兵傍施潤澤奕世利賴則境以內籍籍有口碑  
在道也虜公既奏禮命有加行且授以大中丞節  
若圻父專九法籌餉命旅余與靈人又拭目廓清  
決膚藏髓不區區北地闡熙間矣公諱九德號曙  
海浙江慈谿人萬歷辛丑進士

鍾靈書院碑記

知州 周人傑

靈武自唐漢以來人材絕盛著於舊史者代不乏  
也癸巳夏六月余奉檄攝州事既釋奠於  
廟進其學之諸文士問以近今數十年來忠臣孝子



義烈獨行之士可舉為風化式者茫無以對重加廉訪僅得節婦五人即為申請

旌表又問其州之志無有也附於朔方郡者亦繼自前明嘉靖間嗚呼文獻之廢墜如此哉是亦守土者之責也當斯之時欲於承乏數月間續二百餘年之缺文勒為一書考稽既難時復不給誠有志未逮矣夫徵文必先徵獻十室之邑有忠信百工居肆事乃成然則欲為斯土與人材嗣休烈書院之設誠不可已而又苦其先無尺地畝宮可藉手者

靈州誌蹟

卷四

二十二

余於是愈為州人士憾焉秋七月偶出城西門見其野有屋數楹短垣缺齧聞其無人問之則前知州事江君名鯤者所建公廨也計其地可十畝許相其陰陽渠流來自巽西流繞出於屋後地理家常以是為文明之象余得之不勝喜曰靈武人文之盛意在斯乎爰捐俸鳩工刻期勦建董其役者寧夏廩生劉三戒州貢生萬植廩生祁絢張鉅劉興海等恪勤乃事工繕而費不靡門堂之制為屋四重左右學舍共成九院屋必南向冬溫夏涼以



造講誦凡兩越月工遂竣顏其門曰鍾靈書院其  
軒曰環碧其後齋曰遜敏又其後曰活水天來一  
椽之布一瓦之植悉歸於官不以累民自余代庖  
凡五月每有爭官荒地結訟不休者大半斷歸書  
院募民佃焉而收其租入計有一千餘畝時有貢  
生賀景泰捐修南閤亦樂以餘貲相助可見紳士  
聞風好義將來定不乏人余又捐米百石以供來  
歲膏火嗚呼最哉諸生代遭

聖明緬懷前哲得是地而砥礪琢磨其中日有就月有  
靈州誌蹟卷四  
二十三  
將母息爾業毋岐爾志繼自今人材蔚興豈徒擢  
高第登顯任為閭里光且必有忠孝義烈文學德  
行名當世者則志乘之作又未必不於是乎權輿  
也因刻石而記之並有望於後之蒞茲土者成余  
未逮焉

奎文書院碑記

知州 廣 玉

作事者必謀其始謀斯臧臧斯久久斯不變所謂  
有治人無治法殆此意也丁未仲夏有請於余者  
曰靈邑西郭門外舊有書院未數年而圯敗瓦頽



垣一無存者鄉士民不欲書院之荒落榛蕪也輸  
貲積千餘兩欲重建之願明公遂其事余以為事  
當慎始書院曩瀕水浸淫潰溢卒致湮沒若再舉  
而再廢之徒糜財曷益遂不果九月之望因讀法  
詣學署司鐸 楊公延余坐書室中清幽厥適遠  
絕塵囂遂偕 楊公四圍周視東有園鬱然深秀  
前後皆隙地乃謂 楊公曰向者諸生書院之請  
君固知之矣得斯地以襄斯舉何善如之然此地  
君客座也胡可廢 楊公欣然曰凡事有輕重有

大小宏獎人倫正俗維風之本此公之責亦余之  
志也藐茲小構其何所靳焉余聞之喜進紳士語  
以故擇其賢能者五六人集料鳩工其規度中設  
講堂復建山長書房東西環精舍明窓淨几為讀  
書所門南向顏其額曰奎文書院其他門房以居  
僕役厨舍以供炊爨次第位置各審其宜以視西  
郭門外之舊制尤加廓矣且夫人之好善誰不如  
我此舉從諸紳士請屢勉經始竊慮修脯膏火之  
費無所出詎意人情尚義工甫作而挾貲欲助者



絡繹不絕非所謂衆繁易舉者與蓋天下事有急  
圖其成而弗克成者亦有難於圖成而卒有成者  
傳曰專欲難成率作與事屢省乃成無他公與私  
之間耳公則人心響應若協夫衆欲之同然不疾  
而速不介而孚所從來矣曷敢貪士民力為已功  
然吾聞君子成人之美不沒人之善靈邑素尚儉  
華無僂薄之習則斯舉也謀臧則從罔有異議此  
風俗之醇而亦官斯土者之所樂聞也故為之記

奎文書院碑記

知州 楊芳燦

乾隆丁未仲冬余膺

簡命來牧斯邑前攝州事者為長白桂亭廣君謂余曰  
州之西郭舊有鍾靈書院頽廢久矣邑之士民咸  
請重建於學署東偏得隙地數畝端景相勢疑工  
度木三月於茲經營未半君其觀厥成焉余曰君  
誠能以經術潤吏事者是美政也余敢不踵成之  
時方寒沍因止工作戊申之春余復鳩工刻期歲  
事董斯役者州貢生劉興海生員顏倬趙廷楷原  
生胡霖湯銘盤等始終無懈又兩閱月而始落成



得門堂四重前後左右列屋三十餘間其門額廣  
君舊題曰奎文書院講堂余頽之曰麗澤諸生學  
舍東顏曰離經西曰辨志傍有餘地雜時粟棗菘  
韭之屬因顏曰東園墻籬庖漏列置脩具可以度  
圖史可以設琴樽堂宇雖不甚崇深亦差免於湫  
隘矣仲夏余即延師主講進生童而試之拔其雋  
異得在書院肄業者三十人其屆期而來校藝者  
百有餘人徂帶青衿橫經問字一邑之秀萃於此  
焉余嘗謂古來碩儒談道必在名山如楊子雲之

元亭馬季長之石室雷次宗之廬山王仲淹之龍  
門書院之設所由昉也至鹿洞鵞湖規模大脩類皆  
踞名勝遠城市今則書院設之於官如欲擇崇岩  
峻壑之地勢必不能每見緊望之邑其書院之近  
孔道者輒假為傳舍迎候輿衛不數年而生徒散  
矣堂廡圯矣若是者比比焉茲章書院之建左依  
宮墻右隣學署既不便為供張之所而遠離闐闐  
其地清穆而敞閒諸生遭遇

隆平沐浴膏澤復得此地以藏修游息其勤勉當何如



也余又稽鍾靈書院舊稱歸入書院者有官荒  
地千餘畝今並無一二存者遍搜舊牘悉已散失  
並見經守之難也茲官師之修脯生童之膏火僅  
得廣君所捐一千緡余蒞任後又捐二百緡擇商  
民之老成者歲權其息大倉之旁舊有市鋪七十  
餘間俾帶鬻茲土者歲納其租計一歲所入無多  
余深懼其不給既捐俸百金以為之倡更望邑之  
賢士大夫共贊其成以期以遠不廢庶無負廣君  
翫始之心也夫是為之記

峽口禹廟碑

原夫統系承於五帝敷土之烈獨隆隨刊徧于九  
州襄河之功最大蓋湖陽紆之巨派探板桐之選  
源枝流之并干渠懸水之高萬仞噓吸則轉旋星  
宿蓄洩則鼓蕩風雷而龍門未開呂梁尚阻元氣  
淫濯百脉沸騰異聚仄之可堙豈捧土之能塞使  
非神奇特起聖睿挺生何以奠圻疆之黃輿拯沈  
菑之赤子乎溯自石紐降精玉斗表旣幹父之靈  
分帝之憂靈龜呈括象之圖神龍獻導川之畫丈



人之稱九濟將軍之號百蟲五伯宣力八神受命  
咸稟指麾而助順並宣勞勩以奏功遂使霍蒲之  
地悉返耕桑巢窟之氓盡登衽席非天下之至神  
其孰能與于此峽口者黃流之險阨紫塞之巨防  
也舊稱銅口亦曰青山峇堯對峙似重樓之百常  
突兀相望伴圓闕之雙起奔湍為之縛束礪石為  
之整落下通伊闕旁帶流沙宵崖闢鳥獸之門駭  
水集蛟鼉之窟上有禹廟由來已久飛欄虛構浮  
柱相承像設崇嚴儀衛森列所以資呵護妥神靈

也或者謂神功廣運靈跡遐宣是以東造絕逆西  
延積石南逾赤岸北達寒門降雲華于清都鍊支  
祈于惡浪夷岳封青泥之檢洮水受黑王之書共  
知九野之平成何待一方之尸祝祀典得無近褻  
明神方且弗歆殊不知其用力深者其感人也遠  
觀洪濶之湍悍識底定之艱難疏鑿居四瀆之先  
勤勞分九載之半胼手胝足績用最多馭氣乘風  
魂魄猶曩曩日北阿之享婦成功于上穹今茲朔  
塞之祠垂明裡于萬禩亦民之不忘舊德也而何



疑哉惟是丹青歲久霜露年侵棟幹庸庖菜廡墜  
剝徒襲早宮之舊未抒崇德之忱制府福嘉勇公  
因巡閱之餘行朝謁之禮憫摧殘之落構察隱嶙  
之餘基鳩工庀材凝土度木測景經始剋日蕙功  
金爵承雲璇題納月千尋桂柱峙鰲背以巍我百  
尺梅梁化龍鱗而飛動冕旒肅穆寶光騰宛委之  
珪椒苳氤氳香氣覆昆吾之鼎將鑄樂石遠命鯁  
生知聖德之莫名如天容之難繪探秘文于岳瀆  
敢摹峭嶮之碑囿淺見于方隅僅紀崑崙之派云

爾

靈州移建太平寺碑

原夫禮燈王於石室須陟名山謁梵帝於香城先  
尋福地丹崖萃嶽識檀特之高峯碧嶂龍從仰者  
闕之峻嶽千乘跨險百拱憑虛發雲構於自然極  
神功之不測是以簡栖頭陀之頌蘭成麥積之銘  
佐公天光之碑子昇寒陵之石莫不寫林霞之奇  
秀狀岩壑之幽深遂使鵝殿增輝龍宮長價勒翠  
珉而不敞標白氈以長新若乃寶地迫於囂塵靈



境局於平壤築昆侖之土不過三成開般若之堂  
無逾十笏縱為極筆徒事華辭何足以照燭人天  
發揮龍象然而法惟平等寧陋夫偏隅教推廣大  
不遺於荒徼馮五乘以導述途宏六度而濟塵劫  
在有心者能無述焉唯靈武之故城即河奇之舊  
苑沙瀾恒地東接楊榆之關河流帶大西連雞鹿  
之塞爰有梵刹近峙亭皋雖罔巒之隱嶙之奇而  
川原有奧衍之勢徒觀其靈宮四柱祇樹雙林星  
毫月面供寶相之莊嚴珠網銀繩護蓮臺之香妙

百枝鐙影光搖怯夜之旛九乳鐘音響答占風之  
鐸崇軒間出層楹相承已足狀紫塞之觀瞻作青  
郊之屏障矣矧夫闡微妙之法藏具調御之神通  
流傳沙界諷光音之經震動風輪建塗毒之鼓雪  
山吹藥慧伏衆魔苦海浮航慈濟羣品俾壑慄之  
土俗共結勝因率剽悍之人風爭趨善果詎非象  
教之宏誘法王之神化歟方今遐邇乂安中外禔  
福種人內嚮裔士永寧七政均明躋蒼生於曼壽  
三階齊色慶豐年之樂康見瑞星雲降甘露雨此



太平寺之所由名也是則嘉禾合類詎讓苾芻之  
芬密樹垂陰即是菩提之彩元鬪黃髮俱遊釋梵  
天宮野菽溪毛如麀祇洹法供又何必訪戴民之  
國登化人之臺求鷲窟之淨居企鹿野之華苑也  
哉惟是舊基卑濕流潦浸淫高欄岌以將傾繚垣  
隳而不直首侵玉座兩壞寶衣奔流深黑非閑劫  
燒之餘驚沙坐飛似集微塵之衆余職司守土慙  
然於心爰出俸金以倡善信更命僧心福募之四  
境以廣檀施鳩工庀材凝土度木去故址三百餘

步築平臺二十餘丈雕甍映日鵬翼將騫翠瓦排  
雲魚鱗欲動寶龕忽徒疑怗利之飛來紺宇潛移  
肖化城之涌出是役也檀行鳧趨役徒屬至闢三  
空之勝境啟七華之妙覺分菴羅之淨土樹堅固  
之貞林諸天則籍以閑安法呂亦此焉遊集其未  
通釋典摘寫業之元詞夙慕禪宗喻貫華之微旨  
非云宣揚正覺於以歌詠太平廼為頌曰

靈郊淨域朔塞香林松關左闕茵閣斜臨近帶華  
薄旁連碧海圓鏡四照洪鐘一音持戒定慧越去



來今丹青歲古霜露年深隄衝蟻穴潦集牛汾銀  
樞侈剝珠字銷沉金容兩立瑞象塵侵萬善咸起  
衆力克任康時胥樂至教同欽手兩七寶掌出雙  
層臺駸駸麗塢寄崟影藏怖鶴樂應靈禽花雨灑  
落松風嘯吟慧日夜朗慈雲晝陰定香浥浥靜梵  
悄悄早耽白業敢悶清襟憑廣長舌馮妙明心真  
如不住了義難尋

鹽州過飲馬泉

李益

綠楊著水草如烟舊是鹽州飲馬泉幾處吹笳明

月夜何人倚劍白雲天從來凍合關山路今日分  
流漢使前莫遣行人照容鬢恐驚憔悴入新年

夜上受降城聞笛

回樂峯前沙似雪受降城外月如霜不知何處吹  
蘆管一夜征人盡望鄉

城鹽州

白居易

城鹽州城鹽州城在五原原上頭蕃東節度鈐闡  
布忽見新城當要路金烏飛傳贊普聞建牙傳箭  
集羣臣君臣赭面有憂色皆言勿謂唐無人自築



鹽州十餘載至今種求不犯塞晝牧牛羊夜捉生  
長去新城百里外諸邊急警勞成人惟此一道無  
烟塵靈夏潛安誰復辯秦原暗通何處見鄜州駟  
路好馬來長安藥肆黃芪賤城鹽州鹽州未城天  
子憂德宗按圖自定計非閑將畧與廟謀吾聞高  
宗中宗世北虜猖獗最難制韓公創築受降城三  
城鼎峙屯漢兵東西亘絕數千里耳冷不聞胡馬  
聲如今邊將非無策心笑韓公築城壁相看養寇  
為身謀各握強兵固息澤願分今日邊將思褒贈

公封子孫誰能將此鹽州曲翻作歌詞聞至尊

送李駙曹之靈武

郎士元

一歲一歸寧涼天數騎行河來當塞曲山遠與沙  
平縱獵旗風捲聽笳帳月生新鴻引塞色回日滿  
京城

送鄒明府遊靈武

賈滂

曾宰西幾縣三年馬不肥債多憑劍與官滿  
歸邊雪藏行徑林風透卧衣靈州聽曉  
開扉



送李騎曹靈州歸覲

張籍

翩翩出上京，幾日到邊城。  
漸覺風沙處，還將弓箭  
行。席箕侵路暗，野馬見人驚。  
軍府知歸慶，應教數  
騎迎。

送靈州田尚書

薛逢

陰風獵獵滿旗竿，白草颼颼劍戟攢。  
九姓羌渾隨漢節，六州蕃落縱戎鞍。  
霜中入塞珣弓硬，月下翻營玉帳寒。  
今日路傍誰不指，穰苴門戶慣登壇。

峽口山

靈州誌蹟

卷四

三十四

青銅峽裏韋州路，千去從軍九不回。  
白骨似沙沙似雪，憑君莫上望鄉臺。

漢渠春漲

神河浩浩來天際，別絡分流號漢渠。  
萬頃腴田憑灌溉，千家禾黍足耕鋤。  
三春雪水桃花泛，二月和風柳眼舒。  
追憶前人疏鑿後，于今利澤福吾居。

月湖夕照

萬頃清波映夕陽，晚風時驟漾晴光。  
暝煙低接漁村近，遠水高連碧漢長。  
兩兩忌機鷗戲浴，雙雙照



水鷺遊翔北來南客添鄉思彷彿江南水國鄉

靈武秋風

翠輦曾經此地過時移世變奈愁何秋風古道聞  
笳鼓落日荒郊牧馬馳遠近軍屯連成壘模糊碑  
刻繞煙蘿興亡千古只如此不必登臨感慨多

興武暫憇

簇簇青山隱戍樓暫時登眺使人愁西風畫角孤  
城晚落日晴沙萬里秋甲士解鞍休戰馬農兒持  
券買耕牛翻思未築邊墻日曾得清平似此不

峽口吟

僉事齊之鸞

生犀飲河欲北渡海月忽來首東顧馮夷舉手揮  
神鞭鐵角半催河上路至今夜行水泣聲罔象歎  
歎鬼姦露土人作渠灌稻田元靈委順不敢怒

至靈州

復入人煙境村墟鷄犬聞沙黃偏映日樹綠正連  
雲古道流河潤高嵐壓虜氛箱轅下特東餉馬

池軍

九日登花馬池城



白池青草古鹽州倚嘯高城豁望眸河朔氈廬  
里迥涇源旌節隔年留轅門菊酒生豪興雁塞風  
雲愜壯遊諸將至今多衛霍佇看露布上龍樓

宿小鹽池

羽節鹽池側秋光淡戍臺雁聲雲外墮夜雨樹間  
來猛士安能得邊愁不可裁長歌聊徙倚或有伏  
車哀

同徐聽菴李環溪遊聞上戲分田塍二韻

為惜膏腴等石田即因就下引涓涓渠開荒野資

羣力橋鎖奔湍效往賢灌溉繞周千頃地氤氛密  
動萬家烟旁流復導闌干外綜錯高低景亦妍  
渠成水到瀉雲騰即看農工處處興喜動兩河觀  
察使事聞分陝大中丞殷勤命作千秋計措置飲  
逢比歲登亭榭橋梁齊就緒須知終始有師承

青銅禹蹟

銅峽中間兩壁蹲何年禹廟建山根隨刊八載標  
新跡疏鑿千秋有舊痕馮溯源流推遠德採風作  
述識高門黃河永著安瀾頌晉取豐功萬古存



初至奎文書院呈蓉裳刺史兼示諸生二十韵

武威郭楷雪莊

靈武古雄郡控邊啓奧區茲邦合多韋仙吏實分  
符文雅觀新政陽春自舊敷開堂延教授闢館聚  
生徒卜地黌宮近分流泮水俱巍峩瞻廟貌慎重  
樹碑趺禮器儼三古弦歌猶一隅脩鱗潛密藻翹  
鳳待高梧妙簡真才士交推謬腐儒聲名雖竊忝  
學術本荒蕪未獲吞丹篆空勞繫白駒吟成敢屬  
和酒熟即相呼竒字時堪訪元言許共娛琳函披

靈州誌蹟卷四

三十七

秘藏去聲寶鑑映清臚觀海從今始談天晒昔愚諸  
君方進步此道有亨衢信是朋來遠方知德不孤  
鳴鐘期大印鑄劍仰洪爐休負文翁化寧吹齊國  
竽經明偕計吏黼黻重

天都

初夏放舟青銅峽口因登百塔寺用松陵集中

楞伽精舍倡和韵

金匱楊芳燦蓉裳

靈源出青銅分流潤郊郭疏為龍骨渠萬頃膏腴  
廓夏始衆綠長和氣銷疹瘼雙峰青刺天晝日光



滄泊拗怒喧波濤呀開門崖端堅逾至壁城陰  
石匱閣沿隄行水來露冕褰車箔不辭跋履勞  
得登臨樂嵐光破空碧霞氣紛華聖俯瞰九曲流  
貫注長不涸却登極頭船輕身冒險惡換舵捷有  
神可喜亦可愕龍門投箭筈瞿塘斷竹筏蛟虬怒  
欲立夔兩紛可摸潭渦翻雪車石稜避霜鐸轉丸  
下峻坂駛馬脫羈絡掠耳震砰訇奪眸眩輝燿亂  
流萬人呼出險千丈落迅若乘鷗輪翩如躡雲屐  
吏道苦拘檢塵機多礙着偶然得一快似亦天所

酢尋幽入梵宮憑高望六幕巔岼百浮圖阿誰所  
鑄鑿浮柱倚危岑層構臨巨壑疑是阿育王來此  
翦被薄門鼠綠垂藤怖鴿觸懸鐸同遊得辯才談  
空相應諾雖逐野干行已免睡蛇蠱天香聞杳霭  
貝典翫深博徘徊日移晷微吟招隱作靜境足留  
連非祇為禪縛伊余眈白業慕藿甘寂寞試作物  
外觀心口自營度七寶座莊嚴八閔齋儼恪平生  
默自懺豈止一重錯何時遂微尚林泉好棲托



同作

無錫侯士驤凌衢

渡峯束洪流屹立儼銅郭長河溢星宿汎濫寶曠  
廓大哉神禹力疏鑿祛民瘼一方資灌溉萬類得  
棲泊懸崖扞賊湍奔濤安巉嶇艱疑上瞿塘險踰  
登棧閣首夏事清眺巾車揭疎箔偶于風沙窟快  
覓山水樂日輪沉碎光激灑翻赭壘劇愁地肺揉  
恐致天池涸探竒歷幽曼嗜僻窮怪惡躡峻足屢  
躩瞰虛心卒愕乘輿招野航放泊解輕筴雲嵐生  
倒影黛色紛可摸挾柁箭離弦迴撻鳥脫絡風門

靈州誌蹟

卷四

三十九

沙喧雷水蓄石淬鐔入峽天忽低有目頓成矐平  
生負跳盪到此驚膽落踏浪學飛鳧破空下煙屨  
徑渡千仞淵始知身所著竒險雖暫經夙願得交  
酢野迥綠成海林深雲聚幕孤嶂孤寺蹲百塔百  
靈鑿紺殿枕層岡丹甍架危壑人稀市替遠境靜  
塵慮薄雜花布妙香清籟曼躑躅得道須慧業茲  
言心已諾倘墮野狐窟何以祛毒蠱空空談辟支  
瑣瑣務施博直以貪生故妄希釋梵作倭佛竟無  
成終身被禪縛荒余蠟游屐偶來証寂寞齋景悵



遐慕貝典窮隱度選勝造幽微齋心自清恪始悔  
當濃春縮屋真大錯嘯咏得微悟烟霞有深托赤  
壁逐坡仙橫江夢歸鶴

同作

浦江周為漢嶠東

鞿紕苦風塵岔埽厭城郭夏始湖長河一葉泛寥  
廓窮薄險能輕烟霞癖成瘼中流浪簸掀勢放不  
容泊迎面排亂山吞帆辟雙嶠窈窕隱堂隍艱晚  
峙樓閣倒影疑堆烟捲霧忽開箔浩渺流波平曠  
蕩客心樂盤渦鬱洄漩頽壁襟丹堊漿急堤欲行

沙露川恐涸峽勢漸逼窅波形陡深惡魚沫腥或  
間怪氣黑可愕怒發千鈞弩驟斷轆轤索絕岸幸  
許登裂石不敢摸呀豁鏗雲根斬方磨蓮鰲羣山  
亂犇突一徑細連絡溢日波有光奪晴目恐矐俯  
白駭雲生捫碧愁天落攀蘿捨疲筇印苔躡棕屨  
路轉境乍開地寂心無着山僧啟禪局指客歡酬  
酢登塔禮金仙入龕揭珠幕巖窈神丁開崖丁鬼  
斧鑿向背拱千巖晦明變衆壑蛟囚樹屈盤雷聚  
水噴薄濛濛散空香冷冷間清鐸嗟余事遠遊山



林負宿諾道緣苦未深俗慮迫相蠶敗車驅簿策  
褐衣曳寬博自憐世網羈空吟招隱作邂逅慙林  
泉倏忽擺纏縛盪胸吸流影瞠目望大漠長嘯何  
激昂奇句偶裁度暫得任疎頑誰能守恪吁嗟慕  
榮利趨向良乖錯何當謝塵氛幽棲遂遠托駐景  
逐飛仙雲中控孤鶴

受降城

楊芳燦 荅棠

萬里榆關道韓公有舊城草埋危堞墮風挾怒沙  
鳴戍士瘳弓卧邊氓負耒耕無勞壅門設蕃部久

靈州誌蹟

卷四

四十一

翰誠

前題

郭楷 雪莊

韓公受降處遺堞至今存獨展臨邊策寧誇列騎  
屯山形猛虎踞地勢鬪龍蹲健筆鐫碑碣千秋說呂  
溫

前題

松江俞訥 錦夫

故壘餘荒草韓公舊列營秋風吹古道落日照邊  
城百雉寒苔碧重閉暮角鳴自誇身手健常傍塞  
垣行



前題

侯士驥

欲訪韓公蹟蒼茫大夏西城分三足峙天八四垂  
低原古樓木黍時清息鼓聲過雨無限意屠古且

留題

前題

楊山秦崙源

突兀三城舊周防萬里遐弓刀嚴列堠旌旆擁平  
沙地險爭魚齒天驕制犬牙只今蕃落靜長策未

須誇

前題

靈州誌蹟卷四

四十二

朔塞巖城古蒼茫認廢垣雄邊手騎靜危堞萬人  
屯已足挽驕虜何勞置墜門拂雲祠畔望蓋管在

遙原

過僕固懷恩墓

楊芳燦

唐代當中葉漁陽起判藩驍雄出裨將義憤救中  
原酣戰摧強敵孤軍領外援假威添虎翼協力剪  
鯨吞左僕班資貴真王爵秩尊氣驕非易制籠絙  
轉成怨反側由羣議寬仁負主恩養難分節鎮召  
亂誘羌渾自諾功無並寧知禍有源飲章年告變



謾語尚陳寃  
蕪峻懷非望  
龐萌肆妄言  
士擐三載甲  
宛率六軍屯  
涇水全師覆  
鳴沙數騎奔  
餘生逃斧鑕  
殘骨載輜輶  
壞道沉碑失  
陰厓破冢存  
悲風作鳴咽  
疑是健兒魂

前題

郭楷

連岡鬱黃雲  
四塞慘白日  
陰風沙石號  
短草冷蕭瑟  
遙遙見孤邱  
蓬蒿荒不銓  
云是懷恩塚  
年多所碣失  
有唐昔中葉  
安史亂侵軼  
所賴朔方軍  
僇力奮羣率  
如何塚中人  
功名乃不卒  
曩因雲京構

靈州誌蹟

卷四

四十三

緣奉先室四鎮徒  
陰謀六罪漫口實  
焚如良自取  
猶幸逋斧鑕封忝  
異姓王名汚史臣  
筆阿母揮白刃  
逐賊蒙優恤  
愛女系天潢  
遂嫁崇禮秩  
忠孝爾竟虧  
魂魄應慚慄  
千秋遺壙在  
已作狐兔窟  
月夜牧馬歸  
何處鬼雄叱

前題

侯士驤

軋犖山前走劇賊  
千里連營甲光黑  
兩京已潰哥舒降  
健將從戎鐵勒將軍許  
國初靡他陣前研子  
揮霜戈營門角響宵  
傳兵馬鬣冰寒曉  
渡河河陽



一鼓摧堅壁叱咤英英風萬人敵功成自慎置閑  
散請為降奴建旄節養癰河北從茲始論古純臣  
詎如是縱無諛口伺含沙未必功名竟堪恃六罪  
陳詞隙已成構之況有辛雲京當時悔過入待罪  
主恩猶可全其生計不出此乃再誤弄兵召寇當  
邊暮鳴沙歸骨殖天刑強固性成終不悟闔門死  
事四十人不幸馬革留殘身可憐百戰中與將末  
路披猖作判臣我來憑弔徑荒壠陰風匝地寒雲  
重咫尺難尋靈武臺夕陽衰草寒雲重

靈州誌蹟 卷四

甲四

小池鹽

楊承憲

飴鹽誰種出雲騰回樂池頭用不勝豈藉牢盆人  
代鬻但攜筐筥野堪承沙澗晝涌明於雪鹹氣春  
團淨似冰經宿乍看絲雨散滿川已見玉華凝非  
同安邑因風熟應比昆吾逐月增暖漲土花青結  
繡晴涵水暈白生稜飛霜詎為凌秋勁積素還宜  
待日蒸薄靄漸銷痕皎皎浮漚微浣影層層鑿厓  
應笑勞無益引瀑何須巧自矜莎磧元精搜突窠

荒畦銀汞掃重仍

物類相感志鹽根一名  
太湯元精明淨者如汞堆盤表



潔形堪肖八鼎和羹味可憑寧俟沃波朝象不  
勝沸火夜溝燈產連谿收難竭成藉陰陽價豈騰  
千里負餽皆攜載萬夫侵曉共擔登利輕一孔民  
爭藉難惜窮邊賊有恒果是

盛朝寬大處天歲無畫恊休微魏書元雍奏云  
蓋者天歲也

靈武臺

侯士驥

朔方形勝西陲雄一隅再造誇唐宗至德遺蹤杳  
難問荒臺淪沒生蒿蓬漁陽鞀鼓動羣醜函關失  
險無人守阿瞞夜半出延秋崎嶇蜀棧東驟走紫

靈州誌蹟 卷四

四十五

蓋黃旗指劍州馬嵬父老苦遮留至尊已狗權宜  
策殿下須從恢復謀裴冕堪為北道主迴風捲甲  
趨靈武白衣宰相佐風雲黑稍將軍擁貔虎玉璽  
西來士氣生居然號令衆心傾花門共躍勤王騎  
葉護長驅蕩寇兵軍聲遠震連關隴令公將將能  
持重戈鋌百道怒鯨奔旋看駭鹿無遺種虎帳龍  
韜據上游奇功指顧兩京收捷書飛達蛾眉嶺仙  
仗重開萼樓掃除氛稷清宮闕表迎避位情非飾  
黃袍手著似嬰兒此日何曾虧子職倉皇行在建



旌旗想見神靈呵護時誰信邊城三尺土當年曾  
築太平基

邊牆

楊芳燦

野日荒荒外邊牆入望遙風高原散馬雲迥塞盤  
離蒸土頽垣在沉沙折戟銷登臨無限感戰壘認  
前朝

前題

郭楷雪莊

一帶繚垣峙雄邊制四隣黃沙今夜月白骨古時  
人飲馬窟猶在鳴刁躋已陳時清烽戍減耕牧樂

靈州誌蹟

卷四

四六

斯民

前題

松江俞訥

乍堠烽烟靜沿壕長綠沙高臺蹲健鷲荒磧卧明  
駝地利宜耕牧邊消息鎧戈驅車徑廢堞懷古漫  
悲歌

前題

侯士驥

古堞儼周遭黃雲補斷壕客心沉戍角邊日澹征  
袍野潤牛羊小天空鷹隼高康時本無外設險笑  
徒勞



前題

秦崙源

野霧冷冥冥斜陽下古亭客愁侵夜拆戍大亂秋  
星土銼眠難穩村醪醉易醒他年談舊事曾向塞  
垣徑

前題

楊承憲

縱目長城外黃雲幾萬層霜高秋試馬風勁客呼  
鷹自有四夷守休誇一障乘數聲邊角動平楚暮  
烟凝

靈州古槐

石渠

靈州誌蹟

卷四

四十七

上古有大椿八千歲為春八千歲為秋此說非無  
因靈州衙齋有槐樹輪囷離奇饒生趣或云齊景  
公愛槐犯者即刑傷入墓或云甘泉谷移來投閣  
子雲曾作賦或云音聲忽出自都堂或云片片見  
相西天王或云神堯入關先植此紛紛臆說皆愚  
印印謂不材之木常能壽綠不知肥紅不瘦且能  
不受命於天飽耐霜雪神逾堅但今無論年與月  
亦無論其全與別即此清陰蔽我廬生意欣欣起  
清越更兼桑柘榆柳蔭四郊鷹鷂徙兮鸞鳳



樹生枝微嘉政芙蓉綠水聊解嘲

邊城秋易知行

草綠赫連臺遲遲春日暮西風偏早來騷屑撼塵  
樹溶溶月流銀灩灩璣凝露蘭膏烟明霜鴈影  
前度我欲寄尺書渺渺情難訴寒蛩扶戶吟和盡  
淒涼句

和蓉裳九日橫城登高放歌

吳山絕頂崔嵬遊人九日恣登高廿年行脚未  
曾到夢中夜夜聞江濤醒回詫訝身是客呼厨快

作去重陽餽一餐香飫金釵溜駕言何處堪遊教  
城西仙尉拊簡召師弟甥舅相聯鑣琉璃杯深瓊  
珀紫瑪瑙盤釘紅葡萄一呼帽落杯在手顧覺右  
手空無螯有酒不飲君記取非直亡羊而補牢歸  
問閩人車停處報君今在長城壕雄邊絕塞佳節  
併極目千里紆煩切詰朝相見話未已新詩袖出  
輝銀毫星軺輓轆塵全集夫君不讓劉郎豪讀罷  
還君三嘆息吾儕幸與

昇平遭此地絕古稱險要紛紛割據雄雌尻天順



以後棄河外河冰一夜紛馳驚鐵柱泉邊虎豹窟  
步苦灘頭豺狼嗥今看西山如駭馬穹廬遠徙弓  
矢橐驛舍星連炊烟接明駝橐橐來西蔡文華武  
英峯簇簇會莖何用戈矛操君今攝官已三載政  
成民俗無訛臯銅口河流建饒注石岡砂磧恣茂  
蕪幅員千里隱一國宰割正合操牛刀迎刃而解  
導窳理羨君餘事主風騷登高懷古作林立一見  
咋舌誰喧囂勝地良辰禁不得放歌例合歸吾曹  
風雨重陽句難續寸鐵持向蘭山磨



督渠工夜宿山村

華原 梁楚翹

日暮渠工罷孤村獨夜閒  
風輕聞水浪月朗對柴  
關古寺全依石人家半在山  
更深眠未穩鄉夢此  
時還

九日重遊東塔寺

勝地經年到清罇九日開  
河流當檻曲塔影過城  
來露冷黃花瘦風疎碧草摧  
坐臨無限意目極小  
山隈

古刹堪憑眺携囊上翠微  
夕陽孤鳥沒斷澗白雲

靈州誌蹟

卷四

五十

飛曲徑僧歸晚空壇客過稀  
徘徊金像下秋色冷  
巖扉

秋登太平寺寺築高臺建成

層臺巍聳傍雲橫殿宇周迴  
落照清客到烟林開  
曲徑坐來霜葉下高城侵牕  
午日薰蘭氣入檻秋  
風散簌簌向晚依依未歸去  
棲鴉啼上一輪明  
大成殿旁古松

聖德垂無極凌空見古松  
青柯經百代素影傲三  
冬常伴笙竽響時親劍佩容  
近階依巖巖承溜藉



蒙首老幹應樓鶴虬枝欲化龍崇高排巨闕茂密  
隱疎鐘自有秋陽暴還因泮水濃後彫誰爾詠千  
載許相逢



靈邑自漢時界匈奴唐初北鄰突厥後又接近吐蕃宋則陷入西夏為戎馬衝踐之地我

國家重熙累洽邊境清寧百餘年來此都人士久不識兵戈為何物矣而試即歷代邊防事蹟取而覆之始歎民之生彼時者孔棘而

本朝功德之隆遠邁漢唐萬萬者其涵濡為最深也覽斯編者勿徒視為陳迹也可

邊防

漢元封元年上既置張掖燉煌郡自制封禪儀將登封太山又以古者先振兵釋旅然後封禪詔曰南粵東甌咸伏其辜西蠻北夷頗未輯睦朕將巡邊陲躬秉武節親帥師焉乃行自雲陽歷五原出長城北登單于臺至朔方臨北河勒兵十八萬旌旗千餘里遣郭喜單于曰南越王頭已懸北關今單于能戰天子自將待邊不能即南面而臣於漢單于誓不敢出帝乃還祭黃帝塚而釋兵

魏太平真君五年以刁雍為薄骨律鎮將到任上言



富平西南三十里有艾山南北二十六里東西四十五里鑿以通河似禹舊跡其兩岸作溉田大渠廣十餘步山南引水入渠河水激急沙土漂流今渠高於河水二丈三尺水不得上艾山北河中有洲渚水分為二西河小狹臣求來年正月於分河之下五里平地鑿渠築其兩岸令高一丈北行四十里還入古高渠又北八十里合一百二十里計用四千八十四日功可溉官私田四萬餘頃七年又表曰奉詔高平安定統萬及臣所守四鎮運糗靈州誌蹟

卷四

五三

五十萬斛付沃野鎮以供軍糧臣鎮去沃野八百里道多深沙必致滯陷計車五千乘運十萬斛百餘日乃得一返今求於河水之次造船二百艘一船勝二千斛放舟順流五日而至功輕於車十倍有餘

文帝大統元年遣李虎擊曹泥虎招諭費也頭之衆與之共攻靈州凡四旬曹泥請降虎克靈州二年高歡自將萬騎襲魏夏州不火食四日而至縛稍為梯遂入其城擒刺史斛拔彌俄突因而用



之留張瓊將兵鎮守遷其部落以歸靈州刺史曹  
泥與婿涼州刺史劉豐復叛降東魏魏人圍之水  
灌其城不沒者四尺歡發阿至羅騎徑渡靈州遶  
出魏師之後魏師退歡追泥及豐收其遺戶五千  
以歸

隋文帝開皇五年令崔仲方發丁男三萬於朔方靈  
武築長城東至黃河西距綏州南至勃山嶺綿亘  
七百里

十八年詔蜀王秀出靈州道擊突厥

靈州誌蹟

卷四

五十四

十九年春遣楊素出靈州道擊突厥路逢魚俱羅  
與語大悅即奏請同行俱羅與數騎奔擊瞋目大  
呼往返若飛

是年突厥犯塞以段文振為行軍總管在之遇達  
頭可汗於沃野擊破之明年率衆出靈州道以備  
胡無虜而還

煬帝大業九年靈武白瑜婆兵起賊帥白瑜婆劫  
牧馬連突厥隴右多被其患謂之奴賊

唐貞觀三年回紇與諸部攻薛延陀殘之并有其地



遂南踰賀蘭山境諸河遣使者獻款太宗為幸靈州次涇陽受其功

十年春正月突厥阿史那社爾來降以為左驍衛大將軍處其部落於靈州之北留社爾於京師尚主興屯兵

太宗時以延陀滅欲并契苾等降之復遣江夏王道宗率阿史那社爾等分部窮討帝幸靈州節度諸將於是鉄勒十一部皆歸命天子

十七年薛延陀來納幣詔絕其婚先是薛延陀執

契苾何力上遣使與和親許以公主妻之何力歸是年遣其侄來納幣獻羊馬何力言不可與婚帝曰吾已許之不可失言何力曰勅令夷男來親迎被必不敢來絕之有名上乃詔幸靈州召真珠可汗會禮真珠欲行其臣曰往必不返真珠曰天子至明遠近皆服今親幸靈州以愛主妻我得見天子死不憾矣薛延陀何患無君又多以牛羊為聘經沙磧死者過半乃責以聘禮不脩絕之

高宗咸亨二年吐谷渾畏吐蕃之逼徙靈州其故



池盡入吐蕃

宏道元年突厥寇蔚州崔智辨敗死或議棄豐州保寧貞唐休璟以為不可上疏曰豐州控河邊寇號為襟帶秦漢以來常郡縣之士田肥美宜耕牧隋季棄之貞觀之末募人實之西北始安今廢之則河濱之地復為賊有寧夏等州人不安業非國家利高宗從其言後授靈州都督乃陳方略復四鎮

中宗嗣聖十三年默啜寇涼州執都督許欽明其

靈州誌蹟

卷四

五十六

後寇靈州以欽明自隨至城下使說守將降明呼曰我乏食求美醬良米及墨意欲城中選良將引精兵夜襲虜營而城中無喻其意者遂被害

十九年突厥寇監夏遂寇并州遣薛旭張仁愿禦之

神龍二年十二月突厥默啜寇鳴沙靈武總管沙吒忠義與戰軍敗

代宗廣德二年僕固懷恩反寇太原初回紇辭歸國上詔僕固懷恩護送之至太原節度使辛雲京



疑其反閉門不出雲京與中使駱奉先力言懷息有反狀息奏勅辛雲京朝廷和解之於是不入朝上書自訟遣其子瑒攻太原為其下焦暉白玉攻殺之其都虞侯張維岳殺焦白而竊其功傳首京師懷息入白其母母提刀逐之懷息棄其母引兵據靈州顏真卿李抱玉皆請用郭子儀鎮朔方上從之

大歷二年九月吐蕃圍靈州冬十月路嗣恭擊却之

靈州誌蹟

卷四

五十七

三年九月吐蕃寇靈州朔方將白元光敗之壬辰又敗之於靈武

八年吐蕃寇靈州郭子儀敗之於七級渠

九年城益州初益州既陷塞外無復保障吐蕃常阻絕靈武侵擾廊坊詔發兵城益州又詔涇原山南劍南各發兵深入吐蕃以分其勢城之二旬而畢命節度使杜彥光戍之由是靈武銀夏河西獲安

唐書突厥傳



突厥默啜自立為可汗篡位數年始攻靈州多殺  
略士民武后以薛懷義為朔方道行軍大總管凡  
十八將軍出塞雜華蕃步騎擊之不見虜而還  
契丹李盡忠等反默啜請擊賊自效詔可冊拜遷  
善可汗引兵擊契丹會盡忠死襲松漠部落盡得  
李萬榮妻子輜重會長奔潰武后美其功復詔命  
冊拜未及行俄攻靈殺二州縱殺畧為屯將所敗  
默啜負勝輕中國有驕志大抵兵與顏利時畧等  
地縱廣萬里諸蕃聽命歲入邊戍兵不得休乃高  
武道行軍大總管脩虜

選魏元忠檢校并州長史按屯以待又徙元忠靈  
長安三年默啜遣使請婚獻馬后渥賜其使中宗  
始即位入攻鳴沙於是靈武軍大總管沙陀忠義  
與戰不勝死者幾萬人帝詔絕昏聘斬默啜者王  
以國默啜殺我行人鴻臚卿減思言詔左屯衛大  
將軍張仁亶為朔方道大總管屯邊明年始築三  
受降城於河外障絕寇路

睿宗時默啜攻九姓戰殲北九姓潰人畜皆死思



結等部來降帝悉官之拜薛訥朔方道行軍大總管太僕卿呂延祚靈州刺史備邊默啜有拔野古殘衆所殺傳首京師

永泰大歷間吐蕃再遣使者來聘於是戶部尚書薛景仙往報詔宰相與吐蕃使者盟俄寇靈州掠宜祿郭子儀精甲三萬戍涇陽入屯奉天靈州兵破虜二萬上級五百首

大歷三年虜引衆十萬復攻靈州朔方將白元光再破其衆獲馬羊數千

八年虜六萬騎侵靈州敗民稼進寇涇邠渾瑊與戰不利復整卒夜襲其營涇原馬璘以兵掩之潘原射豹皮將死軍中夜哭虜乃遁去璘收所俘士及男女而還

大歷十三年虜以四萬騎寇靈州塞漢御史尚書三渠以擾屯田為朔方留後常謙光所逐

貞元二年吐蕃請盟言靈益節度使杜希全外蕃所信請主盟帝使報曰希全守靈州有分地不可以越境以渾城為會盟使虜卒敗盟火益夏二州



廬舍頽邪堞而去希全分兵保之

貞元八年吐蕃寇靈州陷水口塞營田渠發河東振武兵合神策軍擊之虜引還

自虜得鹽州塞防無以障邊而靈武單露廊坊侵迫寇日以驕數入為邊患帝復詔城之使涇原劔南山南深入窮討分其兵毋令專向東方詔朔方河中晉絳邠寧兵馬副元帥渾瑊朔方靈鹽豐夏綏銀節度都統杜希全及邠寧節度張獻甫等五節度合兵三萬以左右神策將軍胡堅張昌為鹽州行營節度使板築之役者六千人餘皆陳城下九年始裁閱二旬訖功而虜兵不出

貞元十六年靈州破虜於烏蘭橋十七年吐蕃大侵靈州

永貞十二年吐蕃使論矩立藏來朝未出境吐蕃寇宥州與靈州兵戰定遠城虜不勝斬首二千級穆宗即位虜引兵入屯靈州靈州兵擊却之

長慶元年吐蕃遣使來朝且乞盟詔許之大臣豫盟者悉載名於策方盟時吐蕃以壯騎屯魯州靈



州節度使李進誠與戰大石山破之

大中三年靈武節度使李欽取安樂州詔為威州

五代後梁開平三年岐王李守貞因梁將劉知俊來降

使知俊將兵取梁靈州以處朔方節度韓遜遣使告急於梁梁主遣康懷貞寇彥卿將兵攻邠寧以救之克寧衍二州拔慶州南城遊兵及涇州之境知俊聞之解圍引還梁主急召懷貞等還知俊據除邀之懷貞大敗僅以身免

後唐明宗天成四年以康福為朔方節度使初福

善胡語明宗退朝多名入訪以時事福以胡語對安重誨惡之謂之曰汝但妄奏事會當斬若福懼求外補重誨以福為朔方節度使以靈武邊胡有兵禍福見唐主泣辭唐主命更他鎮重誨不可不得已以兵送之福方至渠遇羗兵邀之福擊敗之至青銅峽又遇野利大蟲二族數千帳又擊破之遂進至靈州自是朔方始受代

後晉高祖天福四年靈州戍將王彥忠據懷遠城叛高祖遣供奉官齊延祚往招諭之彥忠降延祚



殺之高祖怒其擅殺除延祚名重杖配流

開道三年靈州党項作亂初馮暉在靈州留拓跋彥超於州下故諸部不敢為寇及將罷鎮而縱之王令温代鎮不存撫羗胡以中國法繩之羗胡怒彥超與石存也厮三族共攻靈州六月晉復以馮暉為朔方節度使將關西兵擊羗胡暉引兵過早海糗糧已盡拓跋彥超衆數萬扼要路據水泉以待之軍中大懼暉以賂求和於彥超彥超許之自旦至日中使者往返數回兵未解藥元福曰虜

知我饑渴陽調和以困我耳若至暮則吾輩成擒矣今虜雖衆精兵不多依西山而陣者是也其餘步卒不足為患請公嚴陣以待我我以精騎犯西山兵小勝則舉黃旗大軍合勢擊之破之必矣乃帥騎先進用短兵力戰彥超小却元福舉黃旗暉引兵赴之彥超大敗明日暉入靈州

宋太祖建隆二年靈武節度使馮繼業獻馬五百橐駝百野馬二乾德二年靈武饑轉涇粟以餼太宗至道元年以會州觀察使知清遠軍田詔斌



為靈州兵馬都部署二年五月李繼遷寇靈州九月夏州延州行營言破李繼遷於烏白池至道三年以殿前都虞侯王昭遠為靈州路都部署二月丙申朔靈州行營破李繼遷

真宗初即位夏人寇靈州合河都部署楊瓊擊走之

咸平四年八月戊申出環慶至靈州地圖險要示宰相議戰守方畧閏十二月壬午靈州言河外砦主李瓊等以城降西夏

咸平五年三月丁酉李繼遷陷靈州知州裴濟死之六年以西涼府六谷首領潘羅支為朔方軍節度靈州西面都巡檢使

哲宗時鍾傳議取靈武環慶亦請出師命折可適將萬騎往即薄靈州川夏人扶老挾幼中夜入州城明日俘獲甚夥而慶兵不至乃引還

元豐四年王師西征命涇原副都總管劉昌祚率蕃漢兵五萬受環慶高遵裕節制昌祚先至靈州幾得城遵裕嫉其功遣使止之不用其計遂以潰



歸

孝宗乾道六年夏主仁孝分國與其相任得敬得敬相夏二十餘年潛懷異志詎宗親大臣仁孝不能制乃分西南路及靈州囉龐嶺地與得敬為國且上表于金為得敬請封金主以問宰相尚書令李石等曰事關本國我何與焉不如許之金主曰有國之君豈肯無故分國與人此必權臣逼奪非夏主本意夏稱藩既久一旦逼于賊臣朕為四海主豈能容此當為誅之乃賜仁孝詔曰先業所傳

亦當固守今茲請命未知措意所在當遣使來詢問得敬始懼仁孝乃謀誅之秋八月任得敬伏誅光宗紹熙五年夏主仁孝卒子純佑立仁孝在位五十五年始建太學於國立小學於禁中親為訓導尊孔子為帝然權臣擅命國勢日衰自此始也寧宗嘉定二年蒙古入靈州夏主安全降夏自是益衰

萬歷十年靈州卒楊文遇馬景亂洪武初畧定陝西殘元部落率衆歸附立靈州守禦千戶所其屬



處於瓦渠四里為民號土達使自耕食簡其壯者  
充營卒文遇景乃土達楊倘兀馬火丹之孫也素  
獷悍萬歷十年叅將許汝繼以勇名擢靈州任甫  
五月濕東部卒御下遇嚴小犯者必繩以軍法怨  
讟大生汝繼察知愈恨之不少假衆益怒文遇景  
遂謀為亂黨與嚮應四月八日啓叅將署直入郭  
濟逞凶先之汝繼赤身起迎截濟髮至死髮猶在  
握宅中男婦並見戕無噍類文遇景等開北門出  
迎其黨徐龍掌所千戶蒯訓千戶戴儒遂閉門以  
守賊不得入奪馬逸走餘賊奪商民騾馬出南門  
乘隙肆掠同知呂珩馳使告變巡撫晉應槐兵  
備道劉堯鄉檄遊擊唐堯輔攝靈州事令廣武中  
衛守將王保等據邊口把總李鯤楊朝率兵於九  
泉山沙渠諸處追賊獲三十餘人楊文遇馬景等  
並斬於市



怪異之事聖人所不道然自五石六鵠之異書於春秋而後世史家代有五行傳其事雖不經見亦可以識天地之大無所不有矣故余纂斯誌而以祥異終焉

貞觀二十年九月辛亥靈州地震有聲如雷

二十三年四月靈州河清

大中三年十月辛巳上都及靈武益夏等州地震壞廬舍壓死數千人

七年九月靈州奏黃河清

咸通十四年靈州陰晦

六年秋夏州雲霧晦冥旦及禺中乃解

調露元年鳴鷄羣飛入塞相繼散野至二年正月

還復北飛至靈夏北悉墮地而死視之皆無首

太平興國三年靈州獻官馬駒足有二距

雍熙二年靈州芝草生知州侯贊刻木為其狀  
獻

至道二年十月靈夏等州地震城郭廬舍多壞



曰兵饑是時西夏寇靈州

成化十年十月丁酉靈州大沙井驛地震有聲如雷自後晝夜累震至十一月甲寅一日十一震城堞房屋多圯

十八年靈州李景芳家白鼠晝遊次年其子中鄉試

皇清康熙九年寧夏河溢淹靈州南關居民

十八年惠安堡生員張辟家豬生八子皆有肉角四目三足五足者旋死

靈州誌蹟

卷四

六十七

三十三年靈州民王邦彥妻一產四男子

四十七年靈州井中見龍

雍正十一年又十月霜花雪結四十餘日

景泰間有李姓者至古靈州城東北鉄柱泉傍有窟借一僕藝燈以入行二十步推開一石門有銅鑄釋像傍有二僧屍覆以錦衾其面如生而金貝之類環具左右李恣意取之將出風颯颯燈息門閉鼓鈸齊鳴李恐懼欲死盡棄所取者俄於傍窟匍匐而出明日集衆往掘之堅不能入

朔方志



靈州誌跋

國有史家有乘而邑有志皆所以彙輯憲章維持政教也  
余承乏甘省近十年矣大憲不以余不才每委任邊劇凡  
所歷之處小心祇職罔或自逸而尤以舉墜修廢為已任  
未嘗以事之難為而輒止嘉慶戊午夏余以邊俸報滿自  
新疆見代抵省閱二月復委署寧郡之靈邑蓋靈邑在寧  
屬為河東巨屏實北陲形勝之區也余嘗考歷代故事知  
是邑自漢初建置迨有唐遂成重鎮設大都督府有鷄田  
鹿塞之州迴樂燭龍之境輪廣近千餘里其間如山川扼

靈州誌蹟跋

一

塞戍守機宜史官言之詳矣然載籍汗漫搜討頗艱而邊  
荒文字殘缺士大夫家乘復不槩見倘使經制碩畫有闕  
邑治與夫潛德幽光為國史所不載者一任其散逸放失  
邈不可稽將何以彙輯憲章維持政教耶余曰是不可以  
無志先是梁溪楊 蓉棠刺史官是邑與余同志曾經草  
創而苦未就緒適武威郭雪莊進士主是邑講席余就與  
謀之雪莊曰公是舉誠勝事某當竭力成之但采集未備  
或苦疎漏奈何余曰何傷哉自古作述之盛率非獨見所  
成如班馬二史馬既本春秋國語世本諸書而班復因馬



補綴整齊又皆父子相承續成厥事至范蔚宗書又因漢  
官儀東觀記及謝承諸本始集大成然則美備相因後先  
相衍自然之勢也今蓉裳刺史之所草創未就而有待於  
余者余既為纂成之美假使後之君子或有蒐羅完富足以  
補是書所未及者不妨更修飾潤色增成巨觀此余  
抑亦蓉裳之所樂也其又何嫌焉於是酌定月  
列書成凡二百餘版余乃捐俸付梓  
書其末以見夫舉墜修廢未嘗  
如此

靈州誌蹟

跋

二

昔嘉慶三年歲次戊午

署靈州知州準蘭縣知縣長白

